

Namo tassa bhagavato arahato sammāsambuddhassa

Saṃyuttanikāye

Khandhavagga-aṭṭhakathā

1. Khandhasaṃyuttaṃ

1. Nakulapituvaggo

1. Nakulapitusuttavaṇṇanā

1. Khandhiyavagassa paṭhame **bhaggesūti** evaṃnāmake janapade. **Susumāragireti** susumāragiranagare. Tasmim kira māpiyamāne susumāro saddamakāsi, tenassa “susumāragira” ntveva nāmaṃ akāṃsu. **Bhesakaḷāvaneti** bhesakaḷāya nāma yakkhiniyā adhivutthattā evaṃladdhanāme vane. Tadeva migagaṇassa abhayatthāya dinnattā **migadāyoti** vuccati. Bhagavā tasmim janapade taṃ nagaraṃ nissāya tasmim vanasaṇḍe viharati. **Nakulapitāti** nakulassa nāma dārakassa pitā.

Jiṇṇoti jarājiṇṇo. **Vuḍḍhoti** vayovuḍḍho. **Mahallakoti** jātimahallako. **Addhagatoti** tiyaddhagato. **Vayoanuppattoti** tesu tīsu addhesu pacchimavayaṃ anuppatto. **Āturakāyoti** gilānakāyo. Idañhi sarīraṃ suvaṇṇavaṇṇampi niccapaggharaṇaṭṭhena āturaṃyeva nāma. Visesena paṇassa jarāturaṭṭā byādhāturaṭṭā maraṇāturaṭṭā tisso āturaṭṭā honti. Tāsu kiñcāpi eso mahallakattā jarāturova, abhiṇharogātāya paṇassa byādhāturaṭṭā idha adhippetā. **Abhikkhaṇātaṅkoti** abhiṇharogo nirantararogo. **Aniccadassāvīti** tāya āturaṭṭāya icchiticchitakkhaṇe āgantum asakkonto kadācideva daṭṭhum labhāmi, na sabbakālanti attho. **Manobhāvanīyānanti** manavaḍḍhakānaṃ. Yesu hi diṭṭhesu kusalavasena cittaṃ vaḍḍhati, te sārīputtamoggallānādayo mahātherā manobhāvanīyā nāma. **Anusāsātūti** punappunaṃ sāsatu. Purimañhi vacanaṃ ovādo nāma, aparāparaṃ anusāsānī nāma. Otiṇṇe vā vatthusmim vacanaṃ ovādo nāma, anotiṇṇe tantivasena vā paveṇivasena vā vuttaṃ anusāsānī nāma. Apica ovādoti vā anusāsānīti vā atthato ekameva, byañjanamattameva nānaṃ.

Āturo hāyanti āturo hi ayaṃ, suvaṇṇavaṇṇo piyaṅgusāmopi samāno niccapaggharaṇaṭṭhena āturoyeva. **Aṇḍabhūtoti** aṇḍaṃ viya bhūto dubbalo. Yathā kukkuṭaṇḍaṃ vā mayūraṇḍaṃ vā geṇḍukaṃ viya gahetvā khipantena vā paharantena vā na sakkā kīlītum, tāvadeva bhijjati, evamayampi kāyo kaṇṭakepi khāṇukepi pakkhalitassa bhijjati aṇḍaṃ viya bhūtoti aṇḍabhūto. **Pariyonaddhoti** sukhumena chavimattena pariyonaddho. Aṇḍañhi sāratacena pariyonaddhaṃ, tena ḍaṃsamakasādayo nilīyitvāpi chaviṃ chinditvā yūsaṃ paggharāpetum na sakkonti. Imasmim pana chaviṃ chinditvā yaṃ icchanti, taṃ karonti. Evaṃ sukhumāya chaviyā pariyonaddho. **Kimaññatra bālyāti** bālabhāvato aññaṃ kimatthi? Bāloyeva ayanti attho. **Tasmāti** yasmā ayaṃ kāyo evarūpo, tasmā.

Tenupasaṅkamīti rañño cakkavattissa upaṭṭhānaṃ gantvā anantaraṃ pariṇāyakaratanassa upaṭṭhānaṃ gacchanto rājapuriso viya, saddhammacakkavattissa bhagavato upaṭṭhānaṃ gantvā, anantaraṃ dhammasenāpatissa apacitīm kātukāmo yenāyasmā sārīputto, tenupasaṅkamī. **Vippasannānīti** sutṭhu pasannāni. **Indriyānīti** manacchaṭṭhāni indriyāni. **Parisuddhoti** niddoso. **Pariyodātoti** tasseva vevacanaṃ. Nirupakkilesatāyeva hi esa pariyodātoti vutto, na setabhāvena. Etassa ca pariyodātataṃ disvāva indriyānaṃ vippasannataṃ aññāsi. Nayaggāhapaññā kiresā therassa.

Kathañhi no siyāti kena kāraṇena na laddhā bhavissati? Laddhāyevāti attho. Iminā kiṃ dīpeti? Sattuvisāsikabhāvaṃ. Ayaṃ kira satthu diṭṭhakālato paṭṭhāya pitipemaṃ, upāsikā cassa mātīpemaṃ

paṭilabhati. Ubhopi “mama putto”ti sathhāraṃ vadanti. Bhavantaragato hi nesam sineho. Sā kira upāsikā pañca jātisatāni tathāgatassa mātāva, so ca, gahapati, pitāva ahoṣi. Puna pañca jātisatāni upāsikā mahāmātā, upāsako mahāpitā, tathā cūḷamātā cūḷapitāti. Evaṃ sathhā diyadḍhaattabhāvasahassam tesamyeva hatthe vadḍhito. Teneva te yaṃ neva puttassa, na pitu santike kathetuṃ sakkā, taṃ satthu santike nisinnā kathenti. Imināyeva ca kāraṇena bhagavā “etadaggaṃ, bhikkhave, mama sāvakanāṃ upāsakanāṃ vissāsikanāṃ yadidaṃ nakulapitā gahapati, yadidaṃ nakulamātā gahapatāni”ti (a. ni. 1.257) te etadagge ṭhapesi. Iti so imaṃ vissāsikabhāvaṃ pakāśento **kathañhi no siyāti āha. Amatena abhisittoti** nassidha aññaṃ kiñci jhānaṃ vā vipassanā vā maggo vā phalaṃ vā “amatābhiseko”ti daṭṭhabbo, madhuradhamadesanāyeva pana “amatābhiseko”ti veditabbo. **Dūratopīti** tiroraṭṭhāpi tirojanapadāpi.

Assutavā puthujjanoti idaṃ vuttatthameva. **Ariyānaṃ adassāvīti** adīsu **ariyāti** ārakattā kilesehi, anaye na iriyanato, aye iriyanato, sadevakena ca lokena araṇīyato buddhā ca paccekabuddhā ca buddhasāvakā ca vuccanti. Buddhā eva vā idha ariyā. Yathāha – “sadevake, bhikkhave, loke...pe... tathāgato ariyo”ti vuccatīti (saṃ. ni. 5.1098). **Sappurisānanti** ettha pana paccekabuddhā tathāgatasāvakā ca sappurisāti veditabbā. Te hi lokuttaragaṇayogena sobhanā purisāti sappurisā. Sabbeva vā ete dvedhāpi vuttā. Buddhāpi hi ariyā ca sappurisā ca, paccekabuddhā buddhasāvakāpi. Yathāha –

“Yo ve kataññū katavedi dhīro,
Kalyāṇamitto dalhabhatti ca hoti;
Dukhitassa sakkacca karoti kiccaṃ,
Tathāvidhaṃ sappurisaṃ vadanti”ti. (jā. 2.17.78);

“Kalyāṇamitto dalhabhatti ca hoti”ti ettāvātā hi buddhasāvako vutto, kataññūtādīhi paccekabuddhabuddhāti. Idāni yo tesam ariyānaṃ adassanasīlo, na ca dassane sādhuḥkāri, so “ariyānaṃ adassāvī”ti veditabbo. So ca cakkhunā adassāvī, ñāṇena adassāvīti duvidho. Tesu ñāṇena adassāvī idha adhippeto. Maṃsacakkhunā hi dibbacakkhunā vā ariyā diṭṭhāpi adiṭṭhāva honti tesam cakkhūnaṃ vaṇṇamattaggahaṇato na ariyabhāvagocarato. Soṇasingālādayopi cakkhunā ariye passanti, na cete ariyānaṃ dassāvino nāma.

Tatridaṃ vatthu – cittalapabbatavāsino kira khīṇāsavatttherassa upaṭṭhāko vuḍḍhapabbajito ekadivasaṃ therena saddhiṃ piṇḍāya caritvā, therassa pattacīvaraṃ gahetvā, piṭṭhito āgacchanto theram pucchi – “ariyā nāma, bhante, kīdisā”ti? Thero āha – “idhekacco mahallako ariyānaṃ pattacīvaraṃ gahetvā vattapaṭivattaṃ katvā saharantopi neva ariye jānāti, evaṃ dujjānāvuso, ariyā”ti. Evaṃ vuttepi so neva aññāsi. Tasmā na cakkhunā dassanaṃ dassanaṃ, ñāṇena dassanameva dassanaṃ. Yathāha – “kiṃ te, vakkali, iminā pūtikāyena diṭṭhena? Yo kho, vakkali, dhammaṃ passati, so maṃ passati. Yo maṃ passati, so dhammaṃ passati”ti (saṃ. ni. 3.87). Tasmā cakkhunā passantopi ñāṇena ariyehi diṭṭhaṃ aniccādilakkhaṇaṃ apassanto, ariyādhigatañca dhammaṃ anadhigacchanto ariyakaradhammaṃ ariyabhāvassa ca adiṭṭhattā “ariyānaṃ adassāvī”ti veditabbo.

Ariyadhamma akovidoti, satipaṭṭhānādibhede ariyadhamme akusalo. **Ariyadhamme avinītoti** ettha pana –

“Duvidho vinayo nāma, ekamekettha pañcadhā;
Abhāvato tassa ayaṃ, avinītoti vuccati”.

Ayañhi saṃvaravinayo pahānavinayoti duvidho vinayo. Ettha ca duvidhepi vinaye ekameko vinayo pañcadhā bhijjati. **Samvaravinayopi** hi sīlasaṃvaro satisaṃvaro ñāṇasaṃvaro khantisamvaro vīriyasamvaroti pañcavidho. **Pahānavinayopi** tadaṅgappahānaṃ, vikkhambhanappahānaṃ samucchadappahānaṃ paṭippassaddhippahānaṃ nissaraṇappahānanti pañcavidho.

Tattha “iminā pātimokkhasaṃvarena upeto hoti samupeto”ti (vibha. 511) ayaṃ **sīlasaṃvaro**. “Rakkhati cakkhundriyaṃ, cakkhundriye saṃvaram āpajjati”ti ayaṃ (dī. ni. 1.213; ma. ni. 1.295; saṃ. ni. 4.239; a. ni. 3.16) **satisaṃvaro**.

“Yāni sotāni lokasmiṃ, (ajitāti bhagavā)
Sati tesam nivāraṇaṃ;
Sotānaṃ saṃvaram brūmi,
Paññāyete pidhīyare”ti. (su. ni. 1041; cūḷani. ajitamāṇavapucchāniddeśa.4) –

Ayaṃ **ñāṇasaṃvaro**. “Khamo hoti sītassa uṇhassā”ti (ma. ni. 1.24; a. ni. 4.114; 6.58) ayaṃ **khantisaṃvaro**. “Uppannaṃ kāmavitakkaṃ nādhivāseti”ti (ma. ni. 1.26; a. ni. 4.114; 6.58) ayaṃ **vīriyasaṃvaro**. Sabbopi cāyaṃ saṃvaro yathāsakaṃ saṃvaritabbānaṃ vinetabbānaṃ kāyaduccaritādīnaṃ saṃvaraṇato “saṃvaro” vinayanato “vinayo”ti vuccati. Evaṃ tāva saṃvaravinayo pañcadhā bhijjati veditabbo.

Tathā yaṃ nāmarūpaparicchedādīsu vipassanāñāṇesu paṭipakkhabhāvato dīpālokeneva tamassa, tena tena vipassanāñāṇena tassa tassa anathassa pahānaṃ. Seyyathidaṃ – nāmarūpavavattānena sakkāyaditthiyā, paccayapariggahena ahetuvisamahetuditthīnaṃ, tasseva aparabhāgena kaṅkhāvitarāṇena kathaṃkathībhāvassa, kalāpasammasanena “ahaṃ mamā”ti gāhassa, maggāmaggaṃvavattānena amagge maggasaññāya, udayadassanena ucchedaditthiyā, vayadassanena sassataditthiyā, bhayadassanena sabhaye abhayaśāññāya, ādīnavadassanena assādasāññāya, nibbidānupassanāya abhiratisāññāya, muccitukamyatāññāṇena amuccitukāmatāya. Upekkhāññāṇena anupekkhāya, anulomena dhammaṭṭhitiyaṃ nibbāne ca paṭilomabhāvassa, gotrabhunā saṅkhāranimittagāhassa pahānaṃ, etaṃ **tadaṅgappahānaṃ** nāma.

Yaṃ pana upacārappanābhedenā samādhinā pavattibhāvanivāraṇato ghaṭṭappahāreṇeva udakapiṭṭhe sevāssa, tesam tesam nīvaraṇādīdhammānaṃ pahānaṃ, etaṃ **vikkhambhanappahānaṃ** nāma. Yaṃ catunnaṃ ariyamaggānaṃ bhāvitattā taṃtaṃmaggavato attano santāne “ditthigatānaṃ pahānāyā”tiādīnā nayena (dha. sa. 277; vibha. 628) vuttassa samudayapakkhikassa kilesagaṇassa accantaṃ appavattibhāvena pahānaṃ, idaṃ **samucchedappahānaṃ** nāma. Yaṃ pana phalakkhaṇe paṭippassaddhattaṃ kilesānaṃ, etaṃ **paṭippassaddhippahānaṃ** nāma.

Yaṃ sabbasaṅkhatanissaṭṭattā pahīnasabbasaṅkhatam nibbānaṃ, etaṃ **nissaraṇappahānaṃ** nāma. Sabbampi cetam pahānaṃ yasmā cāgatthēna pahānaṃ, vinayaṭṭhēna vinayo, tasmā “pahānavinayo”ti vuccati. Taṃtaṃpahānavato vā tassa tassa vinayassa sambhavatopetaṃ “pahānavinayo”ti vuccati. Evaṃ pahānavinayopi pañcadhā bhijjati veditabbo.

Evaṃayaṃ saṅkhepato duvidho, bhedato ca dasavidho vinayo bhinnasaṃvarattā pahātābbaṃ ca appahīnattā yasmā etassa assutavato puthujjanassa natthi, tasmā abhāvato tassa ayaṃ “avinīto”ti vuccati. Esa nayo **sappurisānaṃ adassāvī sappurisadhammassa akovido sappurisadhamme avinītoti** etthāpi. Ninnānākaraṇaṃhi etaṃ atthato. Yathāha –

“Yeva te ariyā, teva te sappurisā. Yeva te sappurisā, teva te ariyā. Yo eva so ariyānaṃ dhammo, so eva so sappurisānaṃ dhammo. Yo eva so sappurisānaṃ dhammo, so eva so ariyānaṃ dhammo. Yeva te ariyavinayā, teva te sappurisavinayā. Yeva te sappurisavinayā, teva te ariyavinayā. Ariyeti vā sappuriseti vā, ariyadhammeti vā sappurisadhammeti vā, ariyavinayeti vā sappurisavinayeti vā esese eke ekatṭhe same samabhāge tajjāte taññevā”ti.

Rūpaṃ attato samanupassatīti idhekacco rūpaṃ attato samanupassati, “yaṃ rūpaṃ, so ahaṃ, yo ahaṃ, taṃ rūpa”nti rūpaṃ attānaṃ advayaṃ samanupassati. Seyyathāpi nāma telappadīpassa jhāyato yā acci, so vaṇṇo. Yo vaṇṇo, sā accīti acciṃ vaṇṇaṃ advayaṃ samanupassati, evameva idhekacco

rūpaṃ attato samanupassati...pe... advayaṃ samanupassatīti evaṃ rūpaṃ “attā”ti diṭṭhipassanāya passati. **Rūpavantam vā attānanti** arūpaṃ “attā”ti gahetvā chāyāvantam rukkham viya tam rūpavantam samanupassati. **Attani vā rūpanti** arūpameva “attā”ti gahetvā pupphasmim gandham viya attani rūpaṃ samanupassati. **Rūpasmim vā attānanti** arūpameva “attā”ti gahetvā karaṇḍake maṇim viya tam attānam rūpasmim samanupassati. **Pariyuṭṭhaṭṭhāyīti** pariyuṭṭhānākārena abhibhavanākārena ṭhito, “ahaṃ rūpaṃ, mama rūpa”nti evaṃ taṇhādiṭṭhīhi gilitvā pariniṭṭhapetvā gaṇhanako nāma hotīti attho. **Tassa tam rūpanti** tassa tam evaṃ gahitam rūpaṃ. Vedanādīsupi eseva nayo.

Tattha “rūpaṃ attato samanupassatī”ti suddharūpameva attāti kathitam. “Rūpavantam vā attānam, attani vā rūpaṃ, rūpasmim vā attānam, vedanam attato...pe... saññaṃ... saṅkhāre... viññānam attato samanupassatī”ti imesu sattasu ṭhānesu arūpaṃ attāti kathitam. “Vedanāvantam vā attānam, attani vā vedanam, vedanāya vā attāna”nti evaṃ catūsu khandhesu tiṇṇam tiṇṇam vasena dvādasasu ṭhānesu rūpārūpamissako attā kathito. Tattha “rūpaṃ attato samanupassati, vedanam... saññaṃ... saṅkhāre... viññānam attato samanupassatī”ti imesu pañcasu ṭhānesu ucchedadiṭṭhi kathitā, avasesesu sassatadiṭṭhīti evamettha pannarasa bhavadiṭṭhiyo pañca vibhavadiṭṭhiyo honti, tā sabbāpi maggāvaraṇā, na saggāvaraṇā, paṭhamamaggavajjhāti veditabbā.

Evaṃ kho, gahapati, āturakāyo ceva hoti āturacitto cāti kāyo nāma buddhānampi āturoyeva. Cittaṃ pana rāgadosamohānugataṃ āturaṃ nāma, tam idha dassitaṃ. **No ca āturacittoti** idha nikkilesatāya cittaṃ anāturabhāvo dassito. Iti imasmim sutte lokiyamahājano āturakāyo ceva āturacitto cāti dassito, khīṇāsavā āturakāyā anāturacittā, satta sekhā neva āturacittā, na anāturacittāti veditabbā. Bhajamānā pana anāturacittatameyeva bhajantīti. Paṭhamam.

2. Devadahassuttavaṇṇanā

2. Dutiye **devadahanti** devā vuccanti rājāno, tesam maṅgaladaho, sayamjāto vā so dahoti, tasmā “devadaho”ti vutto. Tassa avidūre nigamo devadahantveva napuṃsakaliṅgavasena saṅkham gato. **Pacchābhūmagamikāti** pacchābhūmam aparadisāyam nivīṭṭham janapadam gantukāmā. **Nivāsanti** temāsam vassāvāsam. **Apalokitoti** āpucchito. **Apalokethāti** āpucchatha. Kasmā theram āpucchāpeti? Te sabhāre kātukāmatāya. Yo hi ekavīhāre vasantopi santikam na gacchati pakkamanto anāpucchā pakkamati, ayam nibbhāro nāma. Yo ekavīhāre vasantopi āgantvā passati, pakkamanto āpucchati, ayam sabhāro nāma. Imepi bhikkhū bhagavā “evamime sīlādīhi vaḍḍhissantī”ti sabhāre kātukāmo āpucchāpeti.

Paṇḍitoti dhātukosallādinā catubbidhena paṇḍiccena samannāgato. **Anuggāhakoti** āmisānuggahena ca dhammānuggahena cāti dvīhipi anuggahehi anuggāhako. Thero kira aññe bhikkhū viya pātova piṇḍāya āgantvā sabbabhikkhūsu gatesu sakalam saṅghārāmam anuvicaranto asammatṭhaṭṭhānam sammajjati, achadditam kacavaram chaddeti, saṅghārāme dunnikkhittāni mañcapīṭhadārubhaṇḍamattikābhaṇḍāni paṭisāmeti. Kim kāraṇā? “Mā aññatitthiyā vihāram pavīṭṭhā disvā paribhavam akaṃsū”ti. Tato gilānasālam gantvā gilāne assāsetvā “kenattho”ti pucchitvā yena attho hoti, tadattham tesam daharasāmaṇere ādāya bhikkhācāravattena vā sabhāgaṭṭhāne vā bhesajjam pariyesitvā tesam datvā, “gilānupaṭṭhānam nāma buddhapaccekabuddhehi vaṇṇitam, gacchatha sappurisā appamattā hothā”ti te pesetvā sayam piṇḍāya caritvā upaṭṭhākakule vā bhattakiccam katvā vihāram gacchati. Idam tāvassa nibaddhavāsaṭṭhāne āciṇṇam.

Bhagavati pana cārikam caramāne “ahaṃ aggasāvako”ti upāhanam āruyha chattam gahetvā purato purato na gacchati. Ye pana tattha mahallakā vā ābādhikā vā atidharā vā, tesam rujjanaṭṭhānāni telena makkhāpetvā pattacīvaram attano daharasāmaṇerehi gāhāpetvā tamdivasam vā dutiyadivasam vā te gaṇhitvāva gacchati. Ekadivasañhi taññeva āyasmantaṃ ativikāle sampattatā senāsanam alabhitvā, cīvarakuṭiyam nisinnam disvā, satthā punadivase bhikkhusaṅgham sannipātāpetvā, hatthivānaratittiravatthum kathetvā, “yathāvuḍḍham senāsanam dātabba”nti sikkhāpadam paññāpesi.

Evam tavesa āmisānuggahena anuggaṇhāti. Ovadanto panesa satavārampi sahasavārampi tāva ovadati, yāva so puggalo sotāpattiphale patitthāti, atha naṃ vissajjetvā aññaṃ ovadati. Iminā nayena ovadato cassa ovāde ṭhatvā arahattaṃ pattā gaṇanapathaṃ atikkantā. Evam dhammānuggahena anuggaṇhāti.

Paccassosunti te bhikkhū “amhākaṃ neva upajjhāyo, na ācariyo na sanditthasambhatto. Kiṃ tassa santike karissāmā”ti? Tuṇhībhāvaṃ anāpajjitvā “evaṃ, bhante”ti satthu vacanaṃ sampañcchimsu. **Eḷagalāgumbeti** gacchamaṇḍapake. So kira eḷagalāgumbo dhuvasalilaṭṭhāne jāto. Athettha catūhi pādehi maṇḍapaṃ katvā tassa upari taṃ gumbaṃ āropesum, so taṃ maṇḍapaṃ chādesi. Athassa hetthā itthakāhi paricinitvā vālikaṃ okiritvā āsanaṃ paññāpayimsu. Sītaṃ divāṭṭhānaṃ udakavāto vāyati. Thero tasmim nisīdi. Taṃ sandhāya vuttam “eḷagalāgumbe”ti.

Nānāverajjagatanti ekassa rañño rajjato nānāvidhaṃ rajjagataṃ. **Virajjanti** aññaṃ rajjaṃ. Yathā hi sadesato añño videso, evaṃ nivuttharajjato aññaṃ rajjaṃ virajjaṃ nāma, taṃ verajjanti vuttam. **Khattiyapaṇḍitāti** bimbisāraḥosalarājādayo paṇḍitarājāno. **Brāhmaṇapaṇḍitāti** caṅkītārukkhādayo paṇḍitabrāhmaṇā. **Gahapatiṇḍitāti** cittasudattādayo paṇḍitagahapatayo. **Samaṇapaṇḍitāti** sabhiyapilotikādayo paṇḍitaparibbājakā. **Vīmaṃsakāti** atthagavesino. **Kimvādīti** kiṃ attano dassanaṃ vadati, kiṃ laddhikoti attho. **Kimakkhāyīti** kiṃ sāvakaṇaṃ ovādānusāsanaṃ ācikkhati? **Dhammassa cānudhammanti** bhagavatā vuttabyākaraṇassa anubyākaraṇaṃ. **Sahadhammīkoti** sakāraṇo. **Vādānuvādōti** bhagavatā vuttavādassa anuvādo. “Vādānuvādō”tipi pāṭho, satthu vādassa anupāto anupātanaṃ, anugamananti attho. Imināpi vādaṃ anugato vādoyeva dīpito hoti.

Avigatarāgassātiādīsu taṇhāvaseneva attho vedītabbo. Taṇhā hi rajjanato **rāgo**, chandiyanato **chando**, piyāyanaṭṭhena **pemaṃ**, pivitukāmaṭṭhena **pipāsā**, anudhanaṭṭhena **parilāhoti** vuccati. **Akusale cāvuso, dhammeti**ādī kasmā āradhamaṃ? Pañcasu khandhesu avītarāgassa ādīnavamaṃ, vītarāgassa ca ānisamsaṃ dassetaṃ. Tatra **avighātōti** niddukkho. **Anupāyāsōti** nirupatāpo. **Aparilāhoti** niddāho. Evam sabbattha attho vedītabbo. Dutīyamaṃ.

3. Hālidikānisuttavaṇṇanā

3. Tatiye **avantīsūti** avantidakkhiṇāpathasaṅkhāte avantiraṭṭhe. **Kuraraghareti** evamaṇmake nagare. **Papāṭeti** ekato papāṭe. Tassa kira pabbatassa ekaṃ passaṃ chinditvā pātitaṃ viya ahosi. “Pavatte”tipi pāṭho, nānātitthiyānaṃ laddhipavattaṭṭhāneti attho. Iti thero tasmim raṭṭhe taṃ nagaraṃ nissāya tasmim pabbate viharati. **Hālidikānīti** evamaṇmake. **Aṭṭhakavaggiye māgaṇḍiyapañheti** aṭṭhakavaggikamhi māgaṇḍiyapañho nāma atthi, tasmim pañhe. **Rūpadhātūti** rūpakkhandaṃ adhippeto. **Rūpadhāturāgavinibaddhanti** rūpadhātumhi rāgena vinibaddhamaṃ. **Viññānanti** kammaviññānaṃ. **Okasārīti** gehasārī ālayasārī.

Kasmā panettha “viññāṇadhātu kho, gahapatī”ti na vuttanti? Sammohavighātattaṃ. “Okō”ti hi atthato paccayo vuccati, purejātaṇca kammaviññānaṃ pacchājātassa kammaviññāṇassapi vipākaviññāṇassapi vipākaviññāṇaṇca vipākaviññāṇassapi kammaviññāṇassapi paccayo hoti, tasmā “kataraṃ nu kho idha viññāṇa”nti? Sammoho bhaveyya, tassa vighātattaṃ taṃ agahetvā asambhinnāva desanā katā. Apica āramaṇavasena catasso abhisāṅkhāraviññāṇaṭṭhitiyo vuttāti tā dassetaṃ idha viññāṇaṃ na gahitaṃ.

Upayupādānāti taṇhūpayadiṭṭhūpayavasena dve upayā, kāmupādānādīni cattāri upādānāni ca. **Cetaso adhiṭṭhānābhīnivesānusayāti** akusalacittassa adhiṭṭhānabhūtā ceva abhinivesabhūtā ca anusayabhūtā ca. **Tathāgatassāti** sammāsambuddhassa. Sabbesampi hi khīṇāsavānaṃ ete pahīnāva, satthu pana khīṇāsavabhāvo loka atipākaṭṭho uparimakoṭṭiyā evaṃ vuttam. **Viññāṇadhātuyāti** idha viññāṇaṃ kasmā gahitaṃ? Kilesappahānadassanattaṃ. Kilesā hi na kevalaṃ catūsuyeva khandhesu pahīnā pahīyanti, pañcasupi pahīyantiyevāti kilesappahānadassanattaṃ gahitaṃ. **Evaṃ kho, gahapati,**

anokasārī hotīti evaṃ kammaviññāṇena okaṃ asarantena anokasārī nāma hoti.

Rūpanimittaniketavisāraviniṅbandhāti rūpameva kilesānaṃ paccayaṭṭhena nimittaṃ, ārammaṇakiriyasaṅkhātānivāsanaṭṭhānaṭṭhena nicketanti rūpanimittaniketamaṃ. Visāro ca viniṅbandho ca visāraviniṅbandhā. Ubhayenapi hi kilesānaṃ patthaṭṭabhāvo ca viniṅbandhanabhāvo ca vutto, rūpanimittaniketete visāraviniṅbandhāti rūpanimittaniketavisāraviniṅbandhā, tasmā rūpanimittaniketamhi uppanna kilesavisāreṇa ceva kilesabandhanena cāti attho. **Niketasārīti vuccatīti** ārammaṇakaraṇavasena nivāsanaṭṭhānaṃ sārīti vuccati. **Pahīnāti** te rūpanimittaniketakilesavisāraviniṅbandhā pahīnā.

Kasmā panettha pañcakkhandhā “okā”ti vuttā, cha ārammaṇāni “niketa”nti? Chandarāgassa balavadubbalatāya. Samānepi hi etesaṃ ālayaṭṭhena visayabhāve **okoti** niccanivāsanaṭṭhānagehameva vuccati, **niketanti** “ajja asukaṭṭhāne kīlissāmā”ti katasāṅketaṭṭhānaṃ nivāsaṭṭhānaṃ uyyānādi. Tattha yathā puttadāradhanadhañṇapuṇṇagehe chandarāgo balavā hoti, evaṃ ajjhattikesu khandhesu. Yathā pana uyyānaṭṭhānādīsu tato dubbalataro hoti, evaṃ bāhiresu chasu ārammaṇesūti chandarāgassa balavadubbalatāya evaṃ desanā katāti veditabbo.

Sukhitesu sukhitoti upaṭṭhākesu dhanadhañṇalābhādivasena sukhitesu “idānāhaṃ manāpaṃ bhojanaṃ labhissāmī”ti gehasitasukhena sukhitoti hoti, tehi pattasampattiṃ anubhavamāno viya carati. **Dukkhitestu dukkhitoti** tesamaṃ kenacideva kāraṇena dukkhe uppanne sayamaṃ dviguṇena dukkheṇa dukkhitoti hoti. **Kiccakaraṇīyesūti** kiccasaṅkhātesu karaṇīyesu. **Tesu yogamaṃ āpajjati**ti upayogamaṃ sayamaṃ tesamaṃ kiccānaṃ kattabbatamaṃ āpajjati. **Kāmesūti** vatthukāmesu. **Evaṃ kho, gahapati, kāmehi aritto hotīti** evaṃ kilesakāmehi aritto hoti anto kāmānaṃ bhāvena atuccho. Sukkapakkho tesamaṃ abhāvena **ritto** tucchoti veditabbo.

Purakkharānoti vaṭṭamaṃ purato kurumāno. **Evaṃrūpo siyanti**ādīsu dīgharassakāḷodātādīsu rūpesu “evaṃrūpo nāma bhaveyya”nti pattheti. Sukhādīsu vedanāsu evaṃvedano nāma; nīlasaṅkhādīsu saññāsu evaṃ saññā nāma; puññābhisaṅkhārādīsu saṅkhāresu evaṃsaṅkhāro nāma; cakkhuvīññāṇādīsu viññāṇesu “evaṃ viññāṇo nāma bhaveyya”nti pattheti.

Apurakkharānoti vaṭṭamaṃ purato akurumāno. **Sahitamaṃ me, asahitamaṃ teti** tuyhamaṃ vacanaṃ asahitamaṃ asiliṭṭhamaṃ, mayhamaṃ sahitamaṃ siliṭṭhamaṃ madhurapānasadisamaṃ. **Adhiciṅṇamaṃ te viparāvattanti** yamaṃ tuyhamaṃ dīghena kālena paricitaṃ suppaṅṇamaṃ, tamaṃ mama vādaṃ āgamma sabbaṃ khaṇena viparāvattamaṃ nivattamaṃ. **Āropito te vādoti** tuyhamaṃ doso mayā āropito. **Cara vādappamokkhāyāti** tamaṃ taṃ ācariyamaṃ upasaṅkamitvā uttari pariyesanto imassa vādassa mokkhāya cara āhiṅḍāhi. **Nibbeṭṭhehi vā sace pahosīti** atha sayameva pahosi, idheva nibbeṭṭhehīti. Tatiyamaṃ.

4. Dutiyahāliddikānisuttavaṅṇanā

4. Catutthe **sakkapañheti** cūḷasakkapañhe, mahāsakkapañhepetamaṃ vuttameva. **Taṇhāsāṅkhayavimuttāti** taṇhāsāṅkhaye nibbāne tadārammaṇāya phalavimuttiyā vimuttā. **Accantaniṭṭhāti** antamaṃ atikkantaniṭṭhā satataniṭṭhā. Sesapadesupī eseva nayo. Catutthamaṃ.

5. Samādhisuttavaṅṇanā

5. Pañcame **samādhinti** idamaṃ bhagavā te bhikkhū cittekaggatāya parihāyante disvā, “cittekaggatamaṃ labhantānaṃ imesaṃ kammaṭṭhānaṃ phātiṃ gamissatī”ti ṇatvā āha. **Abhinandatīti** pattheti. **Abhivadatīti** tāya abhinandanāya “aho piyamaṃ iṭṭhamaṃ kantaṃ manāpa”nti vadati. Vācaṃ abhinandantopi ca tamaṃ ārammaṇamaṃ nissāya evaṃ lobhamaṃ uppādentoti abhivadatiyeva nāma. **Ajjhosāya tiṭṭhatīti** gilivā pariniṭṭhapetvā gaṇhāti. **Yā rūpe nandīti** yā sā rūpe balavapatthanāsāṅkhātā nandī. **Tadupādānanti** tamaṃ gahaṇaṭṭhena upādānaṃ. **Nābhinandatīti** na pattheti. **Nābhivadatīti**

patthanāvasena na “iṭṭhaṃ kanta”nti vadati. Vipassanācittena cetasā “aniccaṃ dukkha”nti vacībhedaṃ karontopi nābhivadatiyeva. Pañcamam.

6. Paṭisallāṇasuttavaṇṇanā

6. Chaṭṭhe **paṭisallāṇeti** idaṃ bhagavā te bhikkhū kāyavivekena parihāyante disvā “kāyavivekaṃ labhantānaṃ imesaṃ kammaṭṭhānaṃ phātiṃ gamissatī”ti ñatvā āha. Chaṭṭham.

7. Upādāparitassanāsuttavaṇṇanā

7. Sattame **upādāparitassananti** gahaṇena uppannaṃ paritassanaṃ. **Anupādāparitassananti** aggahaṇena aparitassanaṃ. **Rūpavipariṇāmānuparivattiviññāṇaṃ hotīti** “mama rūpaṃ vipariṇata”nti vā “ahu vata metaṃ, dāni vata me natthī”ti vā ādinā nayena kammaviññāṇaṃ rūpassa bhedaṇuparivatti hoti. **Vipariṇāmānuparivattijāti** vipariṇāmassa anuparivattito vipariṇāmārammaṇacittato jātā. **Paritassanā dhammasamuppādāti** taṇhāparitassanā ca akusaladhammasamuppādā ca. **Cittanti** kusalacittaṃ. **Pariyādāya tiṭṭhantīti** pariyādiyitvā tiṭṭhanti. **Uttāsavāti** sauttāso. **Vighātavāti** savighāto sadukkho. **Apekkhavāti** sālāyo. **Upādāya ca paritassatīti** gaṇhitvā paritassako nāma hoti. **Na rūpavipariṇāmānuparivattīti** khīṇāsavassa kammaviññāṇameva natthi, tasmā rūpabhedaṇuparivatti na hotīti vattum vaṭṭati. Sattamaṃ.

8. Dutiyāupādāparitassanāsuttavaṇṇanā

8. Aṭṭhame taṇhāmānadiṭṭhivasena desanā katā. Iti paṭipāṭiyā catūsu suttesu vaṭṭavivaṭṭameva kathitaṃ. Aṭṭhamam.

9. Kālattayaaniccasuttavaṇṇanā

9. Navame **ko pana vādo paccuppanassāti** paccuppannamhi kathāva kā, aniccameva taṃ. Te kira bhikkhū atītānāgataṃ aniccanti sallakkhetvā paccuppanne kilamiṃsu, atha nesaṃ ito atītānāgatepi “paccuppannaṃ anicca”nti vuccamāne bujjhissantīti ajjhāsayaṃ viditvā sathā puggalajjhāsayena imaṃ desanaṃ desesi. Navamaṃ.

10-11. Kālattayadukkhasuttādivaṇṇanā

10-11. Dasamekādasamāni **dukkhaṃ anattāti** padehi visesetvā tathārūpeneva puggalajjhāsayena kathitānīti. Dasamekādasamāni.

Nakulapituvaggo paṭhamo.

2. Aniccavaggo

1-10. Aniccasuttādivaṇṇanā

12-21. Aniccavagge pariyosānasuttaṃ pucchāvasikaṃ, sesāni tathā tathā bujjhanakānañca vasena desitānīti. Paṭhamādāni.

Aniccavaggo dutiyo.

3. Bhāravaggo

1. Bhārasuttavaṇṇanā

22. Bhāravaggassa paṭhame **pañcupādānakkhandhātissa vacanīyanti** pañcupādānakkhandhā iti assa vacanīyaṃ, evaṃ vattabbaṃ bhaveyyāti attho. **Ayaṃ vuccati, bhikkhave, bhāroti** ye ime pañcupādānakkhandhā, ayaṃ bhāroti vuccati. Kenatṭhenāti? Parihārabhāriyaṭṭhena. Etesañhi ṭhāpanagamananisidāpananipajjāpananhāpanamaṇḍanakhādāpanabhūñjāpanādiparihāro bhāriyoti parihārabhāriyaṭṭhena bhāroti vuccati. **Evaṃnāmoti** tisso dattotiādināmo. **Evaṃgottoti** kaṇhāyano vacchāyanotiādigotto. Iti vohāramattasiddhaṃ puggalaṃ ‘‘bhārahāro’’ti katvā dasseti. Puggalo hi paṭisandhikkhaṇeyeva khandhabhāraṃ ukkhipitvā dasapī vassāni vīsati vassasatampīti yāvajīvaṃ imaṃ khandhabhāraṃ nhāpento bhojento mudusamphassamañcapīṭhesu nisidāpento nipajjāpento pariharitvā cutikkhaṇe chaḍḍetvā puna paṭisandhikkhaṇe aparaṃ khandhabhāraṃ ādiyati, tasmā bhārahāroti jāto.

Ponobhavikāti punabbhavanibbattikā. **Nandīrāgasahagatāti** nandīrāgena saha ekattameva gatā. Tabbhāvasahagatañhi idha adhippettaṃ. **Tatra tatrābhinandinīti** upapattiṭṭhāne vā rūpādīsū vā ārammaṇesu tattha tattha abhinandanasīlāva. **Kāmatanḥādīsū** pañcakāmaguṇiko rāgo kāmatanḥā nāma, rūpārūpabhavarāgo jhānanikanti sassatadiṭṭhisahagato rāgoti ayaṃ bhavatanḥā nāma, ucchedadiṭṭhisahagato rāgo vibhavatanḥā nāma. **Bhārādānanti** bhāragahaṇaṃ. Taṇhāya hi esa bhāraṃ ādiyati. **Asesavirāganirodhotiādi** sabbaṃ nibbānasseva vevacanaṃ. Tañhi āgamma taṇhā asesato virajjati nirujjhati cajiyaṭṭhi paṭinissajjiyaṭṭhi vimuccati, natthi cettha kāmalāyo vā diṭṭhālayo vāti nibbānaṃ etāni nāmāni labhati. **Samūlaṃ taṇhanti** taṇhāya avijjā mūlaṃ nāma. **Abbuyhāti** arahattamaggena taṃ samūlakaṃ uddharitvā. **Nicchāto parinibbutoti** nittaṇho parinibbuto nāmāti vattuṃ vaṭṭatīti. Paṭhamaṃ.

2. Pariññasuttavaṇṇanā

23. Dutīye **pariñṇeyyati** pariñānitabbe, samatikkamitabbeti attho. **Pariñṇanti** accantapariñṇaṃ, samatikkamanti attho. **Rāgakkhayotiādi** nibbānassa nāmaṃ. Tañhi accantapariñṇā nāma. Dutīyaṃ.

3. Abhijānasuttavaṇṇanā

24. Tatiye **abhijānanti** abhijānanto. Iminā ñātāpariñṇā kathitā, dutīyapadena tīraṇāpariñṇā, tatiyacatutthehi pahānāpariñṇāti imasmimṃ sutte tisso pariñṇā kathitāti. Tatiyaṃ.

4-9. Chandarāgasuttādivaṇṇanā

25-30. Catutthādīni dhātusamūyutte vuttanayeneva veditabbāni. Paṭipāṭiyā panettha pañcamachāṭṭhasattamesu cattāri saccāni kathitāni, aṭṭhamanavamesu vaṭṭavivaṭṭaṃ. Catutthādīni.

10. Aghamūlasuttavaṇṇanā

31. Dasame **aghanti** dukkhaṃ. Evamettha dukkhalakkhaṇameva kathitaṃ. Dasamaṃ.

11. Pabhaṅgusuttavaṇṇanā

32. Ekādasame **pabhaṅgunti** pabhijjanasabhāvaṃ. Evamidha aniccalakkhaṇameva kathitanti. Ekādasamaṃ.

Bhāravaggo tatiyo.

4. Natumhākavaggo

1. Natumhākasuttavaṇṇanā

33. Natumhākavaggassa paṭhame **pajahathā**ti chandarāgappahānena pajahatha. Tiṇādīsu **tiṇaṃ** nāma antopheggu bahisāraṃ tālanāḷikerādi. **Kaṭṭhaṃ** nāma antosāraṃ bahipheggu khadirasālasākapanasādi. **Sākhā** nāma rukkhassa bāhā viya nikkhantā. **Palāsaṃ** nāma tālanāḷikerapaṇṇādi. Paṭhamam.

2. Dutiyanatumhākasuttavaṇṇanā

34. Dutiyam vinā upamāya bujghanakānaṃ ajjhāsayaena vuttaṃ. Dutiyam.

3. Aññatarabhikkhusuttavaṇṇanā

35. Tatiye **rūpañce, bhante, anusetī**ti yadi rūpaṃ anuseti. **Tena saṅkhaṃ gacchatī**ti kāmarāgādīsu yena anusayena taṃ rūpaṃ anuseti, teneva anusayena “ratto duṭṭho mūlho”ti paṇṇattim gacchatī. **Na tena saṅkhaṃ gacchatī**ti tena abhūtena anusayena “ratto duṭṭho mūlho”ti saṅkhaṃ na gacchatīti. Tatiyam.

4. Dutiyaaññatarabhikkhusuttavaṇṇanā

36. Catutthe **taṃ anumīyatī**ti taṃ anusayitaṃ rūpaṃ marantena anusayena anumarati. Na hi ārammaṇe bhijjamāne tadārammaṇā dhammā tiṭṭhanti. **Yaṃ anumīyatī**ti yaṃ rūpaṃ yena anusayena anumarati. **Tena saṅkhaṃ gacchatī**ti tena anusayena “ratto duṭṭho mūlho”ti saṅkhaṃ gacchatī. Atha vā **yanti** karaṇavacanametam, yena anusayena anumīyati, tena “ratto duṭṭho mūlho”ti saṅkhaṃ gacchatīti attho. Catuttham.

5-6. Ānandasuttādivaṇṇanā

37-38. Pañcame **ṭhitassa aññathattaṃ paññāyatī**ti dharamānassa jīvamānassa jarā paññāyati. **Ṭhitī**ti hi jīvitindriyasāṅkhātāya anupālanāya nāmaṃ. **Aññathattanti** jarāya. Tenāhu porāṇa –

“Uppādo jāti akkhāto, bhaṅgo vutto vayoti ca;
Aññathattaṃ jarā vuttā, ṭhitī ca anupālanā”ti.

Evam ekekassa khandhassa uppādajarābhaṅgasāṅkhātāni tīṇi lakkhaṇāni honti yāni sandhāya vuttaṃ “tīṇimāni, bhikkhave, saṅkhatassa saṅkhatalakkhaṇāni”ti (a. ni. 3.47).

Tattha saṅkhatam nāma paccayanibbatto yo koci saṅkhāro. Saṅkhāro ca na lakkhaṇam, lakkhaṇam na saṅkhāro, na ca saṅkhārena vinā lakkhaṇam paññāpetum sakkā, nāpi lakkhaṇam vinā saṅkhāro, lakkhaṇena pana saṅkhāro pākaṭo hoti. Yathā hi na ca gāvīyeva lakkhaṇam, lakkhaṇameva na gāvī, nāpi gāvīṃ muñcitvā lakkhaṇam paññāpetum sakkā, nāpi lakkhaṇam muñcitvā gāvīṃ, lakkhaṇena pana gāvī pākaṭā hoti, evaṃsampadamidaṃ veditabbaṃ.

Tattha saṅkhārānaṃ uppādakkhaṇe saṅkhāropi uppādalakkhaṇampi kālasāṅkhāto tassa khaṇopi paññāyati. “Uppādoṇī”ti vutte saṅkhāropi jarālakkhaṇampi kālasāṅkhāto tassa khaṇopi paññāyati. Bhaṅgakkhaṇe saṅkhāropi taṃlakkhaṇampi kālasāṅkhāto tassa khaṇopi paññāyati. Apare pana vadanti “arūpadhammānaṃ jarākhaṇo nāma na sakkā paññāpetum, sammāsambuddho ca ‘vedanāya uppādo paññāyati, vayo paññāyati, ṭhitāya aññathattaṃ paññāyatī’ti vadanto arūpadhammānampi tīṇi lakkhaṇāni paññāpeti, tāni atthikkhaṇam upādāya labbhanti”ti vatvā –

“Atthitā sabbadhammānaṃ, ʘhiti nāma pavuccati;
Tasseva bhedo maraṇaṃ, sabbadā sabbapaṇina”nti. –

Imāya ācariyagāthāya tamatthaṃ sādheti. Atha vā santativasena ʘhānaṃ ʘhitīti veditabbanti ca vadanti. Yasmā pana sutte ayaṃ vireso natthi, tasmā ācariyamatiyā suttaṃ apaṇibāhetvā suttameva pamāṇaṃ kattabbaṃ. Chaṇṇaṃ uttānameva. Pañcamachaṇṇāni.

7-10. Anudhammasuttādivaṇṇanā

39-42. Sattame **dhammānudhammappaṇassā**ti navannaṃ lokuttaradhammānaṃ anulomadhammaṃ pubbhāgapaṇipadaṃ paṇipannassa. **Ayamanudhammoti** ayaṃ anulomadhammo hoti. **Nibbidābahuloti** ukkaṇṇanabahulo hutvā. **Parijānātīti** tīhi pariññāhi parijānāti. **Parimuccatīti** maggakkhaṇe uppannāya pahānapariññāya parimuccati. Evaṃ imasmiṃ sutte maggova kathito hoti, tathā ito paresu tīsu. Idha pana anupassanā aniyamitā, tesu niyamitā. Tasmā idhāpi sā tattha niyamitavaseneva niyametabbā. Na hi sakkā tīsu aññataraṃ anupassanaṃ vinā nibbindituṃ parijānitum vāti. Sattamādīni.

Natumhākavaggo catuttho.

5. Attadīpavaggo

1. Attadīpasuttavaṇṇanā

43. Attadīpavaggassa paṇhame **attadīpāti** attānaṃ dīpaṃ tānaṃ leṇaṃ gatiṃ parāyaṇaṃ patiṇṇhaṃ katvā viharathāti attho. **Attasaraṇāti** idaṃ tasseva vevacanaṃ. **Anaññasaraṇāti** idaṃ aññassa saraṇapaṇikkhepavacanaṃ. Na hi añño aññassa saraṇaṃ hoti aññassa vāyāmena aññassa asijjhanato, vuttampi cetam –

“Attā hi attano nātho,
Ko hi nātho paro siyā”ti. (dha. pa. 160);

Tenāha “anaññasaraṇā”ti. Ko panettha attā nāma? Lokiyalokuttaro dhammo. Tenevāha – “dhammadīpā dhammasaraṇā anaññasaraṇā”ti. **Yonīti** kāraṇaṃ – “yoni hesā, bhūmija, phalassa adhigamāyā”tiādīsu (ma. ni. 3.227) viya. **Kimpahotikāti** kimpabhutikā, kuto pabhavantīti attho? **Rūpassa tvevāti** idaṃ tesamyeva sokādīnaṃ pahānadassanattaṃ āraddhaṃ. **Na paritassatīti** na gaṇhāti na gahati. **Tadaṅganibbutoti** tena vipassanaṅgena kilesānaṃ nibbutattā tadaṅganibbuto. Imasmiṃ sutte vipassanāva kathitā. Paṇhamaṃ.

2. Paṇipadāsuttavaṇṇanā

44. Dutīye **dukkhasamudayagāminī samanupassanāti** yasmā sakkāyo dukkhaṃ, tassa ca samudayagāminī paṇipadā nāma “rūpaṃ attato samanupassati”ti evaṃ diṇṇhisamanupassanā vuttā, tasmā dukkhasamudayagāminī samanupassanāti ayamettha attho hoti. **Dukkhanirodhagāminī samanupassanāti** ettha saha vipassanāya catumaggañāṇaṃ “samanupassanā”ti vuttam. Iti imasmiṃ sutte vaṇṇavivaṇṇaṃ kathitam. Dutīyaṃ.

3. Aniccasuttavaṇṇanā

45. Tatiye **sammappaññāya daṇṇhabbanti** saha vipassanāya maggapaññāya daṇṇhabbaṃ. **Virajjati vimuccatīti** maggakkhaṇe virajjati, phalakkhaṇe vimuccati. **Anupādāya āsavehīti** anuppādanirodhena

niruddhehi āsavehi agahetvā iti vimuccati. **Rūpadhātuyāti**ādi paccavekkhaṇadassanattamaṃ vuttaṃ. Saha phalena paccavekkhaṇadassanattantipi vadantiyeva. **Ṭhitanti** upari kattabbakiccābhāvena ṭhitamaṃ. **Ṭhitattā santussitanti** pattabbaṃ pattabhāvena santuṭṭhamaṃ. **Paccattaṃyeva parinibbāyati** sayameva parinibbāyati. Tatiyamaṃ.

4. Dutiyaanicasuttavaṇṇanā

46. Catutthe **pubbantānudiṭṭhiyoti** pubbantamaṃ anugatā aṭṭhārasa diṭṭhiyo na honti. **Aparantānudiṭṭhiyoti** aparantamaṃ anugatā catucattālīsa diṭṭhiyo na honti. **Thāmaso parāmāsoti** diṭṭhithāmaso ceva diṭṭhiparāmāso ca na hoti. Ettāvataṃ paṭhamamaggo dassito. Idāni saha vipassanāya tayo magge ca phalāni ca dassetuṃ **rūpasminti**ādi āradhamaṃ. Atha vā diṭṭhiyo nāma vipassanāya eva pahīnā, idaṃ pana upari saha vipassanāya cattāro magge dassetuṃ āradhamaṃ. Catutthamaṃ.

5. Samanupassanāsuttavaṇṇanā

47. Pañcame **pañcupādānakkhandhe samanupassanti etesaṃ vā aññataranti** paripuṇṇagāhavasena pañcakkhandhe samanupassanti, aparipuṇṇagāhavasena etesaṃ aññataram. **Iti ayañceva samanupassanāti** iti ayañca diṭṭhisamanupassanā. **Asmīti cassa avigataṃ hotīti** yassa ayaṃ samanupassanā atthi, tasmīṃ asmīti taṇhāmānadiṭṭhisankhātamaṃ papañcattayamaṃ avigatameva hoti. **Pañcannaṃ indriyānaṃ avakkanti hotīti** tasmīṃ kilesajāte sati kammakilesapaccayānaṃ pañcannaṃ indriyānaṃ nibbatti hoti.

Atthi, bhikkhave, manoti idaṃ kammamaṇaṃ sandhāya vuttaṃ. **Dhammāti** ārammaṇamaṃ. **Avijjādhātūti** javanakkhaṇe avijjā. **Avijjāsamphassajenāti** avijjāsampayuttaphassato jātena. Apica **manoti** bhavaṅgakkhaṇe vipākamanodhātu, āvajjanakkhaṇe kiriyamanodhātu. **Dhammādayo** vuttappakārāva. **Asmītipissa hotīti** taṇhāmānadiṭṭhivasena asmīti evampissa hoti. Ito paresu **ayamaḥasmīti** rūpādīsu kiñciveva dhammaṃ gahetvā “ayaṃ ahamasmī”ti attadiṭṭhivasena vuttaṃ. **Bhavissanti** sassatadiṭṭhivasena. **Na bhavissanti** ucchedadiṭṭhivasena. **Rūpī bhavissanti**ādīni sabbāni sassatameva bhajanti. **Athetthāti** atha tenevākārena ṭhitesu etesu indriyesu. **Avijjā pahiyatīti** catūsu saccesu aññānabhūtā avijjā pahiyati. **Vijjā uppajjatīti** arahattamaggavijjā uppajjati. Evamettha asmīti taṇhāmānadiṭṭhiyo. Kammaṃ pañcannaṃca indriyānaṃ antare eko sandhi, vipākamaṇaṃ pañcindriyapakkhikaṃ katvā pañcannaṃca indriyānaṃ kammaṃ ca antare eko sandhīti. Iti tayo papañcā atīto addhā, indriyāṇi paccuppanno addhā, tatha kammamaṇaṃ ādiṃ katvā anāgatassa paccayo dassitoti. Pañcamaṃ.

6. Khandhasuttavaṇṇanā

48. Chaṭṭhe rūpakkhandho kāmāvacaro, cattāro khandhā catubhūmakā. **Sāsavanti** āsavānaṃ ārammaṇabhāvena paccayabhūtaṃ. **Upādāniyanti** tatheva ca upādānānaṃ paccayabhūtaṃ. Vacanattho panettha – ārammaṇamaṃ katvā pavattehi saha āsavehīti **sāsavaṃ**. Upādātābanti **upādāniyaṃ**. Idhāpi rūpakkhandho kāmāvacaro, avasesā tebhūmakā vipassanācāravasena vuttā. Evamettha rūpaṃ rāsaṭṭhena khandhesu pavitṭhamaṃ, sāsavarāsaṭṭhena upādānakkhandhesu. Vedanādayo sāsavāpi atthi, anāsavāpi atthi. Te rāsaṭṭhena sabbepi khandhesu pavitṭhā, tebhūmakā panettha sāsavaṭṭhena upādānakkhandhesu pavitṭhāti. Chaṭṭhamaṃ.

7-8. Soṇasuttādivaṇṇanā

49-50. Sattame **seyyohamasmīti** visiṭṭho uttamo ahamasmi. **Kimaññatra yathābhūtassa adassanāti** yathābhūtassa adassanato aññaṃ kiṃ bhavēyya? Adassanaṃ aññaṃameva bhavēyyāti attho. Idāniṃsa te parivaṭṭamaṃ vajirabhedadesanaṃ ārabhanto **taṃ kiṃ maññasi soṇoti**ādīmāha. Aṭṭhamaṃ uttānameva. Sattamaaṭṭhamāni.

9-10. Nandikkhayasuttādivaṇṇanā

51-52. Navamadasamesu **nandikkhayā rāgakkhayo, rāgakkhayā nandikkhayoti** idam nandīti vā rāgoti vā imesaṃ atthato ninnānākaraṇatāya vuttaṃ. Nibbidānupassanāya vā nibbindanto nandiṃ pajahati, virāgānupassanāya virajjanto rāgaṃ pajahati. Ettāvata vipassanaṃ niṭṭhapetvā “rāgakkhayā nandikkhayo”ti idha maggaṃ dassetvā “nandirāgakkhayā cittaṃ vimutta”nti phalaṃ dassitanti. Navamadasamāni.

Attadīpavaggo pañcama.

Mūlapaṇṇāsako samatto.

6. Upayavaggo

1. Upayasuttavaṇṇanā

53. Upayavaggassa paṭhame **upayoti** taṇhāmānadiṭṭhivasena pañcakkhandhe upagato. **Viññāṇanti** kammaviññāṇaṃ. **Āpajjeyyāti** kammaṃ javāpetvā paṭisandhiākaḍḍhanasamatthatāya vuddhiādīni āpajjeyya. **Viññāṇupayanti** padassa aggahaṇe kāraṇaṃ vuttameva. **Vocchijjatārammaṇanti** paṭisandhiākaḍḍhanasamatthatāya abhāvena ārammaṇaṃ vocchijjati. **Patitṭhā viññāṇassāti** kammaviññāṇassa patitṭhā na hoti. **Tadappatitṭhitanti** taṃ appatitṭhitam. **Anabhisaṅkhacca vimuttanti** paṭisandhiṃ anabhisaṅkharitvā vimuttaṃ. Paṭhamaṃ.

2. Bījasuttavaṇṇanā

54. Dutiye **bījajātānīti** bījāni. **Mūlabījanti** vacaṃ vacattaṃ haliddaṃ siṅgiveranti evamādi. **Khandhabījanti** assattho nigrodhoti evamādi. **Phalubījanti** ucchu veḷu naḷoti evamādi. **Aggabījanti** ajjukaṃ phaṇijjakanti evamādi. **Bījabījanti** sālivihiādi pubbaṇṇaṇceva muggamāsādi aparāṇṇaṇca. **Akhaṇḍānīti** abhinnāni. Bhinnakālato paṭṭhāya bījaṃ bījatthāya na upakappati. **Apūtikānīti** udakate manena apūtikāni. Pūtibījaṇhi bījatthāya na upakappati. **Avātātapahatānīti** vātena ca ātapena ca na hatāni, nirojataṃ na pāpitāni. Nirojaṇhi kasaṭaṃ bījaṃ bījatthāya na upakappati. **Sārādānīti** gahitasārāni patitṭhitasārāni. Nissāraṇhi bījaṃ bījatthāya na upakappati. **Sukhasayitānīti** cattāro māse koṭṭhe pakkhittaniyāmeneva sukhaṃ sayitāni. **Pathavīti** heṭṭhā patitṭhānāpathavī. **Āpoti** uparisnehanaāpo. **Catasso viññāṇaṭṭhitīyoti** kammaviññāṇassa ārammaṇabhūtā rūpādayo cattāro khandhā. Te hi ārammaṇavasena patitṭhābhūtattā pathavīdhātusadisā. **Nandirāgo** sinehanaṭṭhena āpodhātusadisō. **Viññāṇaṃ sāhāraṇti** sappaccayaṃ kammaviññāṇaṃ. Taṇhi bījaṃ viya pathaviyaṃ ārammaṇaṭṭhaviyaṃ viruhati. Dutiyaṃ.

3. Udānasuttavaṇṇanā

55. Tatiye **udānaṃ udānesīti** balavasomanassasamuṭṭhānaṃ udānaṃ udāhari. Kiṃ nissāya panesa bhagavato uppannoti. Sāsanassa niyyānikabhāvaṃ. Kathaṃ? Evaṃ kirassa ahoṣi, “tayome upanissayā – dānūpanissayo sīlūpanissayo bhāvanūpanissayo cā”ti. Tesu dānasīlūpanissayā dubbalā, bhāvanūpanissayo balavā. Dānasīlūpanissayā hi tayo magge ca phalāni ca pāpenti, bhāvanūpanissayo arahattaṃ pāpeti. Iti dubbalūpanissaye patitṭhito bhikkhu ghaṭento vāyamanto pañcorambhāgiyāni bandhanāni chetvā tīṇi maggaphalāni nibbatteti, “aho sāsanaṃ niyyānika”nti āvajjentassa ayaṃ udapādi.

Tattha “dubbalūpanissaye ṭhatvā ghaṭamāno tīṇi maggaphalāni pāpuṇāt”ti imassatthassāvibhāvanatthaṃ **milakattherassa** vatthu veditabbaṃ – so kira gihikāle pāṇātipātakammaena

jīvikam kappento araññe pāsasatañceva adūhalasatañca yojesi. Athekadivasam aṅgārapakkamaṃsaṃ khādītva pāsattḥānesu vicaranto pipāsābhībūto ekassa araññavāsitttherassa vihāraṃ gantvā therassa caṅkamantassa avidūre tḥitaṃ pānīyaghaṭaṃ vivari, hatthatemanamattampi udakaṃ nāddasa. So kujjhītva āha – “bhikkhu, bhikkhu tumhe gahapatikehi dinnaṃ bhuñjītva bhuñjītva supatha, pānīyaghaṭe añjalimattampi udakaṃ na tḥapetha, na yuttameta”nti. Thero “mayā pānīyaghaṭo pūretvā tḥapito, kiṃ nu kho eta”nti? Gantvā olokeno paripuṇṇaghaṭaṃ disvā pānīyasankhaṃ pūretvā adāsi. So dvattisankhapūraṃ pivitvā cintesi – “evaṃ pūritaghaṭo nāma mama kammaṃ āgamma tattakapālo viya jāto. Kiṃ nu kho anāgate attabhāve bhavissatī”ti? Saṃviggacitto dhanuṃ chaḍḍetvā, “pabbājetha maṃ, bhante”ti āha. Thero tacapañcakammaṭḥānaṃ ācikkhitvā taṃ pabbājesi.

Tassa samaṇadhammaṃ karontassa bahūnaṃ migasūkarānaṃ māritaṭḥānaṃ pāsaadūhalānañca yojitaṭḥānaṃ upaṭḥāti. Taṃ anussarato sarīre dāho uppajjati, kūṭagoṇo viya kammaṭḥānampi vīthiṃ na paṭipajjati. So “kiṃ karissāmi bhikkhubhāvenā”ti? Anabhiratiyā pīlito therassa santikaṃ gantvā vandītva āha – “na sakkomi, bhante, samaṇadhammaṃ kātu”nti. Atha naṃ thero “hatthakammaṃ karohī”ti āha. So “sādhu, bhante”ti vatvā udumbarādayo allarukkhe chindītva mahantaṃ rāsimaṃ katvā, “idāni kiṃ karomī”ti pucchi? Jhāpehi nanti. So catūsu disāsu aggimaṃ datvā jhāpetuṃ asakkonto, “bhante, na sakkomī”ti āha. Thero “tena hi apehī”ti pathaviṃ dvidhā katvā avīcito khajjopanakamattaṃ aggimaṃ nīharitvā tatha pakkhipi. So tāva mahantaṃ rāsimaṃ sukkhapaṇṇaṃ viya khaṇena jhāpesi. Athassa thero avīcimaṃ dassetvā, “sace vibbhamissasi, ettha paccissasī”ti saṃvegaṃ janesi. So avīcidassanato paṭḥāya pavedhamāno “niyyānikaṃ, bhante, buddhasāsana”nti pucchi, āmāvusoti. Bhante, buddhasāsanaṃ niyyānikatte sati milako attamokkhaṃ karissati, mā cintayitthāti. Tato paṭḥāya samaṇadhammaṃ karoti ghaṭeti, tassa vattapaṭivattaṃ pūreti, niddāya bādhayamānāya tintaṃ palālaṃ sīse tḥapetvā pāde soṇḍiyaṃ otāretvā nisīdati. So ekadivasam pānīyaṃ parissāvetvā ghaṭaṃ ūrumhi tḥapetvā udakamaṇikānaṃ pacchedaṃ āgamayamāno aṭḥāsī. Atha kho thero sāmaṇerassa imaṃ uddesaṃ deti –

“Uṭḥānavato satīmato,
 Sucikammaṃsa nisammakārino;
 Saññatassa dhammajivino,
 Appamattassa yasobhivaḍḍhatī”ti. (dha. pa. 24);

So catuppadikampi taṃ gāthaṃ attaniyeva upanesi – “uṭḥānavatā nāma mādisena bhavitabbaṃ. Satimatāpi mādiseneva...pe... appamattenapi mādiseneva bhavitabba”nti. Evaṃ taṃ gāthaṃ attani upanetvā tasmimīyeva padavāre tḥito pañcorambhāgiyāni saṃyojanāni chindītva anāgāmiṃphale patiṭḥāya haṭḥatuttḥo –

“Allaṃ palālapuñjāhaṃ, sīsenādāya caṅkamaṃ;
 Pattosmi tatiyaṃ tḥānaṃ, ettha me natthi saṃsaya”ti. –

Imaṃ udānagāthaṃ āha. Evaṃ dubbalūpanissaye tḥito ghaṭento vāyamanto pañcorambhāgiyāni saṃyojanāni chindītva tīṇi maggaphalāni nibbatteti. Tenāha bhagavā – “no cassaṃ, no ca me siyā, nābhavissa, na me bhavissatīti evaṃ adhimuccamāno bhikkhu chindeyya orambhāgiyāni saṃyojanāni”ti.

Tattha **no cassaṃ, no ca me siyāti** sace ahaṃ na bhaveyyaṃ, mama parikkhāropi na bhaveyya. Sace vā pana me atīte kammābhisaṅkhāro nābhavissa, idaṃ me etarahi khandhapañcakaṃ na bhaveyya. **Nābhavissa, na me bhavissatīti** idāni pana tathā parakkamissāmi, yathā me āyatimaṃ khandhābhiniḥḥattako kammaṃsaṅkhāro na bhavissati, tasmimī asati āyatimaṃ paṭisandhi nāma na me bhavissati. **Evaṃ adhimuccamānoti** evaṃ adhimuccanto bhikkhu dubbalūpanissaye tḥito pañcorambhāgiyāni saṃyojanāni chindeyya. **Evaṃ vutteti** evaṃ sāsanassa niyyānikabhāvaṃ āvajjentena bhagavatā imasmimī udāne vutte. **Rūpaṃ vibhavissatīti** rūpaṃ bhijjissati. **Rūpassa**

vibhavāti vibhavadassanena sahavipassanena. Sahavipassanakā hi cattāro maggā rūpādīnaṃ vibhavadassanaṃ nāma. Taṃ sandhāyetam vuttaṃ. **Evaṃ adhimuccamāno, bhante, bhikkhu chindeyyāti**, bhante, evaṃ adhimuccamāno bhikkhu chindeyyeva pañcorambhāgiyāni saṃyojanāni. Kasmā na chindissatīti?

Idāni upari maggaphalaṃ pucchanto **kathaṃ pana, bhantetiādīmāha**. Tattha **anantarāti** dve anantarāni āsannānantaraṇi dūrānantaraṇi. Vipassanā maggassa āsannānantaraṃ nāma, phalassa dūrānantaraṃ nāma. Taṃ sandhāya “kathaṃ pana, bhante, jānato kathaṃ passato vipassanānantarā ‘āsavānaṃ khayoti’ ti saṅkhaṃ gataṃ arahattaphalaṃ hotī” ti pucchati. **Atasitāyeti** atasitabbe abhāyitabbe tḥānamhi. **Tāsaṃ āpajjati** bhayaṃ āpajjati. **Tāso hesoti** yā esā “no cassaṃ, no ca me siyā” ti evaṃ pavattā dubbalavipassanā, sā yasmā attasinehaṃ pariyādātuṃ na sakkoti, tasmā assutavato puthujjanassa tāso nāma hoti. So hi “idānaṃ ucchijjissāmi, na dāni kiñci bhavissāmi” ti attānaṃ papāte patantaṃ viya passati aññataro brāhmaṇo viya. Lohapāsādassa kira heṭṭhā tipītakacūlanāgatthero tilakkhaṇāhataṃ dhammaṃ parivatteti. Atha aññatarassa brāhmaṇassa ekamante tḥatvā dhammaṃ suṇantassa saṅkhārā suññato upaṭṭhahimsu. So papāte patanto viya hutvā vivaṭadvārena tato palāyivā gehaṃ pavisitvā, puttaṃ ure sayāpetvā, “tāta, sakyasamayaṃ āvajjento manamhi naṭṭho” ti āha. **Na heso bhikkhu tāso** esā evaṃ pavattā balavavipassanā sutavato ariyasāvakaṃ na tāso nāma hoti. Na hi tassa evaṃ hoti “ahaṃ ucchijjissāmi” ti vā “vinassissāmi” ti vāti. Evaṃ pana hoti “saṅkhārāva uppajjanti, saṅkhārāva nirujjhanti” ti. Tatiyaṃ.

4. Upādānaparipavattasuttavaṇṇanā

56. Catutthe **catuparivaṭṭanti** ekekasmim khandhe catunnaṃ parivaṭṭanavasena. **Rūpaṃ abbhaññāsinti** rūpaṃ dukkhasaccanti abhiññāsīm. Evaṃ sabbapadesu catusaccavaseneva atho veditabbo. **Āhārasamudayāti** ettha sacchandarāgo kabalīkārāhāro āhāro nāma. **Paṭipannāti** silāto paṭṭhāya yāva arahattamaggā paṭipannā honti. **Gādhantīti** patiṭṭhahanti. Ettāvatā sekkhabhūmim kathetvā idāni asekkhabhūmim kathento **ye ca kho keci, bhikkhavi** etiādīmāha. **Suvimuttāti** arahattaphalavimuttiyā suṭṭhu vimuttā. **Kevalinoti** sakalino katasabbakiccā. **Vaṭṭaṃ tesam natthi paññāpanāyāti** yena te avasiṭṭhena vaṭṭena paññāpeyyuṃ, taṃ nesaṃ vaṭṭaṃ natthi paññāpanāya. Atha vā vaṭṭanti kāraṇaṃ, paññāpanāya kāraṇaṃ natthīti. Ettāvatā asekkhabhūmivāro kathito. Catutthaṃ.

5. Sattaṭṭhānasuttavaṇṇanā

57. Pañcame **sattaṭṭhānakusaloti** sattasu okāsesu cheko. **Vusitavāti** vusitavāso. **Uttamapurisoti** seṭṭhapuriso. Sesamettha vuttanayeneva veditabbaṃ. Idaṃ pana suttaṃ ussadanandiyañceva palobhanīyañcāti veditabbaṃ. Yathā hi rājā vijītasāṅgāmo sāṅgāme vijayino yodhe uccaṭṭhāne tḥapetvā tesam sakkāraṃ karoti. Kiṃ kāraṇā? Etesam sakkāraṃ disvā sesāpi sūrā bhavituṃ maññissanti, evameva bhagavā appameyyaṃ kālaṃ pāramiyo pūretvā mahābodhimaṇḍe kilesamāravijayaṃ katvā sabbāññutaṃ patto sāvattiyam jetavanamahāvihāre nisīditvā imaṃ suttaṃ desento khīṇāsava ukkhipitvā thomesi vaṇṇesi. Kiṃ kāraṇā? Evaṃ avasesā sekkhapuggalā arahattaphalaṃ pattabbaṃ maññissanti. Evametaṃ suttaṃ khīṇāsavānaṃ ukkhipitvā pasamsitattā ussadanandiyaṃ, sekkhānaṃ palobhitattā palobhanīyanti veditabbaṃ.

Evaṃ kho, bhikkhave, bhikkhu sattaṭṭhānakusaloti ettāvatā cettha maggaphalapaccavekkhaṇavasena desanaṃ niṭṭhapetvāpi puna **kathaṇca, bhikkhave, bhikkhu tividhūpaparikkhī hotīti** idaṃ “khīṇāsavo yasmim ārammaṇe satatavihārena viharati, taṃ satto vā puggalo vā na hoti, dhātuādimmattameva pana hotī” ti evaṃ khīṇāsavassa satatavihāraṇca, “imesu dhammesu kammaṃ katvā ayaṃ āgato” ti āgamanīyapaṭipadaṇca dassetuṃ vuttaṃ. Tattha **dhātuso upaparikkhatīti** dhātusabhāvena passati oloketi. Sesapadadvayepi eseva nayo. Pañcamaṃ.

6. Sammāsambuddhasuttavaṇṇanā

58. Chaṭṭhe **ko adhippayāsoti** ko adhikapayogo. **Anuppanassāti** imañhi maggaṃ kassapasammāsambuddho uppādesi, antarā añño satthā uppādetuṃ nāsakkhi, iti bhagavā anuppanassa maggassa uppādetā nāma. Nagaropamasmiñhi avalaṅjanaṭṭhānesu purāṇamaggo jāto, idha avattamānaṭṭhena anuppannamaggo nāma. Asañjātassāti tasseva vevacanam. **Anakkhātassāti** akathitassa. Maggaṃ jānātīti **maggaññū**. Maggaṃ viditaṃ pākataṃ akāsīti **maggavidū**. Magge ca amagge ca kovidoti **maggakovido**. **Maggānugāti** maggaṃ anugacchantā. **Pacchā samannāgatāti** ahaṃ paṭhamam gato, sāvakā pacchā samannāgatā. Chaṭṭham.

7. Anattalakkhaṇasuttavaṇṇanā

59. Sattame **pañcavaggiyeti** aññasi koṇḍaññattherādike pañca jane purāṇupaṭṭhāke. **Āmantesīti** āsāḷhipuṇṇamadivase dhammacakkappavattanato paṭṭhāya anukkamena sotāpattiṭṭhale patiṭṭhite “idāni nesam āsavakkhayāya dhammam desessāmi”ti pañcamiyam pakkhassa āmantesi. **Etadvocāti** etaṃ “rūpam, bhikkhave, anattā”tiādinayappavattam anattalakkhaṇasuttam avoca. Tattha **anattāti** pubbe vuttehi catūhi kāraṇehi anattā. **Tam kiṃ maññatha, bhikkhveti** idam kasmā āraddham? Ettakena ṭhānena anattalakkhaṇameva kathitam, na aniccadukkhakkhaṇāni, idāni tāni dassetvā samodhānetvā tīṇipi lakkhaṇāni dassetuṃ idamāraddhanti veditabbam. **Tasmāti** yasmā ime pañcakkhandhā aniccā dukkhā anattā, tasmā. **Yamkiñci rūpantiādīsu** vitthārakathā visuddhimagge paññābhāvanādhikāre khandhaniddese vuttāva. Sesam sabbattha vuttānusāreneva veditabbam. Imasmiṃ pana sutte anattalakkhaṇameva kathitanti. Sattamam.

8. Mahālisuttavaṇṇanā

60. Aṭṭhame **ekantadukkhantiādīni dhātusamyutte** vuttanayāneva. Aṭṭhamam.

9. Ādittasuttavaṇṇanā

61. Navame **ādittanti** ekādasahi aggīhi ādittam pajjalitam. Iti dvīsipi imesu suttesu dukkhalakkhaṇameva kathitam. Navamam.

10. Niruttipathasuttavaṇṇanā

62. Dasame niruttiyova **niruttipathā**, atha vā niruttiyo ca tā niruttivasena viññātabbānam atthānam pathattā pathā cāti niruttipathā. Sesapadadvayepi eseva nayo. Tīṇipi cetāni aññamaññavevacanānevāti veditabbāni. **Asamkiṇṇāti** avijahitā, “ko imehi attho”ti vatvā achadditā. **Asamkiṇṇapubbāti** atītepi na jahitapubbā. **Na samkiyantīti** etarahipi “kimetehi”ti na chaddiyanti. **Na samkiyissanti** anāgatepi na chaddiyissanti. **Appaṭikuṭṭhāti** appaṭibāhitā. **Atītanti** attano sabhāvam bhaṅgameva vā atikkantam. **Niruddhanti** desantaram asaṅkamitvā tattheva niruddham vūpasantam. **Vipariṇatanti** vipariṇāmam gatam naṭṭham. **Ajātanti** anuppanam. **Apātubhūtanti** apākaṭṭbhūtam.

Ukkalāti ukkalajanapadavāsino. **Vassabhaññāti** vasso ca bhañño ca. Dvepi hi te mūladiṭṭhigatikā. **Ahetukavādātiādīsu** “natthi hetu natthi paccayo”ti gahitattā ahetukavādā. “Karoto na karīyati pāpa”nti gahitattā **akiriyavādā**. “Natthi dinna”ntiādigahaṇato **natthikavādā**. Tattha ime dve janā, tisso diṭṭhiyo, kiṃ ekekassa diyaddhā hotīti? Na tathā, yathā pana eko bhikkhu paṭipāṭiyā cattāripi jhānāni nibbattetī, evamettha ekeko tissopi diṭṭhiyo nibbattesīti veditabbo. “Natthi hetu natthi paccayo”ti punappunam āvajjentassa āharantassa abhinandantassa assādentassa maggadassanam viya hoti. So micchattaniyāmam okkamati, so ekantakālakoti vuccati. Yathā pana ahetukadiṭṭhiyam, evam “karoto na karīyati pāpam, natthi dinna”nti imesupi ṭhānesu micchattaniyāmam okkamati.

Na garahitabbam nappaṭikkositabbam amaññimsūti ettha “yadetaṃ atītam nāma, nayidaṃ atītam, idamassa anāgatam vā paccuppannam vā”ti vadanto garahati nāma. Tattha dosam dassetvā “kiṃ

iminā garahitenā’’ti? Vadanto paṭikkosati nāma. Ime pana niruttipathe tepi accantakālakā diṭṭhigatikā na garahitabbe na paṭikkositabbe maññimsu. Atītaṃ pana atītameva, anāgataṃ anāgatameva, paccuppannaṃ paccuppannameva kathayimsu. **Nindāghaṭṭanabyārosaupārambhabhayāti** viññūnaṃ santikā nindābhayena ca ghaṭṭanabhayena ca dosāropanabhayena ca upārambhabhayena ca. Iti imasmimṃ sutte catubhūmikakhandhānaṃ paṇṇatti kathitāti. Dasamaṃ.

Upayavaggo chaṭṭho.

7. Arahantavaggo

1. Upādiyamānasuttavaṇṇanā

63. Arahantavaggassa paṭhame **upādiyamānoti** taṇhāmānadiṭṭhivasena gaṇhamāno. **Baddho mārassāti** mārassa pāsena baddho nāma. **Mutto pāpimatoti** pāpimato pāsena mutto nāma hoti. Paṭhamaṃ.

2. Maññamānasuttavaṇṇanā

64. Dutīye **maññamānoti** taṇhāmānadiṭṭhimaññanāhi maññamāno. Dutīyaṃ.

3. Abhinandamānasuttavaṇṇanā

65. Tatiye **abhinandamānoti** taṇhāmānadiṭṭhiabhinandanāhiyeva abhinandamāno. Tatiyaṃ.

4-5. Aniccasuttādivaṇṇanā

66-68. Catutthe **chandoti** taṇhāchando. Pañcamachattṭhesupi eseva nayo. Catutthādīni.

7. Anattaniyasuttavaṇṇanā

69. Sattame **anattaniyanti** na attano santakaṃ, attano parikkhārabhāvena suññatanti attho. Sattamaṃ.

8-10. Rajanīyasaṅghitasuttādivaṇṇanā

70-72. Aṭṭhame **rajanīyasaṅghitanti** rajanīyena ākārena saṅghitaṃ, rāgassa paccayabhāvena ṭhitanti attho. Navamadasamāni rāhulasamṃyutte vuttanayeneva veditabbānīti. Aṭṭhamādīni.

Arahantavaggo sattamo.

8. Khajjanīyavaggo

1-3. Assādasuttādivaṇṇanā

73-75. Khajjanīyavaggassa ādito tīsu suttesu catusaccameva kathitaṃ. Paṭhamādīni.

4. Arahantasuttavaṇṇanā

76. Catutthe **yāvatā, bhikkhave, sattāvāsāti**, bhikkhave, yattakā sattāvāsā nāma atthi. **Yāvatā bhavagganti** yattakaṃ bhavaggaṃ nāma atthi. **Ete aggā ete seṭṭhāti** ete aggabhūtā ceva seṭṭhabhūtā ca.

Yadidaṃ arahantoti ye ime arahanto nāma. Idampi suttaṃ purimanayeneva ussadanandiyañca palobhanīyañcāti veditabbaṃ.

Athāparaṃ etadavocāti tadatthaparidīpanāhi ceva visesatthaparidīpanāhi ca gāthāhi etaṃ “sukhino vata arahanto” tiādivacanaṃ avoca. Tattha **sukhinoti** jhānasukhena maggasukhena phalasukhena ca sukhitā. **Tañhā tesam na vijjatīti** tesam apāyadukkhajanikā tañhā na vajjati. Evaṃ te imassapi tañhāmūlakassa abhāvena sukhitāva. **Asmimāno samucchinnoti** navavidho asmimāno arahattamaggena samucchinno. **Mohajālaṃ padālitanti** ñāṇena avijjajālaṃ phālitam.

Anejanti ejāsankhātāya tañhāya pahānabhūtaṃ arahattaṃ. **Anupalittāti** tañhādittihilepehi alittā. **Brahmabhūtāti** seṭṭhabhūtā. **Pariññāyāti** tīhi pariññāhi parijānitvā. **Sattasaddhammagocarāti** saddhā hirī ottappaṃ bāhusaccaṃ āraddhavīriyatā upaṭṭhitassatitā paññāti ime satta saddhammā gocarō etesanti sattasaddhammagocarā.

Sattaratanasampannāti sattahi bojjanagaratanehi samannāgatā. **Anuvicarantīti** lokiyamahājanāpi anuvicarantiyeva. Idha pana khīṇāsavānaṃ nirāsankacāro nāma gahito. Tenevāha “**pahīnabhayabheravā**” ti. Tattha **bhayaṃ** bhayameva, **bheravaṃ** balavabhayaṃ. **Dasahaṅgehi sampannāti** asekkehi dasahi aṅgehi samannāgatā. **Mahānāgāti** catūhi kāraṇehi mahānāgā. **Samāhitāti** upacārappanāhi samāhitā. **Tañhā tesam na vijjatīti** “ūno loko atitto tañhādāsoti kho, mahārāja, tena bhagavatā” ti (ma. ni. 2.305) evaṃ vuttā dāsakārikā tañhāpi tesam natthi. Iminā khīṇāsavānaṃ bhujissabhāvaṃ dasseti.

Asekhaññānti arahattaphalaññaṃ. **Antimoyaṃ samussayoti** pacchimo ayaṃ attabhāvo. **Yo sāro brahmacariyassāti** sāro nāma phalaṃ. **Tasmim aparapaccayāti** tasmim ariyaphale, na aññaṃ pattiyāyanti, paccakkhatova paṭivijjhivā ṭhitā. **Vidhāsu na vikampantīti** tisu mānakoṭṭhāsesu na vikampanti. **Dantabhūmīti** arahattaṃ. **Vijitāvinoti** rāgādayo vijetvā ṭhitā.

Uddhantiādīsu uddhaṃ vuccati kesamatthako, **apācīnaṃ** pādatalaṃ, **tiriyaṃ** vemajjhaṃ. Uddhaṃ vā atītaṃ, apācīnaṃ anāgataṃ, tiriyaṃ paccuppannaṃ. Uddhaṃ vā vuccati devaloko, apācīnaṃ apāyaloko, tiriyaṃ manussaloko. **Nandī tesam na vijjatīti** etesu ṭhānesu saṅkhepato vā atītānāgatapaccuppannesu khandhesu tesam tañhā natthi. Idha vaṭṭamūlakatañhāya abhāvo dassito. **Buddhāti** catunnaṃ saccānaṃ buddhattā buddhā.

Idaṃ panettha sīhanādasamodhānaṃ – “vimuttisukhenamhā sukhitā, dukkhajanikā no tañhā pahīnā, pañcakkhandhā pariññātā, dāsakārikatañhā ceva vaṭṭamūlikatañhā ca pahīnā, anuttaramhā asadisā, catunnaṃ saccānaṃ buddhattā buddhā” ti bhavapitṭhe ṭhatvā abhītanādasankhātaṃ sīhanādaṃ nadanti khīṇāsavāti. Catutthaṃ.

5. Dutiyarahantasuttavaṇṇanā

77. Pañcamaṃ vinā gāthāhi suddhikameva katvā kathiyamānaṃ bujjanakānaṃ ajjhāsayena vuttaṃ. Pañcamaṃ.

6. Sīhasuttavaṇṇanā

78. Chaṭṭhe **sīhoti** cattāro sīhā – tiṇasīho, kāḷasīho, paṇḍusīho, kesarasīhoti. Tesu **tiṇasīho** kapotavaṇṇagāvisadiso tiṇabhakkho ca hoti. **Kāḷasīho** kāḷagāvisadiso tiṇabhakkhoyeva. **Paṇḍusīho** paṇḍupalāsavaṇṇagāvisadiso maṃsabhakkho. **Kesarasīho** lākhārasaparikkammakateneva mukhena agganāṅguṭṭhena catūhi ca pādapariyantehi samannāgato, matthakatopissa paṭṭhāya lākhātūlikāya katvā viya tisso rājiyo piṭṭhimajjhena gantvā antarasatthimhi dakkhiṇāvattā hutvā ṭhitā, khandhe panassa satahassagghanikakambalaparikkhepo viya kesarabhāro hoti, avasesaṭṭhānaṃ parisuddhaṃ

sālipiṭṭhasaṅkhacūṇṇapicuvanṇaṃ hoti. Imesu catūsu sīhesu ayaṃ kesarasīho idha adhippeto.

Migarājāti migagaṇassa rājā. **Āsayāti** vasanaṭṭhānato suvaṇṇaguhato vā rajatamaṇiphalikamanosilāguhato vā nikkhamatīti vuttaṃ hoti. Nikkhamamāno panaesa catūhi kāraṇehi nikkhamati andhakārapīlito vā ālokatthāya, uccārapassāvapīlito vā tesam viṣajjanatthāya, jighacchāpīlito vā gocaratthāya, sambhavapīlito vā assaddhammaṭṭisevanatthāya. Idha pana gocaratthāya nikkhantoti adhippeto.

Vijambhatīti suvaṇṇatale vā rajatamaṇiphalikamanosilātalānaṃ vā aññatarasmiṃ dve pacchimapāde samaṃ patiṭṭhāpetvā purimapāde purato pasāretvā sarīrassa pacchābhāgaṃ ākaḍḍhitvā purimabhāgaṃ abhiharitvā piṭṭhiṃ nāmetvā gīvaṃ ukkhipitvā asanisaddaṃ karonto viya nāsapuṭāni pothetvā sarīralaggaṃ rajaṃ vidhunanto vijambhati. Vijambhanabhūmiyaṅca pana taruṇavacchako viya aparāparaṃ javati. Javato panassa sarīraṃ andhakāre paribbhamantaṃ alātaṃ viya khāyati.

Anuviloketīti kasmā anuviloketi? Parānuddayaṭṭāya. Tasmīṃ kira sīhanādaṃ nadante papātāvāḍḍisu visamaṭṭhānesu carantā hatthigokaṇṇamahimsādayo pāṇā papātepi āvātepi patanti, tesam anuddayaṭṭāya anuviloketi. Kiṃ panassa luddakammaṃ paramaṃsakhādino anuddayaṭṭā nāma atthīti? Āma atthi. Tathā hesa “kiṃ me bahūhi ghātitehī”ti? Attano gocaratthāyapi khuddake pāṇe na gaṇhāti, evaṃ anuddayaṃ karoti. Vuttampicetaṃ – “māhaṃ kho khuddake pāṇe visamagate saṅghātaṃ āpādesi”nti (a. ni. 10.21).

Sīhanādaṃ nadatīti tikkhattuṃ tāva abhītanādaṃ nadati. Evaṅca panassa vijambhanabhūmiyaṃ ṭhatvā nadantassa saddo samantā tiyojanapadesaṃ ekaninnādaṃ karoti, tamassa ninnādaṃ sutvā tiyojanabbhantaragatā dvipadacatuppadaṅgā yathāṭṭhāne ṭhātuṃ na sakkonti. **Gocarāya pakkamatīti** āharatthāya gacchati. Kathaṃ? So hi vijambhanabhūmiyaṃ ṭhatvā dakkhiṇato vā vāmato vā uppatanto usabhamattaṃ ṭhānaṃ gaṇhāti, uddhaṃ uppatanto cattāripi aṭṭhapi usabhāni uppatati, samaṭṭhāne ujukaṃ pakkhandanto soḷasausabhamattampi viṣatiusabhamattampi ṭhānaṃ pakkhandati, thalā vā pabbatā vā pakkhandanto saṭṭhiusabhamattampi asītiusabhamattampi ṭhānaṃ pakkhandati, antarāmagge rukkhaṃ vā pabbataṃ vā disvā taṃ pariharanto vāmato vā dakkhiṇato vā, usabhamattampi apakkamati. Tatiyaṃ pana sīhanādaṃ naditvā teneva saddhiṃ tiyojane ṭhāne paññāyati. Tiyojanaṃ gantvā nivattitvā ṭhito attanova nādassa anunādaṃ suṇāti. Evaṃ sīghena javena pakkamatīti.

Yebhuyenāti pāyena. **Bhayaṃ samvegaṃ santāsanti** sabbaṃ cittutrāsasseva nāmaṃ. Sīhassa hi saddaṃ sutvā bahū sattā bhāyanti, appakā na bhāyanti. Ke pana teti? Samasīho hatthājānīyo assājānīyo usabhājānīyo purisājānīyo khīṇāsavoti. Kasmā panete na bhāyantīti? Samasīho nāma “jātigottakulasūrabhāvehi samānosmi”ti na bhāyati, hatthājānīyādayo attano sakkāyadīṭṭhibalavatāya na bhāyanti, khīṇāsavo sakkāyadīṭṭhipahīnattā na bhāyati.

Bilāsayāti bile sayantā bilavāsino ahinakulagodhādayo. **Dakāsayaṭṭi** udakavāsino macchakacchapādayo. **Vanāsayaṭṭi** vanavāsino hatthiassagokaṇṇamigādayo. **Pavisantīti** “idāni āgantvā gaṇhissatī”ti maggaṃ oloketāva pavisanti. **Daḷhehīti** thirehi. **Varattehīti** cammarajjūhi. **Mahiddhikoti**ādīsu vijambhanabhūmiyaṃ ṭhatvā dakkhiṇapassādīhi usabhamattaṃ, ujukaṃ viṣatiusabhamattādilaṅghanavasena mahiddhikatā, sesamigānaṃ adhipatibhāvena mahesakkhatā, samantā tiyojane saddaṃ sutvā palāyantānaṃ vasena mahānubhāvatā veditabbā.

Evameva khoti bhagavā tesu tesu suttesu tathā tathā attānaṃ kathesi. “Sīhoti kho, bhikkhave, tathāgatassetam adhivacanaṃ arahato sammāsambuddhassa”ti (a. ni. 5.99; 10.21) imasmīṃ tāva sutte sīhasadisam attānaṃ kathesi. “Bhisakko sallakattoti kho, sunakkhatta, tathāgatassetam adhivacana”nti (ma. ni. 3.65) imasmīṃ vejjasadisam. “Brāhmaṇoti, bhikkhave, tathāgatassetam adhivacana”nti (a. ni. 8.85) imasmīṃ brāhmaṇasadisam. “Puriso maggakusaloti kho, tissa, tathāgatassetam adhivacana”nti (sam. ni. 3.84) imasmīṃ maggadesakapurisasadisam. “Rājāhamasmi selā”ti (su. ni. 559) imasmīṃ

rājasadisam. “Sīhoti kho tathāgatassetam adhivacana”nti (a. ni. 5.99; 10.21) imasmim pana sutte sīhasadisameva katvā attānam kathento evamāha.

Tatrāyam sadisatā – sīhassa kañcanaguhādīsu vasanakālo viya hi tathāgatassa dīpaṅkarapādamūle katābhinihārassa aparimitakālam pāramiyo pūretvā pacchimabhava paṭisandhiggahaṇena ceva mātukucchito nikkhamanena ca dasasahassilokadhātum kampetvā vuddhimanvāya dibbasampattisadisam sampattim anubhavamānassa tīsu pāsādesu nivāsakālo daṭṭhabbo. Sīhassa kañcanaguhādito nikkhantakālo viya tathāgatassa ekūnatimse samvacchare vivaṭena dvārena kaṇḍakam āruya channasahāyassa nikkhamitvā tīṇi rajjāni atikkamitvā anomānadīṭṭe brahmunā dinnāni kāsāyāni paridahitvā pabbajitassa sattame divase rājagaham gantvā tattha piṇḍāya caritvā paṇḍavagiripabbhāre katabhattakicassa sammāsambodhim patvā, paṭhamameva magadharaṭṭham āgamanatthāya yāva rañño paṭiññādānakālo.

Sīhassa vijambhanakālo viya tathāgatassa dinnapaṭiññassa āḷarakālāmaupasaṅkamanam ādim katvā yāva sujātāya dinnapāyāsassa ekūnapaṇṇāsāya piṇḍehi paribhuttakālo veditabbo. Sīhassa kesaravidhunanam viya sāyanhasamaye sottiyena dinnā aṭṭha tiṇamutthiyo gahetvā dasasahassacakkavāḷadevatāhi thomiyamānassa gandhādīhi pūjijamānassa tikkhattum bodhim padakkhiṇam katvā bodhimaṇḍam āruya cuddasahatthubbedhe ṭhāne tiṇasantharam santharivā caturaṅgavīriyam adhiṭṭhāya nisinnassa tamkhaṇamyeva mārabalam vidhamitvā tīsu yāmesu tisso vijjā visodhetvā anulomapaṭilomam paṭiccasamuppādamahāsamuddam yamakaññamanathanena manthentassa sabbaññutaññāṇe paṭividdhe tadanubhāvena dasasahassilokadhātukampanam veditabbam.

Sīhassa catuddisāvilokanam viya paṭividdhasabbaññutaññāṇassa sattasattāham bodhimaṇḍe viharitvā paribhuttamadhuṇḍikāhārassa ajapālanigrodhamūle mahābrahmuno dhammadesanāyācanam paṭiggahetvā tattha viharantassa ekādasame divase “sve āsāḷhipuṇṇamā bhavissatī”ti paccūsasamaye “kassa nu kho aham paṭhamam dhammam deseyya”nti? Āḷarudakānam kālaṅkatabhāvam ṇatvā dhammadesanatthāya pañcavaggiyānam olokanam daṭṭhabbam. Sīhassa gocarathāya tiyojanam gamanakālo viya attano pattacīvaramādāya “pañcavaggiyānam dhammacakkaṃ pavattessāmi”ti pacchābhatte ajapālanigrodhato vuṭṭhitassa aṭṭhārasayojanamaggaṃ gamanakālo.

Sīhanādakālo viya tathāgatassa aṭṭhārasayojanamaggaṃ gantvā pañcavaggiye saññāpetvā acalapallaṅke nisinnassa dasahi cakkavāḷasahashehi sannipatitena devagaṇena parivutassa “dveme, bhikkhave, antā pabbajitena na sevītabbā”tiādīnā (sam. ni. 5.1081; mahāva. 13) nayena dhammacakkappavattanakālo veditabbo. Imasmiṅca pana pade desiyamāne tathāgatasīhassa dhammaghoso heṭṭhā avīcim upari bhavaggaṃ gahetvā dasasahassilokadhātum paṭicchādesi. Sīhassa saddena khuddakapāṇānam santāsam āpajjanakālo viya tathāgatassa tīṇi lakkhaṇāni dīpetvā cattāri saccāni soḷasahākārehi saṭṭhiyā ca nayasahashehi vibhajitvā dhammam kathentassa dīghāyukadevatānam ṇāṇasantāsassa uppattikālo veditabbo.

Yadāti yasmiṃ kāle. **Tathāgatoti** aṭṭhahi kāraṇehi bhagavā tathāgato – tathā āgatoti tathāgato, tathā gatoti tathāgato, tathalakkhaṇam āgatoti tathāgato, tathadhamme yāthāvato abhisambuddhoti tathāgato, tathadassitāya tathāgato, tathāvādītāya tathāgato, tathākāritāya tathāgato. Abhibhavanaṭṭhena tathāgatoti. Tesam vitthāro brahmajālavaṇṇanāyampi (dī. ni. aṭṭha. 1.7) mūlapariyāyavaṇṇanāyampi (ma. ni. aṭṭha. 1.12) vuttoyeva. **Loketi** sattaloke. **Uppajjati** abhinīhārato paṭṭhāya yāva bodhipallaṅkā vā arahattamaggañāṇā vā uppajjati nāma, arahattaphale pana patte uppanno nāma. **Araham sammāsambuddhoti**ādīni visuddhimagge buddhānussatiniddese vitthāritāni.

Iti rūpanti idaṃ rūpaṃ ettakaṃ rūpaṃ, na ito bhiyyo rūpaṃ atthīti. Ettāvata sabhāvato sarasato pariyaṇṭato paricchato paricchindanato yāvata cattāro ca mahābhūtā catunnaṅca mahābhūtānam upādāyarūpaṃ, tam sabbam dassitam hoti. **Iti rūpassa samudayoti** ayam rūpassa samudayo nāma. Ettāvata hi “āhārasamudayo rūpasamudayo”tiādī sabbam dassitam hoti. **Iti rūpassa atthaṅgamoti**

ayaṃ rūpassa atthaṅgamo. Imināpi “āhāranirodhā rūpanirodho”tiādi sabbam dassitam hoti. **Iti vedanā**tiādīsupi eseva nayo.

Vaṇṇavantoti sarīravaṇṇena vaṇṇavanto. **Dhammadesanaṃ sutvāti** imaṃ pañcasu khandhesu paṇṇāsalaṅkhaṇapaṭimaṇḍitaṃ tathāgatassa dhammadesanaṃ sutvā. **Yebhuyyenāti** idha ke ṭhapeti? Ariyasāvake deve. Tesañhi khīṇāsavattā cittutrāsabhayampi na uppajjati, saṃviggassa yoniso padhānena pattabbaṃ pattatāya ñāṇasaṃvegopi. Itaresaṃ pana devānaṃ “tāso heso bhikkhū”ti aniccatam manasikarontānaṃ cittutrāsabhayampi, balavavipassanākāle ñāṇabhayampi uppajjati. **Bhoti** dhammālanamattametam. **Sakkāyapariyāpannāti** pañcakkhandhapariyāpannā. Iti tesam sammāsambuddhe vaṭṭadosaṃ dassetvā tilakkhaṇāhataṃ katvā dhammaṃ desente ñāṇabhayaṃ nāma okkamati.

Abhiññāyāti jānitvā. **Dhammacakkanti** paṭivedhaññānampi desanāññānampi. **Paṭivedhaññāṇaṃ** nāma yena ñāṇena bodhipallaṅke nisinnō cattāri saccāni soḷasaḥākārehi saṭṭhiyā ca nayasahashehi paṭivijjhi. **Desanāññāṇaṃ** nāma yena ñāṇena tiparivaṭṭaṃ dvādasākāraṃ dhammacakkaṃ pavattesi. Ubhayampi taṃ dasabalassa ure jātaññānameva. Tesu idha desanāññāṇaṃ gahetabbaṃ. Taṃ panesa yāva aṭṭhārasahi brahmakoṭṭhi saddhiṃ aññāsikoṇḍaññattherassa sotāpattiphalaṃ uppajjati, tāva pavatteti nāma. Tasmim uppane pavattitaṃ nāma hotīti veditabbaṃ. **Appaṭipuggaloti** sadisapuggalarahito. **Yasassinoti** parivārasampannā. **Tādinoti** lābhālābhādīhi ekasadisassa. Chaṭṭhaṃ.

7. Khajjanīyasuttavaṇṇanā

79. Sattame **pubbenivāsanti** na idaṃ abhiññāvasena anussaraṇaṃ sandhāya vuttaṃ, vipassanāvasena pana pubbenivāsaṃ anussarante samaṇabrāhmaṇe sandhāyetam vuttaṃ. Tenevāha – “sabbete pañcupādānakkhandhe anussaranti, etesaṃ vā aññatara”nti. Abhiññāvasena hi samanussarantassa khandhāpi upādānakkhandhāpi khandhapaṭibaddhāpi paṇṇattipi āramaṇaṃ hotiyeva. **Rūpaṃyeva anussaratīti** evañhi anussaranto na aññaṃ kiñci sattaṃ vā puggalaṃ vā anussarati, atīte pana niruddhaṃ rūpakkhandhameva anussarati. Vedanādisupi eseva nayoti. Suññatāpabbam niṭṭhitaṃ.

Idāni suññatāya lakkhaṇaṃ dassetuṃ **kiñca, bhikkhave, rūpaṃ vadethā**tiādīmāha. Yathā hi naṭṭhaṃ goṇaṃ pariyesamāno puriso gogaṇe caramāne rattaṃ vā kāḷaṃ vā balībaddaṃ disvāpi na ettakeneva “ayaṃ mayhaṃ goṇo”ti sannitṭhānaṃ kātuṃ sakkoti. Kasmā? Aññesampi tādisānaṃ atthitāya. Sarīrapadesa panassa sattisūlādilakkhaṇaṃ disvā “ayaṃ mayhaṃ santako”ti sannitṭhānaṃ hoti, evameva suññatāya kathitāyapi yāva suññatālakkaṇaṃ na kathiyati, tāva sā akathitāva hoti, lakkhaṇe pana kathite kathitā nāma hoti. Goṇo viya hi suññatā, goṇalakkaṇaṃ viya suññatālakkaṇaṃ. Yathā goṇalakkaṇe asallakkhite goṇo na suṭṭhu sallakkhito hoti, tasmim pana sallakkhite so sallakkhito nāma hoti, evameva suññatālakkaṇe akathite suññatā akathitāva hoti, tasmim pana kathite sā kathitā nāma hotīti suññatālakkaṇaṃ dassetuṃ **kiñca, bhikkhave, rūpaṃ vadethā**tiādīmāha.

Tattha **kiñcāti** kāraṇapucchā, kena kāraṇena rūpaṃ vadetha, kena kāraṇenetam rūpaṃ nāmāti attho. **Ruppatīti khoti** ettha **itīti** kāraṇuddeso, yasmā ruppati, tasmā rūpanti vuccatīti attho. **Ruppatīti** kuppati ghaṭṭiyati piḷiyati, bhijjatīti attho. **Sītenapi ruppatīti**ādīsū sītena tāva ruppanaṃ lokantarikaniraye pākaṭaṃ. Tiṇṇaṃ tiṇṇañhi cakkavāḷānaṃ antare ekeko lokantarikanirayo nāma hoti aṭṭhajojanasahassappamāṇo. Yassa neva heṭṭhā pathavī atthi, na upari candimasūriyadīpamaṇiāloko, niccandhakāro. Tattha nibbattasattānaṃ tigāvuto attabhāvo hoti, te vagguliyo viya pabbatapāde dīghaputhulehi nakhehi laggitvā avamsirā olambanti. Yadā saṃsappantā aññamaññassa hatthapāsāgatā hontī, atha “bhakkho no laddho”ti? Maññamānā tattha byāvaṭṭā viparivattitvā lokasandhārake uduke patanti, vāte paharantepi madhukaphalāni viya chijjivā uduke patanti, patitamattāva accantakhāre uduke tattatele patitapiṭṭhapiṇḍi viya paṭapaṭāyamānā vilīyanti. Evaṃ sītena ruppanaṃ lokantarikaniraye pākaṭaṃ. Mahimsakarattādisupi himapātasītalesu padesesu etaṃ pākaṭameva. Tattha hi satta sītena

bhinnasarīrā jīvītakkhayampi pāpuṇanti.

Uṇhena ruppanaṃ avīcimahāniraye pākaṭaṃ hoti. Jighacchāya ruppanaṃ pettivisaye ceva dubbhikkhakāle ca pākaṭaṃ. Pipāsāya ruppanaṃ kālakañjikādīsu pākaṭaṃ. Eko kira kālakañjikaasuro pipāsaṃ adhvāsetuṃ asakkonto yojanagambhīravittthāraṃ mahāgaṅgaṃ otari, tassa gatagataṭṭhāne udakaṃ chijjati, dhūmo uggacchati, tatte piṭṭhipāsāṇe caṅkamanakālo viya hoti. Tassa udakasaddaṃ sutvā ito cito ca vicarantasseva ratti vibhāyi. Atha naṃ pātova bhikkhācāraṃ gacchantā tiṃsamattā piṇḍacārikabhikkhū disvā “ko nāma tvaṃ sappurisā”ti? Pucchimsu. “Petohamasmi, bhante”ti. “Kiṃ pariyesasī”ti? “Pāṇīyaṃ, bhante”ti. “Ayaṃ gaṅgā paripuṇṇā, kiṃ tvaṃ na passasī”ti? “Na upakappati, bhante”ti. Tena hi gaṅgāpiṭṭhe nipajja, mukhe te pāṇīyaṃ āsiñcissāmā”ti. So vālikāpuḷīne uttāno nipajji. Bhikkhū tiṃsamatte patte nīharitvā udakaṃ āharitvā tassa mukhe āsiñcimsu. Tesam tathā karontānaṃyeva velā upakattā jātā. Tato “bhikkhācāraṃ amhākaṃ sappurisa, kacci te assādamattā laddhā”ti āhaṃsu. Peto “sace me, bhante, tiṃsamattānaṃ ayyānaṃ tiṃsapattehi āsittaudakato aḍḍhapasatamattampi paragaḷaṃ gataṃ, petattabhāvato mokkho mā hotū”ti āha. Evaṃ pipāsāya ruppanaṃ pettivisaye pākaṭaṃ.

Ḍaṃsādīhi ruppanaṃ ḍaṃsamakkhikādībahulesu padesesu pākaṭaṃ. Ettha ca **ḍaṃsāti** piṅgalamakkhikā. **Makasāti** makasāva. **Vātāti** kucchivātapiṭṭhivātādivasena veditabbā. Sarīrasmiñhi vātārogo uppajjivā hatthapādapiṭṭhiādīni bhindati, kāṇaṃ karoti, khujjaṃ karoti, pīṭhasappiṃ karoti. **Ātapotī** sūriyātapo. Tena ruppanaṃ marukantārādīsu pākaṭaṃ. Ekā kira itthī marukantāre rattiṃ satthato ohīnā divā sūriye uggacchante vālikāya tappamānāya pāde ṭhapetuṃ asakkontī sīsato pacchiṃ otāretvā akkami. Kamena pacchiyā uṇhābhitattāya ṭhātuṃ asakkontī tassā upari sātakaṃ ṭhapetvā akkami. Tasmimpi santatte attano aṅkena gahitaputtakaṃ adhomukhaṃ nipajjāpetvā kandantaṃyeva akkamitvā saddhiṃ tena tasmīyeva ṭhāne uṇhābhitattā kālamakāsī.

Sarīsapāti ye keci dīghajātīkā sarantā gacchanti. Tesam samphassena ruppanaṃ āsīvisadaṭṭhakādīnaṃ vasena veditabbaṃ. Iti bhagavatā yāni imāni sāmāññapaccattavasena dhammānaṃ dve lakkhaṇāni, tesu rūpakkhandaṃ tāva paccattalakkhaṇaṃ dassitaṃ. Rūpakkhandaṃ hi etaṃ, na vedanādīnaṃ, tasmā paccattalakkhaṇanti vuccati. Aniccadukkhaṇattalakkhaṇaṃ pana vedanādīnampi hoti, tasmā taṃ sāmāññalakkhaṇanti vuccati.

Kiñca, bhikkhave, vedanaṃ vadethātiādīsu purimasadisam vuttanayeneva veditabbaṃ. Yaṃ pana purimena asadisam, tassāyaṃ vibhāvanā – **sukhampi vedayatī**ti sukhaṃ ārammaṇaṃ vedeti anubhavati. Parato padadvayepi eseva nayo. Kathaṃ panetaṃ ārammaṇaṃ sukhaṃ dukkhaṃ adukkhamasukhaṃ nāma jātanti? Sukhādīnaṃ paccayato. Svāyamattho “yasmā ca kho, mahāli, rūpaṃ sukhaṃ sukhānupatitaṃ sukhāvakkanta”nti imasmīṃ mahālisutte (saṃ. ni. 3.60) āgatoyeva. **Vedayatī**ti ettha ca vedanāya vedayati, na añño satto vā puggalo vā. Vedanā hi vedayitalakkhaṇā, tasmā vatthārammaṇaṃ paṭicca vedanāya vedayatīti. Evamidha bhagavā vedanāyapi paccattalakkhaṇameva bhājetvā dassesi.

Nīlampi sañjānātīti nīlapupphe vā vatthe vā parikammaṃ katvā upacāraṃ vā appanaṃ vā pāpento sañjānāti. Ayañhi saññā nāma parikammañaññāpi upacārañaññāpi appanañaññāpi vaṭṭati, nīlaṃ nīlanti uppajjanasaññāpi vaṭṭatiyeva. **Pītakādīsupi** eseva nayo. Idhāpi bhagavā sañjānanalakkhaṇāya saññāya paccattalakkhaṇameva bhājetvā dassesi.

Rūpaṃ rūpattāya sañkhatamabhisankharontīti yathā yāgumeva yāguttāya, pūvameva pūvattāya pacati nāma, evaṃ paccayehi samāgantvā katabhāvena sañkhatanti laddhanāmaṃ rūpameva rūpattāya yathā abhisankhataṃ rūpaṃ nāma hoti, tathattāya rūpabhāvāya abhisankharoti āyūhati sampiṇḍeti, nipphādetīti attho. **Vedanādīsupi** eseva nayo. Ayaṃ panettha sañkhepo – attanā saha jāyamānaṃ rūpaṃ sampayutte ca vedanādayo dhamme abhisankharoti nibbattetīti. Idhāpi bhagavā cetayitalakkhaṇassa sañkhārassa paccattalakkhaṇameva bhājetvā dassesi.

Ambilampi vijānātī ambaambāṭakamātuluṅgādiambilam “ambila”nti vijānāti. Eseva nayo sabbapadesu. Api cettha **tittakanti** nimbapaṭolādinānappakāraṃ **kaṭukanti** pippalimaricādinānappakāraṃ. **Madhuranti** sappiphāṇitādinānappakāraṃ. **Khārikanti** vātingaṇanālīkera caturassavallivettaṅkurādinānappakāraṃ. **Akhārikanti** yaṃ vā taṃ vā phalajātaṃ kārapaṇṇādīmissakapaṇṇaṃ. **Loṇikanti** loṇayāguloṇamacchaloṇabhattādinānappakāraṃ. **Aloṇikanti** loṇayāguloṇamacchaloṇabhattādinānappakāraṃ. **Tasmā viññāṇanti vuccatī** yasmā imaṃ ambulādibhedam aññaṃaññaṃvisiṭṭhena ambulādibhāvena jānāti, tasmā viññāṇanti vuccatī. Evamidhāpi bhagavā vijānanalakkhaṇassa viññāṇassa paccatalakkhaṇameva bhājetvā dassesi.

Yasmā pana ārammaṇassa ākārasaṅghānagahaṇavasena saññā pākaṭā hoti, tasmā sā cakkhudvāre vibhattā. Yasmā vināpi ākārasaṅghānā ārammaṇassa paccatabhedagahaṇavasena viññāṇam pākaṭam hoti, tasmā taṃ jivhādvāre vibhattam. Imesaṃ pana saññāviññāṇapaññānam asammohato sabhāvasallakkhaṇattham **sañjānāti, vijānāti, pajānātī** ettha visesā veditabbā. Tattha upasaggamattameva viseso, jānātīti padaṃ pana aviseso. Tassapi jānanaṭṭhena viseso veditabbo. Saññā hi nīlādivasena ārammaṇasañjānanamattameva, aniccaṃ dukkhamanattāti lakkhaṇapaṭivedham pāpetuṃ na sakkoti. Viññāṇam nīlādivasena ārammaṇaṅceva jānāti, aniccādivasena lakkhaṇapaṭivedhaṅca pāpeti, ussakkivā pana maggapātubhāvaṃ pāpetuṃ na sakkoti. Paññā nīlādivasena ārammaṇampi jānāti, aniccādivasena lakkhaṇapaṭivedhampi pāpeti, ussakkivā maggapātubhāvampi pāpeti.

Yathā hi heraññīkaphalake kahāpaṇarāsīmhi kate ajātabuddhidāraṅko gāmikapuriso mahāheraññīkoti tīsu janesu oloketvā ṭhitesu ajātabuddhidāraṅko kahāpaṇānam cittavicittacaturassamaṅḍalādivhāvameva jānāti, “idaṃ manussānam upabhogaparibhogam ratanasammata”nti na jānāti. Gāmikapuriso cittādivhāvaṅca jānāti, manussānam upabhogaparibhogaratanasammatabhāvaṅca, “ayaṃ kūṭo, ayaṃ cheko, ayaṃ karaṭo, ayaṃ saṅho”ti na jānāti. Mahāheraññīko cittādivhāvampi ratanasammatabhāvampi kūṭādivhāvampi jānāti. Jānanto ca pana rūpaṃ disvāpi saddam sutvāpi gandham ghāyitvāpi rasam sāyitvāpi hatthena garulahubhāvaṃ upadhāretvāpi “asukagāme kato”tipi jānāti, “asukanigame asukanagare asukapabbatacchāyāya asukanadīre kato”tipi, “asukācariyena kato”tipi jānāti. Evameva saññā ajātabuddhidārakassa kahāpaṇadassanam viya nīlādivasena ārammaṇamattameva jānāti. Viññāṇam gāmikapurisassa kahāpaṇadassanam viya nīlādivasena ārammaṇampi jānāti, aniccādivasena lakkhaṇapaṭivedhampi pāpeti. Paññā mahāheraññīkassa kahāpaṇadassanam viya nīlādivasena ārammaṇampi jānāti, aniccādivasena lakkhaṇapaṭivedhampi pāpeti, ussakkivā maggapātubhāvampi pāpeti.

So pana nesaṃ viseso duppaṭivijjho. Tenāha āyasmā nāgaseno –

“Dukkaram, mahārāja, bhagavatā katanti. Kiṃ, bhante nāgasena, bhagavatā dukkaram katanti? Dukkaram, mahārāja, bhagavatā kataṃ, imesaṃ arūpīnam cittacetāsikānam dhammānam ekārammaṇe vattamānānam vavatthānam akkhātam ‘ayaṃ phasso, ayaṃ vedanā, ayaṃ saññā, ayaṃ cetanā, idaṃ citta’”nti (mi. pa. 2.7.16).

Yathā hi tilatelaṃ sāsapatelaṃ madhukatelaṃ eraṅḍakatelaṃ vasātelanti imāni pañca telāni ekacāṭiyam pakkhipitvā divasaṃ yamakamanthe hi manthetvā tato “idaṃ tilatelaṃ, idaṃ sāsapatela”nti ekekassa pāṭiyekkam uddharaṇam nāma dukkaram, idaṃ tato dukkarataram. Bhagavā pana sabbaññūtaññāṇassa suppaṭividdhattā dhammissaro dhammarājā imesaṃ arūpīnam dhammānam ekārammaṇe vattamānānam vavatthānam akāsi. Pañcannaṃ mahānadīnam samuddam pavitṭhatṭhāne “idaṃ gaṅgāya udakam, idaṃ yamunāyā”ti evaṃ pāṭiyekkam udakuddharaṇenāpi ayamatto veditabbo.

Iti paṭhamapabbena suññatam, dutiyena suññatālakkaṇanti dvīhi pabbehi anattalakkhaṇam kathetvā idāni dukkhalakkhaṇam dassetuṃ **tatra, bhikkhavi**tiādimāha. Tattha **khajjāmīti** na rūpaṃ sunakho viya maṃsam luñcitvā luñcitvā khādāti, yathā pana kilīṭṭhavatthanivattho tatonidānam pīlam

sandhāya ‘khādāti maṃ vattha’nti bhaṇāti, evamidampi pīlaṃ uppādentam khādāti nāmāti veditabbaṃ. **Paṭipanno hotīti** sīlaṃ ādiṃ katvā yāva arahattamaggā paṭipanno hoti. Yo panettha balavañño tikkhabuddhi ñāṇuttaro yogāvacaro padhānabhūmiyaṃ vāyamanto khāṇunā vā kaṇṭakena vā viddho āvudhena vā pahaṭo byagghādīhi vā gahetvā khajjamaṇo taṃ vedanaṃ abbohārikaṃ katvā mūlakammaṭṭhānaṃ sammasanto arahattameva gaṇhāti, ayaṃ vedanāya nibbidāya virāgāya nirodhāya paṭipanno nāma vuccati pītamallatthero viya kuṭumbiyaputtamahātissatthero viya vattaniaṭaviyaṃ tiṃsamattānaṃ bhikkhūnaṃ aññatara byagghamukhe nipannabhikkhu viya kaṇṭakena viddhatthero viya ca.

Dvādasasu kira bhikkhūsu ghaṇṭiṃ paharivā araññe padhānamanuyuñjantesu eko sūriye atthaṅgatamatteyeva ghaṇṭiṃ paharivā caṅkamaṃ oruyha caṅkamanto tiriyaṃ nimmathento tiṇapaṭicchannaṃ kaṇṭakaṃ akkami. Kaṇṭako piṭṭhipādena nikkhanto. Tattaphālena vinividdhakālo viya vedanā vattati. Thero cintesi – ‘kiṃ imaṃ kaṇṭakaṃ uddharāmi, udāhu pakatiyā vijjhivā ṭhitakaṇṭaka’nti? Tassa evamahosi – ‘iminā kaṇṭakena viddhattā nirayādīsu bhayaṃ nāma natthi, pakatiyā vijjhivā ṭhitakaṇṭakamevā’nti. So taṃ vedanaṃ abbohārikaṃ katvā sabbarattim caṅkamitvā vibhātāya rattiyā aññassa saññaṃ adāsi. So āgantvā ‘kiṃ, bhante’nti pucchi? ‘Kaṇṭakenamhi, āvuso, viddho’nti. ‘Kāya velāya, bhante’nti? ‘Sāyameva, āvuso’nti. ‘Kasmā na amhe pakkositttha, kaṇṭakaṃ uddharivā tattha telampi siñceyyāmā’nti? ‘Pakatiyā vijjhivā ṭhitakaṇṭakameva uddharitum vāyamimhā, āvuso’nti. ‘Sakkuṇitttha, bhante, uddharitu’nti. ‘Ekadesamattena me, āvuso, uddhaṭo’nti. Sesavatthūni dīghamajjhimaṭṭhakathāsu (dī. ni. aṭṭha. 2.373; ma. ni. aṭṭha. 1.106) satipaṭṭhānasuttaniddese vitthāritāneva.

Taṃ kiṃ maññatha, bhikkhveti kasmā āraddhaṃ? Imasmim pabbe dukkhalakkhaṇameva kathitaṃ, na aniccalakkhaṇaṃ. Taṃ dassetuṃ idamāraddhaṃ. Tīṇi lakkhaṇāni samodhānetvā dassetumpi āraddhameva. **Apacināti no ācinātīti** vaṭṭaṃ vināseti, neva cināti. **Pajahati na upādiyātīti** tadeva vissajjeti, na gaṇhāti. **Visineti na ussinetīti** vikirati na sampiṇḍeti. **Vidhūpeti na sandhūpetīti** nibbāpeti na jālapeti.

Evam passam, bhikkhveti idam kasmā āraddhaṃ? Vaṭṭaṃ vināsetvā ṭhitaṃ mahākhīṇāsavaṃ dassessāmīti āraddhaṃ. Ettakena vā ṭhānena vipassanā kathitā, idāni saha vipassanāya cattāro magge dassetuṃ idam āraddhaṃ. Atha vā ettakena ṭhānena paṭhamamaggo kathito, idāni saha vipassanāya tayo magge dassetuṃ idamāraddhaṃ. Ettakena vā ṭhānena tīṇi maggāni kathitāni, idāni saha vipassanāya arahattamaggaṃ dassetumpi idam āraddhameva.

Sapajāpatikāti saddhiṃ pajāpatinā devarājena. **Ārakāva namassantīti** dūratova namassanti, dūrepi ṭhitaṃ namassantiyeva āyasmantaṃ nītattheraṃ viya.

Thero kira pupphacchaḍḍakakulato nikkhamma pabbajito, khuraggeyeva arahattaṃ patvā cintesi – ‘ahaṃ ajjeva pabbajito ajjeva me pabbajitakiccaṃ matthakaṃ pattam, catupaccayasantosabhāvanārāmamaṇḍitaṃ mahāariyavaṃsapaṭipadaṃ pūressāmī’nti. So paṃsukūlatthāya sāvatthim pavisitvā coḷakaṃ pariyesanto vicari. Atheko mahābrahmā samāpattito vuṭṭhāya manussapaṭhaṃ olovento theram disvā – ‘ajjeva pabbajivā ajjeva khuragge arahattaṃ patvā mahāariyavaṃsapaṭipadaṃ pūretum coḷakaṃ pariyesatī’nti añjaliṃ paggayha namassamāno aṭṭhāsi. Tamañño mahābrahmā disvā ‘kaṃ namassasī’nti? Pucchi. Nītattheraṃ namassāmīti. Kiṃ kārāṇāti? Ajjeva pabbajivā ajjeva khuragge arahattaṃ patvā mahāariyavaṃsapaṭipadaṃ pūretum coḷakaṃ pariyesatīti. Sopi naṃ namassamāno aṭṭhāsi. Athañño, athaññoti sattasatā mahābrahmāno namassamānā aṭṭhaṃsu. Tena vuttaṃ –

‘Tā devatā sattasatā uḷārā,
Brahmā vimānā abhinikkhamitvā;
Nītaṃ namassanti pasannacittā,

‘Khīṇāsavo gaṇhati paṃsukūlaṃ’.

‘‘Tā devatā sattasatā uḷārā,
Brahmā vimānā abhinikkhamitvā;
Nītaṃ namassanti pasannacittā,
‘Khīṇāsavo kayirati paṃsukūlaṃ’.

‘‘Khīṇāsavo dhovati paṃsukūlaṃ’;
‘Khīṇāsavo rajati paṃsukūlaṃ’;
‘Khīṇāsavo pārupati paṃsakūla’.

Iti bhagavā imasmiṃ sutte desanaṃ tīhi bhavehi vinivattetvā arahattassa kūṭaṃ gaṇhi.
Desanāpariyosāne pañcasatā bhikkhū arahatte paṭiṭṭhahimsu. Sattamaṃ.

8. Piṇḍolyasuttavaṇṇanā

80. Aṭṭhame kismiṇcideva pakaraṇeti kismiṇcideva kāraṇe. Paṇāmetvāti nīharitvā. Kismiṃ pana kāraṇe ete bhagavatā paṇāmitāti? Ekasmiṇhi antovasse bhagavā sāvattiyāṃ vasitvā vutthavasso pavāretvā mahābhikkhusaṅghaparivāro sāvattitho nikkhamitvā janapadacārikāṃ caranto kapilavatthūṃ patvā nigrodhārāmaṃ pāvīsī. Sakyarājāno ‘‘satthā āgato’’ti sutvā pacchābhatte kappiyāni telamadhuphāṇitādīni ceva pānakāni ca kājasatehi gāhāpetvā vihāraṃ gantvā saṅghassa niyyātetvā satthāraṃ vanditvā paṭisanthāraṃ karontā ekamante nisīdīmsu. Satthā tesāṃ madhuradhammakathaṃ kathento nisīdi. Tasmiṃ khaṇe ekacce bhikkhū senāsanāṃ paṭijagganti, ekacce mañcapīṭhādīni paññāpentī, sāmaṇerā appaharitaṃ karontī. Bhājanīyaṭṭhāne sampattabhikkhūpi atthi, asampattabhikkhūpi atthi. Sampattā asampattānaṃ lābhaṃ gaṇhantā, ‘‘amhākaṃ detha, amhākaṃ ācariyassa detha upajjhāyassa detha’’ti kathentā mahāsaddamaṃsu. Satthā sutvā therāṃ pucchi ‘‘ke pana te, ānanda, uccāsaddā mahāsaddā kevaṭṭā maññe macchavilope’’ti? Thero etamatthaṃ ārocesi. Satthā sutvā ‘‘āmisahetu, ānanda, bhikkhū mahāsaddaṃ karontī’’ti āha. ‘‘Āma, bhante’’ti. ‘‘Ananucchavikaṃ, ānanda, appatirūpaṃ. Na hi mayā kappasatasahassādhikāni cattāri asaṅkhyeyyāni cīvarādihetu pāramiyo pūrītā, nāpi ime bhikkhū cīvarādihetu agārasmā anagāriyaṃ pabbajitā, arahattahetu pabbajitvā anattaṃ atthasadiṣaṃ asāraṃ sārāsadiṣaṃ karontī, gacchānanda, te bhikkhū paṇāmehi’’ti.

Pubbaṇhasamayanti dutiyadivase pubbaṇhasamayaṃ. **Beluvalaṭṭhikāya mūleti** taruṇabeluvarukkhamūle. **Pabāḷhoti** pabāhito. Pavāḷhotipi pāṭho, pavāhitoti attho. Ubhayampi nīhaṭabhāvameva dīpeti. **Siyā aññathattanti** pasādaññathattaṃ vā bhāvaññathattaṃ vā bhaveyya. Kathaṃ? ‘‘Sammāsambuddhena mayaṃ lahuke kāraṇe paṇāmitā’’ti pasādaṃ mandaṃ karontānaṃ pasādaññathattaṃ nāma hoti. Saliṅgeneva tittāyatanāṃ pakkamantānaṃ bhāvaññathattaṃ nāma. **Siyā vipariṇāmoti** ettha pana ‘‘mayaṃ satthu ajjhāsayaṃ gaṇhituṃ sakkhissāmāti pabbajitā, naṃ gahetuṃ asakkontānaṃ kiṃ amhākaṃ pabbajjāyā’’ti? Sikkhaṃ paccakkhāya hīnāyāvattanaṃ vipariṇāmoti veditabbo. **Vacchassāti** khīrūpakavacchassa. **Aññathattanti** milāyanāññathattaṃ. Khīrūpako hi vaccho mātu adassanena khīraṃ alabhanto milāyati kampaṭi pavedhati. **Vipariṇāmoti** maraṇaṃ. So hi khīraṃ alabhamāno khīrapipāsāya sussanto patitvā marati.

Bījānaṃ taruṇānanti udakena anuggahetabbānaṃ virūḷhabījānaṃ. **Aññathattanti** milāyanāññathattameva. Tāni hi udakaṃ alabhantāni milāyanti. **Vipariṇāmoti** vināso. Tāni hi udakaṃ alabhantāni sukkhitvā vinassanti, palālameva honti. **Anuggahitoti** āmisānuggahena ceva dhammānuggahena ca anuggahito. **Anuggaṇheyyanti** dvīhipi etehi anuggahehi anuggaṇheyyaṃ. Acirapabbajitā hi sāmaṇerā ceva daharabhikkhū ca cīvarādipaccayavekalle vā sati gelaññe vā satthārā vā ācariyupajjhāyehi vā āmisānuggahena ananuggahitā kilamantā na sakkonti sajjhāyaṃ vā manasikāraṃ vā kātuṃ, dhammānuggahena ananuggahitā uddesena ceva ovādānusāsaniyā ca parihāyamānā na

sakkonti akusalam parivajjetvā kusalam bhāvetum. Imehi pana dvīhi anuggahehi anuggahitā kāyena akilamantā sajjhāyamanasikāre pavattitvā yathānusiṭṭham paṭipajjamānā aparabhāge taṃ anuggaḥamaṃ alabhantāpi teneva purimānuggahena laddhabalā sāsane patiṭṭhahanti, tasmā bhagavato evaṃ parivitakko udapādi.

Bhagavato purato pāturaḥosīti satthu cittaṃ ñatvā – “ime bhikkhū bhagavatā paṇāmitā, idāni nesaṃ anuggaḥamaṃ kātukāmo evaṃ cintesi, kāraṇaṃ bhagavā cintesi, ahamettha ussāhaṃ janessāmi”ti purato pākaṭo ahoṣi. **Santettha bhikkhūti** idaṃ so mahābrahmā yathā nāma byatto sūdo yadeva ambilaggādīsu rasajātaṃ rañño rucati, taṃ abhisāṅkhārena sādutaraṃ katvā punadvase upanāmeti, evameva attano byattatāya bhagavatā āhaṭupamaṃyeva **evametaṃ bhagavāti**ādivacanehi abhisāṅkharitvā bhagavantaṃ yācanto bhikkhusaṅghassa anuggahakaraṇatthaṃ vadati. Tattha **abhinandatūti** “mama santikaṃ bhikkhusaṅgho āgacchatū”ti. Evamassa āgamaṃ sampiyāyamaṇo abhinandatu. **Abhivadatūti** āgatassa ca ovādānusāsaniṃ dadanto abhivadatu.

Paṭisallānāti ekībhāvā. **Iddhābhisaṅkhāraṃ abhisāṅkhāsīti** iddhiṃ akāsi. **Ekadvīhikāyāti** ekeko ceva dve dve ca hutvā. **Sārajjamānarūpāti** ottappamānasabhāvā bhāyamānā. Kasmā pana bhagavā tesam tathā upasaṅkamaṇāya iddhimakāsīti? Hitapatthanāya. Yadi hi te vaggavaggā hutvā āgaccheyyūṃ, “bhagavā bhikkhusaṅghaṃ paṇāmetvā araññaṃ pavīṭṭho ekadivasampi tattha vasitum nāsakkhi, vegeneva āgato”ti keḷimpi kareyyūṃ. Atha nesaṃ neva buddhagāraṃ paccupaṭṭhaheyya, na dhammadesanaṃ sampaṭicchitum samatthā bhavēyyūṃ. Sabhayānaṃ pana sasārajjānaṃ ekadvīhikāya āgacchantānaṃ buddhagāraṃveva paccupaṭṭhitam bhavissati, dhammadesanaṃca sampaṭicchitum sakkhissanti cintetvā tesam hitapatthanāya tathārūpaṃ iddhiṃ akāsi.

Nisīdīmsūti tesu hi sārajjamānarūpesu āgacchantesu eko bhikkhu “mamaṃyeva satthā oloketi, maṃyeva maññe niggaṇhitukāmo”ti saṅkamaṃ āgantvā vanditvā nisīdi, athañño athañnoti evaṃ pañcabhikkhusatāni nisīdīmsu. Evam nisinnaṃ pana bhikkhusaṅghaṃ sīdantare sannisinnaṃ mahāsamuddaṃ viya nivāte padīpaṃ viya ca niccalaṃ disvā satthā cintesi – “imesaṃ bhikkhūnaṃ kīdisī dhammadesanā vaṭṭatī”ti? Athassa etadahosi – “ime āhārahetu paṇāmitā, piṇḍiyālopadhammadesanāva nesaṃ sappāyā, taṃ dassetvā matthake tiparivaṭṭadesanaṃ desessāmi, desanāpariyosāne sabbe arahattaṃ pāpuṇissanti”ti. Atha nesaṃ taṃ dhammadesanaṃ desento **antamidaṃ, bhikkhavi**tiādīmāha.

Tattha **antanti** pacchimaṃ lāmakamaṃ. **Yadidaṃ piṇḍolyanti** yaṃ evaṃ piṇḍapariyesanena jīvikamaṃ kappentassa jīvitam. Ayaṃ panettha padattho – piṇḍāya ulatīti piṇḍolo, piṇḍolassa kammaṃ **piṇḍolyaṃ**, piṇḍapariyesanena nipphāditajīvitanti attho. **Abhisāpoti** akkoso. Kupitā hi manussā attano paccatthikaṃ “cīvaraṃ nivāsetvā kapālaṃ gahetvā piṇḍaṃ pariyesamaṇo carissatī”ti akkosanti. Atha vā pana “kim tuyhaṃ akātabbaṃ atthi, yo tvaṃ evaṃ balavā vīriyasampannopi hirottappaṃ pahāya kapaṇo viya piṇḍolo vicarasi pattapāṇī”ti? Evampi akkosantiyeva. **Taṅca kho etanti** evaṃ taṃ abhisāpaṃ samānampi piṇḍolyaṃ. **Kulaputtā upenti atthavasikāti** mama sāsane jātikulaputtā ca ācārakulaputtā ca atthavasikā kāraṇavasikā hutvā kāraṇavasamaṃ paṭicca upenti.

Rājābhinitiādīsu ye rañño santakaṃ khādītvā raññā bandhanaṅgāre bandhāpitā palāyitvā pabbajanti, te rājābhiniṭā nāma. Te hi raññā bandhanaṃ abhinītatā **rājābhiniṭā** nāma. Ye pana corehi aṭaviyaṃ gahetvā ekaccesu māriyamānesu ekacce “mayamaṃ sāmi tumhehi vissaṭṭhā gehamaṃ anajjhāvasitvā pabbajissāma, tattha yaṃ yaṃ buddhapūjādipuññaṃ karissāma, tato tumhākaṃ pattimaṃ dassāma”ti tehi vissaṭṭhā pabbajanti, te **corābhiniṭā** nāma. Tepi hi corehi māretabbaṃ abhinītāti corābhiniṭā nāma. Ye pana iṇaṃ gahetvā paṭidātuṃ asakkontā palāyitvā pabbajanti, te **iṇaṭṭā** nāma, iṇapīlītāti attho. Iṇaṭṭhātipi pāṭho, iṇe ṭhitāti attho. Ye rājacorachātakarogabhayānaṃ aññatarena abhibhūtā upaddutā pabbajanti, te **bhayaṭṭā** nāma, bhayaṭṭhātipi pāṭho, bhaye ṭhitāti attho. **Ājīvikāpakatāti** ājīvikāya upaddutā abhibhūtā, puttadāraṃ posetum asakkontāti attho. **Otiṇṇāmhāti** anto anupaviṭṭhā.

So ca hoti abhijjhālūti idam so kulaputto “dukkhassa antam karissāmī”tiādivasena cittaṃ uppādetvā pabbajito, aparabhāge, tam pabbajjam tathārūpaṃ kātuṃ na sakkoti, tam dassetuṃ vuttaṃ. Tatha **abhijjhālūti** parabanḍānaṃ abhijjhāyitā. **Tibbasārāgoti** bahalarāgo. **Byāpannacittoti** pūtibhāvena vipannacitto. **Paduṭṭhamanasaṅkappoti** tikhiṇasiṅgo viya goṇo duṭṭhacitto. **Muṭṭhassatīti** bhattanikkhittakāko viya naṭṭhassati, idha kataṃ ettha nassati. **Asampajānoti** nippañño. Khandhādiparicchedarahito. **Asamāhitoti** caṇḍasote baddhanāvā viya upacārappanābhāvena asaṅghito. **Vibbhantacittoti** bandhārulhamago viya santamano. **Pākatindriyoti** yathā gihī puttadhītarō olokento asaṃvutindriyo hoti, evaṃ asaṃvutindriyo.

Chavālātanti chavānaṃ daḍḍhaṭṭhāne alātaṃ. **Ubhatopadittaṃ majjhe gūthagatanti** pamāṇena aṭṭhaṅgulamattaṃ dvīsu ṭhānesu ādittaṃ majjhe gūthamakkhitaṃ. **Neva gāmeti** sace hi tam yuganaṅgalagopānasipakkhapāsakādīnaṃ atthāya upanetuṃ sakkā assa, gāme kaṭṭhatthaṃ phareyya. Sace khettaḷḷiyāṃ kaṭṭhattharamaṅcakādīnaṃ atthāya upanetuṃ sakkā, araṅṅhe kaṭṭhatthaṃ phareyya. Yasmā pana ubhayathāpi na sakkā, tasmā evaṃ vuttaṃ. **Gihibhogā ca parihīnoti** yo agāre vasantehi gihīti dāyaje bhājiyamāne bhogo laddhabbo assa, tato ca parihīno. **Sāmaññatthañcāti** ācariyupajjhāyānaṃ ovāde ṭhatvā pariyattipaṭivedhavasena pattabbaṃ sāmaññatthañca. Imañca pana upamaṃ satthā na dussīlassa vasena āhari, parisuddhasīlassa pana alasassa abhijjhādīhi dosehi upahatassa puggalassa imaṃ upamaṃ āhari.

Tayome, bhikkhaviti kasmā āradḍhaṃ? Imassa puggalassa chavālātasadisabhāvo neva mātāpitūhi kato, na ācariyupajjhāyehi, imehi pana pāpavitakkehi katoti dassanattaṃ āradḍhaṃ. **Animittaṃ vā samādhinti** vipassanāsamādhim. So hi niccanimittādīnaṃ samugghātanena animittoti vuccati. Ettha ca cattāro satipaṭṭhānā missakā, animittasamādhī pubbhāgo. Animittasamādhī vā missako, satipaṭṭhānā pubbhāgāti veditabbā.

Dvemā, bhikkhave, diṭṭhiyoti idam pana na kevalaṃ animittasamādhībhāvanā imesaṃyeva tiṇṇaṃ mahāvitakkānaṃ pahānāya saṃvattati, sassatucchedadiṭṭhīnampi pana samugghātaṃ karotīti dassanattaṃ vuttaṃ. **Na vajjavā assanti** niddoso bhaveyyaṃ. Sesamettha uttānameva. Iti bhagavā imasmimpi sutte desanaṃ tīhi bhavehi vinivattetvā arahattena kūṭaṃ gaṇhi. Desanāvasāne pañcasatā bhikkhū saha paṭisambhidāhi arahattaṃ pāpuṇiṃsūti. Aṭṭhamam.

9. Pāleyyasuttavaṇṇanā

81. Navame **cārikaṃ pakkāmīti** kosambikānaṃ bhikkhūnaṃ kalahakāle satthā ekadivasam dīghītissa kosalarāṅṅo vatthuṃ āharitvā “na hi verena verāni, sammantīdha kudācana”ntiādīhi (dha. pa. 5) gāthāhi ovadati. Tamdivasam tesam kalahaṃ karontānaṃyeva ratti vibhātā. Dutiyadivasepi bhagavā tameva vatthuṃ kathesi. Tamdivasampi tesam kalahaṃ karontānaṃyeva ratti vibhātā. Tatiyadivasepi bhagavā tameva vatthuṃ kathesi. Atha naṃ aññataro bhikkhu evamāha – “apposukko, bhante, bhagavā diṭṭhadhammasukhavihāraṃ anuyutto viharatu, mayametena bhaṇḍānena kalahena viggahena vivādena paññāyissāmā”ti. Satthā “pariyādiṇṇarūpacittā kho ime moghapurisā, na ime sakkā saññāpetu”nti cintetvā – “kiṃ mayhaṃ imehi, ekacāravāsam vasissāmī”ti? So pātova sarīrapaṭijjaggaṇaṃ katvā kosambiyam piṇḍāya caritvā kañcīpi anāmantetvā ekova adutiyo cārikaṃ pakkāmi.

Yasmiṃ, āvuso, samayeti idam thero yasmāssa ajja bhagavā ekena bhikkhunā saddhim pakkamissati, ajja dvīhi, ajja satena, ajja sahasena, ajja ekakovāti sabbo bhagavato cāro vidito pākaṭo paccakkho, tasmā āha.

Anupubbenāti gāmanigamaṭṭhāyā piṇḍāya caramāno ekacāravāsam tāva vasamānaṃ bhikkhuṃ passitukāmo hutvā bālakaloṇakāragāmaṃ agamāsi. Tatha bhaguttherassa sakalapacchābhattañceva tiyāmarattiñca ekacāravāse ānisaṃsaṃ kathetvā punadivase tena pacchāsamaṇena piṇḍāya caritvā tam tattheva nivattetvā “samaggavāsam vasamāne tayo kulaputte

passissāmī”ti pācīnavamsamigadāyaṃ agamāsi. Tesampi sakalapacchābhattañceva tiyāmarattiñca ekacāravāse ānisamsaṃ kathetvā te tattheva nivattetvā ekakova pālileyya nagarābhikumho pakkamitvā anupubbena pālileyyanagaraṃ sampatto. Tena vuttaṃ – “anupubbena cārikaṃ caramāno yena pālileyyakam, tadavasari”ti.

Bhaddasālamūleti pālileyvāsino bhagavato dānaṃ datvā pālileyyato avidūre rakkhitavanasaṇḍo nāma atthi, tattha bhagavato paṇṇasālaṃ katvā “ettha vasathā”ti paṭiññaṃ kāretvā vāsayaṃsu. Bhaddasālo pana tattheko manāpo laddhako sālarukkho. Bhagavā taṃ nagaraṃ upanissāya tasmim vanasaṇḍe paṇṇasālasamīpe tasmim rukkhamūle viharati. Tena vuttaṃ “bhaddasālamūle”ti.

Evam viharante panettha tathāgate aññataro hatthināgo hatthinīhi hatthipotakādīhi gocarabhūmititthogāhanādīsu ubbālho yūthe ukkaññhito “kiṃ me imehi hatthīhi”ti? Yūthaṃ pahāya manussapathaṃ gacchanto pālileyyakavanasaṇḍe bhagavantaṃ disvā ghaṭṭasahassena nibbāpitasantāpo viya nibbuto hutvā satthu santike aṭṭhāsi. So tato paṭṭhāya satthu vattapaṭivattaṃ karonto mukhadhovanam deti, nhānodakam āharati, dantakaṭṭham deti, pariveṇam sammajjati, araññato madhurāni phalāphalāni āharitvā satthuno deti. Satthā paribhogam karoti.

Ekadivasam satthā rattibhāgasamanantare caṅkamitvā pāsāṇaphalake nisīdi. Hatthīpi avidūre thāne aṭṭhāsi. Satthā pacchato oloketvā na kiñci addasa, evam purato ca ubhayapassesu ca. Athassa “sukham vatāham aññatra tehi bhaṇḍanakārahehi vasāmī”ti cittaṃ uppajji. Hatthinopi “mayā nāmitasākhā aññe khāntā natthi”tiādīni cintetvā – “sukham vata ekakova vasāmi, satthu vattaṃ kātuṃ labhāmi”ti cittaṃ uppajji. Satthā attano cittaṃ oloketvā – “mama tāva īdisam cittaṃ, kīdisam nu kho hatthissā”ti tassāpi tādisameva disvā “sameti no citta”nti imam udānam udānesi –

“Etaṃ nāgassa nāgena, īsādantassa hatthino;
Sameti cittaṃ cittena, yadeko ramatī vane”ti. (mahāva. 467);

Atha kho sambahulā bhikkhūti atha evam tathāgate tattha viharante pañcasatā disāsu vassamvutthā bhikkhū. **Yenāyasmā ānandoti** “satthā kira bhikkhusaṅgham paṇāmetvā araññaṃ pavittāho”ti attano dhammatāya satthu santikam gantum asakkontā yenāyasmā ānando, tenupasaṅkamimsu.

Anantarā āsavānam khayoti maggānantaram arahattaphalam. **Vicayasoti** vicayena, tesam tesam dhammānam sabhāvavicinanasamatthena ñāṇena paricchinditvāti attho. **Dhammoti** sāsanaḍhammo. Cattāro satipaṭṭhānātiādi ye ye koṭṭhāse paricchinditvā dhammo desito, tesam pakāsanatthāya vuttaṃ. **Samanupassanāti** diṭṭhisamanupassanā. **Saṅkhāro soti** diṭṭhisāṅkhāro so. **Tatojo so saṅkhāroti** tato taṇhāto so saṅkhāro jāto. Taṇhāsampayuttesu cittesupi catūsu cittesu esa jāyati. **Sāpi taṇhāti** sā diṭṭhisāṅkhārassa paccayabhūtā taṇhā. **Sāpi vedanāti** sā taṇhāya paccayabhūtā vedanā. **Sopi phassoti** so vedanāya paccayo avijjāsamphasso. **Sāpi avijjāti** sā phassasampayuttā avijjā.

No cassam, no ca me siyāti sace aham na bhaveyyam, mama parikkhāropi na bhaveyya. **Nābhavissam, na me bhavissatīti** sace pana āyatimpi aham na bhavissāmi, evam mama parikkhāropi na bhavissati. Etake thāne bhagavā tena bhikkhunā gahitagahitadiṭṭhim vissajjāpento āgato puggalajjhāsāyānāpi desanāvīlāsānāpi. **Tatojo so saṅkhāroti** taṇhāsampayuttacitte vicikicchāva natthi, katham vicikicchāsāṅkhāro taṇhāto jāyatīti? Appahīnattā. Yassa hi taṇhāya appahīnāya so uppajjati, taṃ sandhāyetaṃ vuttaṃ. Diṭṭhiyāpi eseva nayo labbhatiyeva catūsu hi cittuppādesu sampayuttadiṭṭhi nāma natthi. Yasmā pana taṇhāya appahīnattā sā uppajjati, tasmā taṃ sandhāya tatrāpi ayamatto yujjati. Iti imasmim sutte tevīsatiyā thānesu arahattaṃ pāpetvā vipassanā kathitā. Navamaṃ.

10. Puṇṇamasuttavaṇṇanā

82. Dasame **tadahuposatheti**ādi pavāraṇasutte vitthāritameva. **Kiñcideva desanti** kiñci kāraṇaṃ. **Sake āsane nisīditvā puccha yadākañkhasīti** kasmā evamāha? So kira bhikkhu pañcasatabhikkhuparivāro. Ācariye pana ʘhitake pucchante sace te bhikkhū nisīdanti, satthari gāraṃ kataṃ hoti, ācariye agāraṃ. Sace utʘhahanti, ācariye gāraṃ kataṃ hoti, satthari agāraṃ. Iti nesam cittaṃ anekaggaṃ bhavissati, desanaṃ sampaṭicchituṃ na sakkhissanti. Tasmim̄ pana nisīditvā pucchante tesam cittaṃ ekaggaṃ bhavissati, desanaṃ sampaṭicchituṃ sakkhissanti nītvā bhagavā evamāha. **Ime nu kho, bhanteti** ayaṃ thero pañcannaṃ bhikkhusatānaṃ ācariyo, pañcakkhandhamattampi nappajānātīti na vattabbo. Pañhaṃ pucchantena pana “ime pañcupādānakkhandhā, na aññe”ti evam̄ jānanta viya hutvā pucchituṃ na vaṭṭati, tasmā ajānanto viya pucchati. Tepi cassa antevāsikā “amhākaṃ ācariyo ‘ahaṃ jānāmi’ti na katheti, sabbaññutaññāna pana saddhim̄ saṃsanditvāva kathetī”ti sotabbaṃ saddhātabbaṃ maññissantiṭipi ajānanto viya pucchati.

Chandamūlakāti tañhāchandamūlakā. **Na kho bhikkhu taññeva upādānaṃ te pañcupādānakkhandhāti** yasmā chandarāgamattaṃ pañcakkhandhā na hoti, tasmā idaṃ vuttaṃ. Yasmā pana sahaṃjātato vā ārammaṇato vā khandhe muñcivā upādānaṃ natthi, tasmā **nāpi aññatra pañcahi upādānakkhandhehi upādānanti** vuttaṃ. Tañhāsampayuttasmiñhi citte vattamāne taṃcittasamuṭṭhānarūpaṃ rūpakkhando, ʘhapetvā taṃ tañhaṃ sesā arūpadhammā cattāro khandhāti sahaṃjātato khandhe muñcivā upādānaṃ natthi. Upādānaṃ pana rūpādīsū aññataraṃ ārammaṇaṃ katvā uppajjanato ārammaṇato pañcakkhandhe muñcivā upādānaṃ natthi. **Chandarāgavemattatāti** chandarāganānattaṃ. **Evam̄ kho bhikkhūti** evam̄ rūpārammaṇassa chandarāgassa vedanādīsū aññataraṃ ārammaṇaṃ akaraṇato siyā chandarāgavemattatā. **Khandhādhivacananti** khandhāti ayaṃ paññatti. Ayaṃ pana anusandhi na ghaṭiyati, kiñcāpi na ghaṭiyati, sānusandhikāva pucchā, sānusandhikaṃ vissajjanaṃ. Ayañhi thero tesam tesam bhikkhūnaṃ ajjhāsayena pucchati, satthāpi tesam tesam ajjhāsayeneva vissajjeti. Sesam̄ sabbattha uttānameva. Dasamaṃ.

Imassa ca pana vaggassa ekekasmim̄ sutte pañcasatā pañcasatā bhikkhū arahattaṃ pattāti.

Khajjanīyavaggo aṭṭhamo.

9. Theravaggo

1. Ānandasuttavañṇanā

83. Theravaggassa paṭhame **mantāniputtoti**, mantāniyā nāma brāhmaṇiyā putto. **Upādāyāti** āgamma ārabha sandhāya paṭicca. **Asmīti hotīti** asmīti evam̄ pavattaṃ tañhāmānadiṭṭhipapañcattayaṃ hoti. **Daharoti** taruṇo. **Yuvāti** yobbanena samannāgato. **Mañḍanakajātikoti** mañḍanakasabhāvo mañḍanakasīlo. **Mukhanimittanti** mukhapaṭibimbaṃ. Tañhi parisuddhaṃ ādāsamañḍalaṃ paṭicca paññāyati. Kim̄ pana taṃ olokayato sakamukhaṃ paññāyati, paramukhanti? Yadi sakam̄ bhaveyya, paramukhaṃ hutvā paññāyeyya, atha parassa bhaveyya, vañṇādīhi asadisam̄ hutvā paññāyeyya. Tasmā na taṃ attano, na parassa, ādāsaṃ pana nissāya nibhāsarūpaṃ nāma taṃ paññāyatīti vadanti. Atha yaṃ udake paññāyati, taṃ kena kāraṇenāti? Mahābhūtānaṃ visuddhatāya. **Dhammo me abhisamītoti** mayā ñāṇena catusaccadhammo abhisamāgato, sotāpannosmi jātoti kathesi. Paṭhamaṃ.

2. Tissasuttavañṇanā

84. Dutiye **madhurakajāto viyāti** sañjātagarubhāvo viya akammañño. **Disāpi meti** ayaṃ puratthimā ayaṃ dakkhiṇāti evam̄ disāpi mayhaṃ na pakkhāyanti, na pākāṭa hotīti vadati. **Dhammāpi maṃ na paṭibhanti**ti pariyattidhammāpi mayhaṃ na upaṭṭhahanti, uggahitaṃ sajjhāyitaṃ na dissatīti vadati. **Vicikicchāti** no mahāvicikicchā. Na hi tassa “sāsaṇaṃ niyyānikaṃ nu kho, na nu kho”ti vimati uppajjati. Evam̄ panassa hoti “sakkhissāmi nu kho samañadhammaṃ kātuṃ, udāhu pattacīvaradhāraṇamattameva karissāmi”ti.

Kāmānametaṃ adhivacananti yathā hi ninnam pallalam oloketassa dassanarāmaṇeyyakamattam atthi, yo panettha otarati, taṃ caṇḍamīnākulatāya ākaḍḍhitvā anayabyasanam pāpeti, evamevaṃ pañcasu kāmagaṇesu cakkhudvārādīnam ārammaṇe rāmaṇeyyakamattam atthi, yo panettha gedham āpajjati, taṃ ākaḍḍhitvā nirayādīsu eva pakkhipanti. Appassādā hi kāmā bahudukkhā bahupāyāsā, ādīnavo ettha bhīyyoti imaṃ atthavasam paṭicca “kāmānametaṃ adhivacana”nti vuttam. **Ahamanuggahenāti** aham dhammāmisānuggahehi anuggaṇhāmi. **Abhinandīti** sampaṭicchi. Na kevalaṅca abhinandi, imaṃ pana satthu santikā assāsam labhitvā ghaṭento vāyamanto katipāhena arahatte patiṭṭhāsi. Dutiyam.

3. Yamakasuttavaṇṇanā

85. Tatiye **diṭṭhigatanti** sace hissa evam bhaveyya “saṅkhārā uppajjanti ceva nirujjhanti ca, saṅkhārappavattameva appavattam hoti”ti, diṭṭhigatam nāma na bhaveyya, sāsānavacarikam ṇāṇam bhaveyya. Yasmā panassa “satto ucchijjati vinassatī”ti ahosi, tasmā diṭṭhigatam nāma jātam. **Thāmasā parāmāsāti** diṭṭhithāmena ceva diṭṭhiparāmāsena ca.

Yenāyasmā sārīputtoti yathā nāma paccante kupite taṃ vūpasametum asakkontā rājapurisā senāpatissa vā rañño vā santikam gacchanti, evam diṭṭhigatavasena tasmim there kupite taṃ vūpasametum asakkontā te bhikkhū yena dhammarājassa dhammasenāpati āyasmā sārīputto, tenupasaṅkamimsu. **Evambyākhoti** tesam bhikkhūnam santike viya therassa sammukhā paggayha vuttam asakkonto olambantena hadayena “evambyākho”ti āha. **Tam kiṃ maññasi, āvusoti?** Idam thero tassa vacanam sutvā, “nāyam attano laddhiyam dosam passati, dhammadesanāya assa taṃ pākātam karissāmī”ti cintevā tiparivaṭṭam desanam desetum ārabhi.

Tam kiṃ maññasi, āvuso yamaka, rūpaṃ tathāgatoti idam kasmā āraddham? Anuyogavattam dāpanattham. Tiparivaṭṭadesanāvāsānasmiñhi thero sotāpanno jāto. Atha nam anuyogavattam dāpetum “tam kiṃ maññasi”tiādīmāha? **Tathāgatoti** satto. Rūpaṃ vedanā saññā saṅkhārā viññānanti ime pañcakkhandhe sampiṇḍetvā “tathāgato”ti samanupassasīti pucchati. **Ettha ca te, āvusoti** idam therassa anuyoge bhummam. Idam vuttam hoti – ettha ca te ettake ṭhāne diṭṭheva dhamme saccato thirato satte anupalabbhiyamāneti. **Sace tam, āvusoti** idametam aññam byākarāpetukāmo pucchati. **Yam dukkham tam niruddhanti** yam dukkham, tadeva niruddham, añño satto nirujjhanako nāma natthi, evam byākareyyanti attho.

Etasseva atthassāti etassa paṭhamamaggassa. **Bhiyyosomattāya ṇāṇāyāti** atirekappamāṇassa ṇāṇassa atthāya, sahavipassanakānam upari ca tiṇṇam maggānam āvibhāvattahāyāti attho. **Ārakkhasampannoti** antoārakkhena ceva bahiārakkhena ca samannāgato. **Ayogakkhemakāmoti** catūhi yogehi khemabhāvam anicchanto. **Pasayhāti** pasayhitvā abhibhavitvā. **Anupakhajjāti** anupavisitvā.

Pubbuṭṭhāyītiādīsu dūratova āgacchantam disvā āsanato paṭhamataram vuṭṭhātīti **pubbuṭṭhāyī**. Tassa āsanam datvā tasmim nisinne pacchā nipatati nisīdatīti, **pacchānipātī**. Pātova vuṭṭhāya “ettakā kasitum gacchatha, ettakā vapitu”nti vā sabbapaṭhamam vuṭṭhātīti **pubbuṭṭhāyī**. Sāyam sabbesu attano attano vasanaṭṭhānam gatesu gehassa samantato ārakkham samvidhāya dvārāni thaketvā sabbapacchā nipajjanatopi **pacchānipātī**. “Kiṃ karomi, ayyaputta? Kiṃ karomi ayyaputtā”ti? Mukham olokeno kimkāram paṭisāvetīti **kimkārapaṭissāvī**. Manāpam caratīti **manāpacārī**. Piyam vadatīti **piyavādī**. **Mittatopi nam saddaheyyāti** mitto me ayanti saddaheyya. **Vissāsam āpajjeyyāti** ekato pānabhojanādīm karonto vissāsiko bhaveyya. **Samvissatthoti** suṭṭhu vissattho.

Evameva khoti ettha idam opammasaṃsandanam – bālagahapatiputto viya hi vaṭṭasannissitakāle assutavā puthujjano, vadhakapaccāmitto viya abaladubbala pañcakkhandhā, vadhakapaccāmittassa “bālagahapatiputtam upaṭṭhahissāmī”ti upagatakālo viya paṭisandhikkhaṇe upagatā pañcakkhandhā, tassa hi “na me ayam sahāyo, vadhakapaccatthiko aya”nti ajānanakālo viya vaṭṭanissitaputhujjanassa pañcakkhandhe “na ime mayha”nti agahetvā “mama rūpaṃ, mama vedanā, mama saññā, mama

sankhārā, mama viññāṇa”nti gahitakālo, vadhakapaccatthikassa “mitto me aya”nti gahetvā sakkārakaraṇakālo viya “mama ime”ti gahetvā pañcannaṃ khandhānaṃ nhāpanabhojanādīhi sakkārakaraṇakālo, “ativissattho me aya”nti ñatvā sakkāraṃ karontasseva asinā sīsacchindanaṃ viya vissatthassa bālaputhujanassa tikhiṇehi bhijjamānehi khandhehi jīvitapariyādānaṃ veditabbaṃ.

Upetīti upagacchati. **Upādiyatīti** gaṇhāti. **Adhiṭṭhātīti** adhiṭṭhāti. **Attā meti** ayaṃ me attāti. **Sutavā ca kho, āvuso, ariyasāvako**ti yathā pana paṇḍito gahapatiputto evaṃ upagataṃ paccatthikaṃ “paccatthiko me aya”nti ñatvā appamatto tāni tāni kammāni kāretvā anattaṃ pariharati, atthaṃ pāpuṇāti, evaṃ sutavā ariyasāvakopi “na rūpaṃ attato samanupassati”tiādīnā nayena pañcakkhandhe ahanti vā mamanti vā agahetvā, “paccatthikā me ete”ti ñatvā rūpasattakaarūpasattakādivasena vipassanāya yojetvāva tatonidānaṃ dukkhaṃ parivajjetvā aggaphalaṃ arahattaṃ pāpuṇāti. Sesametta uttānameva. Tatiyaṃ.

4. Anurādhasuttavaṇṇanā

86. Catutthe **araññakuṭikāyanti** tasseva vihārassa paccante paṇṇasālāyaṃ. **Taṃ tathāgato** tumhākaṃ satthā tathāgato taṃ sattaṃ tathāgataṃ. **Aññatra imehīti** tassa kira evaṃ ahosi “ime sāsanaṃ paṭipakkhā paṭivilomā, yathā ime bhaṇanti, na evaṃ satthā paññāpessati, aññathā paññāpessati”ti. Tasmā evamāha. **Evaṃ vutte te aññatitthiyāti** evaṃ therena attano ca paresaṇca samayaṃ ajānitvā vutte ekadesena sāsanasamayaṃ jānantā therassa vāde dosaṃ dātukāmā te aññatitthiyā paribbājakā āyasmantaṃ anurādhaṃ etadavocumaṃ.

Taṃ kiṃ maññasi anurādhāti satthā tassa kathaṃ sutvā cintesi – “ayaṃ bhikkhu attano laddhiyaṃ dosaṃ na jānāti, kāraṇaṃ panesa yuttayogo, dhammadesanāya eva naṃ jānāpessāmī”ti tiparivaṭṭaṃ desanaṃ desetukāmo “taṃ kiṃ maññasi, anurādha”tiādīmaṃ. Athassa tāya desanāya arahattappattassa anuyogavattaṃ āropento **taṃ kiṃ maññasi, anurādha? Rūpaṃ tathāgato**tiādīmaṃ. **Dukkhañceva paññapemi, dukkhassa ca nirodhanti** vaṭṭadukkhañceva vaṭṭadukkhasa ca nirodhaṃ nibbānaṃ paññapemi. Dukkhaṃ vā vacanena dukkhasaccaṃ gahitaṃ. Tasmim� gahite samudayasaccaṃ gahitameva hoti, tassa mūlattā. Nirodhanti vacanena nirodhasaccaṃ gahitaṃ. Tasmim� gahite maggasaccaṃ gahitameva hoti tassa upāyattā. Iti pubbe cāhaṃ, anurādha, etaraha ca catusaccameva paññapemīti dasseti. Evaṃ imasmim� sutte vaṭṭavivaṭṭameva kathitaṃ. Catutthaṃ.

5. Vakkalisuttavaṇṇanā

87. Pañcame **kumbhakāranivesaneti** kumbhakārasālāyaṃ. Thero kira vutthavasso pavāretvā bhagavantaṃ dassanāya āgacchati. Tassa nagaramajjhe mahāābādho uppajji, pādā na vahanti. Atha naṃ mañcakasivikāya kumbhakārasālāya āharimsu. Sā ca sālā tesam� kammaṃsālā, na nivesanasālā. Taṃ sandhāya vuttaṃ “kumbhakāranivesane viharati”ti. **Bāḷhagilānoti** adhimattagilāno. **Samadhosi**ti samantato adhosi, calanākārena apacitim� dassesi. Vattaṃ kiretaṃ bāḷhagilānenapi buddhataraṃ disvā uṭṭhānākārena apaciti dassetabbā. Tena pana “mā cali mā cali”ti vattabbo. **Santimāni āsanānīti** buddhakālasmiñhi ekassapi bhikkhuno vasanaṭṭhāne “sace satthā āgacchissati, idha nisīdissati”ti āsanaṃ paññattameva hoti antamaso phalakamattampi paṇṇasanthāramattampi. **Khamaṇīyaṃ yāpanīyanti** kacci dukkhaṃ khamitum� iriyāpathaṃ vā yāpetum� sakkāti pucchati. **Paṭikkamantīti** nivattanti. **Abhikkamantīti** adhigacchanti. **Paṭikkamosānanti** paṭikkamo etāsaṃ. **Sīlato na upavadatīti** sīlaṃ ārabha sīlabhāvena na upavadati. **Cirapaṭikāhanti** cirapaṭiko ahaṃ, cirato paṭṭhāya ahanti attho. **Pūtikāyenāti** attano suvaṇṇavaṇṇampi kāyaṃ bhagavā dhuvaṃ paggharaṇaṭṭhena evamāha. **Yo kho, vakkali, dhammanti** idha bhagavā “dhammakāyo kho, mahārāja, tathāgato”ti vuttaṃ dhammakāyataṃ dasseti. Navavidho hi lokuttaradhammo tathāgatassa kāyo nāma.

Idāni therassa tiparivaṭṭadhammadesanaṃ ārabhanto **taṃ kiṃ maññasīti**ādīmaṃ. **Kāḷasilāti** kāḷasilāvihāro. **Vimokkhāyāti** maggavimokkhatthāya. **Suvimutto vimuccissatīti** arahattaphalavimuttiyaṃ

vimutto hutvā vimuccissati. Tā kira devatā “yena nīhārena iminā vipassanā āradhā, anantarāyena arahattaṃ pāpuṇissatī” ti ñatvā evamāhaṃsu. **Apāpakanti** alāmakam. **Satthaṃ āharetī** thero kira adhimāniko ahosi. So samādhivipassanāhi vikkhambhitānaṃ kilesānaṃ samudācāraṃ apassanto “khīṇāsavomhī” ti saññī hutvā “kiṃ me iminā dukkhena jīvitena? Satthaṃ āharitvā marissāmī” ti tikhiṇena satthena kaṇṭhanālaṃ chindi. Athassa dukkhā vedanā uppajji. So tasmiṃ khaṇe attano puthujjanabhāvaṃ ñatvā avissatṭhakammaṭṭhānattā sīghaṃ mūlakammaṭṭhānaṃ ādāya sammasanto arahattaṃ pāpuṇitvāva kālamakāsi. Paccavekkhaṇā panassa ca kathaṃ ahosīti? Khīṇāsavassa ekūnavāsati paccavekkhaṇā na sabbāva avassaṃ laddhabbā, tikhiṇenāpi pana asinā sīse chijjante ekaṃ dve ñāṇāni avassaṃ uppajjanti.

Vivattakkhandhanti parivattakkhandhaṃ. **Semānanti** sayamānaṃ. Thero kira uttānako nipanno satthaṃ āhari. Tassa sarīraṃ yathāṭhitameva ahosi. Sīsaṃ pana dakkhiṇapassena parivattitvā aṭṭhāsi. Ariyasāvakaḥ hi yebhuyyena dakkhiṇapasseneva kālaṃ karonti. Tenassa sarīraṃ yathāṭhitameva ahosi. Sīsaṃ pana dakkhiṇapassena parivattitvā ṭhitaṃ. Taṃ sandhāya vivattakkhandho nāma jātotipi vadanti. **Dhūmayitattanti** dhūmayanabhāvaṃ. **Timirāyitattanti** timirāyanabhāvaṃ. Dhūmavalāhakaṃ viya timiravalāhakaṃ viya cāti attho. Pañcamam.

6. Assajisuttavaṇṇanā

88. Chaṭṭhe **kassapakārāmeti** kassapasetṭhinā kārite ārame. **Kāyasaṅkhāreti** assāsapassāse. So hi te catutthajjhānena passambhitvā passambhitvā vihāsi. **Evam hotīti** idāni taṃ samādhim appaṭilabhantassa evaṃ hoti. **No cassāhaṃ parihāyāmīti** kacci nu kho ahaṃ sāsanaṃ na parihāyāmi? Tassa kira ābādhadosena appitappitā samāpatti parihāyi, tasmā evaṃ cintesi. **Samādhisārakā samādhisāmaññāti** samādhimyeva sārāṇa sāmāññaṇa maññanti. Mayhaṃ pana sāsane na etaṃ sāraṃ, vipassanāmaggaṃ sāraṃ. So tvaṃ samādhito parihāyanto kasmā cintesi “sāsanaṃ parihāyāmi” ti. Evaṃ therā assāsetvā idāniṃsa tiparivaṭṭaṃ dhammadesanaṃ ārabhanto **taṃ kiṃ maññasīti** adimāha. Athassa tiparivaṭṭadesanāvasāne arahattaṃ pattassa satatavihāraṃ dassento **so sukhaṃ ce vedanaṃ vedayātīti** adimāha. Tattha **anabhinanditāti pajānātīti** sukhavedanāya tāva abhinandanā hotu, dukkhavedanāya kathaṃ hotīti? Dukkhaṃ patvā sukhaṃ pattheti, yadaggena sukhaṃ pattheti, tadaggena dukkhaṃ patthetiyeva. Sukhavipariṇāmena hi dukkhaṃ āgatameva hotīti evaṃ dukkhe abhinandanā veditabbā. Sesam pubbe vuttanayamevāti. Chaṭṭhaṃ.

7. Khemakasuttavaṇṇanā

89. Sattame **attaniyanti** attano parikkhārajātaṃ. **Asmīti adhigatanti** asmīti evaṃ pavattā taṇhāmānā adhigatā. **Sandhāvanikāyāti** punappunaṃ gamaṇāgamaṇena. **Upasaṅkamīti** badarikāramato gāvutamattaṃ ghoṣitārāmaṃ agamāsi. Dāsakatthero pana catukkhattuṃ gamaṇāgamaṇena taṃdivasaṃ dviyojanaṃ addhānaṃ āhiṇḍi. Kasmā pana taṃ therā paṇiṃsu? Vissutassa dhammakathikassa santikā dhammaṃ suṇissāmāti. Sayam kasmā na gatāti? Therassa vasanaṭṭhānaṃ araṇṇaṃ sambādhaṃ, tattha saṭṭhimattānaṃ therānaṃ ṭhātuṃ vā nisīdituṃ vā okāso natthīti na gatā. “Idhāgantvā amhākaṃ dhammaṃ kathetū” tipī kasmā pana na paṇiṃsūti? Therassa ābādhikattā. Atha kasmā punappunaṃ paṇiṃsūti? Sayameva ñatvā amhākaṃ kathetuṃ āgamissatīti. Theropi tesam ajjhāsayam ñatvāva agamāsīti.

Na khvāhaṃ, āvuso, rūpanti yo hi rūpameva asmīti vadati, tena itare cattāro khandhā paccakkhātā hontī. Yo aññatra rūpā vadati, tena rūpaṃ paccakkhātaṃ hoti. Vedanādīsupi eseva nayo. Therassa pana samūhato pañcasupi khandhesu asmīti adhigato, tasmā evamāha. **Hotevāti** hotiyeva. **Anusahagatoti** sukhumo. **Ūseti** chārikākhāre. **Khāreti** ūsakhāre. **Sammadditvāti** temetvā khādetvā.

Evameva khoti ettha idaṃ opammaṃ sandanaṃ – kiliṭṭhavatthaṃ viya hi puthujjanassa cittācāro, tayo khārā viya tisso anupassanā, tīhi khārehi dhotavatthaṃ viya desanāya madditvā ṭhito anāgāmino

cittācāro, anusahagato ūsādigandho viya arahattamaggavajjhā kilesā, gandhakaraṇḍako viya arahattamaggañāṇaṃ gandhakaraṇḍakaṃ āgamma anusahagatānaṃ ūsagandhādīnaṃ samugghāto viya arahattamaggena sabbakilesakkhayo, gandhaparibhāvitavatthaṃ nivāsetvā chaṇḍadivase antaravīthiyaṃ sugandhagandhino vicaraṇaṃ viya khīṇāsavassa sīlagandhādīhi dasa disā upavāyantassa yathākāmacāro.

Ācikkhitunti kathetuṃ. **Desetunti** pakāsetuṃ. **Paññāpetunti** jānāpetuṃ. **Paṭṭhapetunti** patiṭṭhāpetuṃ. **Vivaritunti** vivaṭaṃ kātuṃ. **Vibhajitunti** suvibhattaṃ kātuṃ. **Uttānikātunti** uttānakaṃ kātuṃ. **Saṭṭhimattānaṃ therānanti** te kira therena kathitakathitaṭṭhāne vipassanaṃ paṭṭhapetvā uparūpari sammasantā desanāpariyosāne arahattaṃ pāpuṇṇisu. Theropi aññena nīhārena akathetvā vipassanāsahagatacitteneva kathesi. Tasmā sopi arahattaṃ pāpuṇṇi. Tena vuttaṃ – “saṭṭhimattānaṃ therānaṃ bhikkhūnaṃ anupādāya āsavehi cittāni vimuccṇṇisu āyasmato khemakassa cā”ti. Sattamaṃ.

8. Channasuttavaṇṇanā

90. Aṭṭhame āyasmā channoti tathāgatena saddhiṃ ekadivase jāto mahābhinnikkhamaṇadivase saddhiṃ nikkhamitvā puna aparabhāge satthu santike pabbajitvā “amhākaṃ buddho amhākaṃ dhammo”ti evaṃ makkhī ceva paḷāsī ca hutvā sabrahmacārīnaṃ pharusavācāya saṅghaṭṭanaṃ karonto thero. **Avāpuraṇaṃ ādāyāti** kuñcikaṃ gahetvā. **Vihārena vihāraṃ upasaṅkamitvāti** ekaṃ vihāraṃ pavisitvā tato aññaṃ, tato aññanti evaṃ tena tena vihārena taṃ taṃ vihāraṃ upasaṅkamitvā. **Etadavoca ovaḍantu manti** kasmā evaṃ mahantena ussāhena tattha tattha gantvā etaṃ avocāti? Uppannaṣaṃvegatāya. Tassa hi parinibbute satthari dhammasaṅgāhakattherehi pesito āyasmā ānando kosambiṃ gantvā brahmadāṇḍaṃ adāsī. So dinne brahmadāṇḍe sañjātapariḷāho visaññībhūto patitvā puna saññaṃ labhitvā vuṭṭhāya ekassa bhikkhuno santikaṃ gato, so tena saddhiṃ kiñci na kathesi. Aññaṣsa santikaṃ agamāsī, sopi na kathesīti evaṃ sakalavīhāraṃ vicarivā nibbinno pattacīvaraṃ ādāya bārāṇasiṃ gantvā uppannaṣaṃvego tattha tattha gantvā evaṃ avoca.

Sabbe saṅkhārā aniccāti sabbe tebhūmakasaṅkhārā aniccā. **Sabbe dhammā anattāti** sabbe catubhūmakadhammā anattā. Iti sabbepi te bhikkhū therāṃ ovaḍantā aniccalakkhaṇaṃ anattalakkhaṇanti dveva lakkhaṇāni kathetvā dukkhalakkhaṇaṃ na kathayṇṇsu. Kasmā? Evaṃ kira nesaṃ ahosi – “ayaṃ bhikkhu vādī dukkhalakkhaṇe paññāpiyamāne rūpaṃ dukkhaṃ...pe... viññāṇaṃ dukkhaṃ, maggo dukkho, phalaṃ dukkhanti ‘tumhe dukkhappattā bhikkhū nāma’ti gahaṇaṃ gaṇheyya, yathā gahaṇaṃ gahetuṃ na sakkoti, evaṃ niddosamevassa katvā kathessāmā”ti dveva lakkhaṇāni kathayṇṇsu.

Paritassanā upādānaṃ uppajjati paritassanā ca upādānaṃca uppajjati. **Paccudāvattati mānaṣaṃ, atha ko carahi me attāti** yadī rūpādīsū ekopi anattā, atha ko nāma me attāti evaṃ paṭṇivattati “mayhaṃ mānaṣa”nti. Ayaṃ kira thero paccaye apariggahetvā vipassanaṃ paṭṭhapesi, sāssa dubbalavipassanā attagāhaṃ pariyādātuṃ asakkuṇṇantī saṅkhāresu suññato upaṭṭhahantesu “ucchijjissāmi vinassissāmi”ti ucchedadiṭṭhiyā ceva paritassanāya ca paccayo ahosi. So ca attānaṃ pāpate papatantaṃ viya disvā, “paritassanā upādānaṃ uppajjati, paccudāvattati mānaṣaṃ, atha ko carahi me attā”ti āha. **Na kho panevaṃ dhammaṃ passato hotīti** catusaccadhammaṃ passantassa evaṃ na hoti. **Tāvātikā vissatṭhīti** tattako vissāso. **Sammukhā metanti** thero tassa vacanaṃ sutvā, “kīdisā nu kho imassa dhammadesanā sappāyā”ti? Cinto tepitakaṃ buddhavacanaṃ vicinitvā kaccānasuttaṃ (saṃ. ni. 2.15) addasa “idaṃ āditova diṭṭhiviniveṭhanaṃ katvā majjhe buddhabalaṃ dīpetvā saṅhasukhumapaccayākāraṃ pakāsayamānaṃ gataṃ, idamassa desessāmi”ti dassento “sammukhā meta”ntiādimāha. Aṭṭhamaṃ.

9-10. Rāhulasuttādivaṇṇanā

91-92. Navamadasamāni rāhulasamṃyutte (saṃ. ni. 2.188) vuttatthāneva. Kevalaṃ hetāni ayaṃ theravaggoti katvā idhāgatānti. Navamadasamāni.

Theravaggo navamo.

10. Pupphavaggo

1. Nadīsuttavaṇṇanā

93. Pupphavaggassa paṭhame **pabbateyyā**ti pabbate pavattā. **Ohārinī**ti sote patitapatitāni tiṇapaṇṇakaṭṭhādīni heṭṭhāhārinī. **Dūraṅgamā**ti nikkhantaṭṭhānato paṭṭhāya catupaṇcayojanasatagāminī. **Sīghasotā**ti caṇḍasotā. **Kāsāti**ādīni sabbāni tiṇajātāni. **Rukkhā**ti eraṇḍādayo dubbalarukkhā. **Te naṃ ajjholambeyyunti** te tīre jātāpi onamitvā aggehi udakaṃ phusantehi adhiolambeyyūṃ, upari lambeyyunti attho. **Palujjeyyunti** samūlamattikāya saddhiṃ sīse pateyyūṃ. So tehi ajjhotthaṭṭo vālukamattikodakehi mukhaṃ pavisantehi mahāvināsaṃ pāpuṇeyya.

Evameva khoti ettha sote patitapuriso viya vaṭṭasannissito bālaputhujjano daṭṭhabbo, ubhatotīre kāsādayo viya dubbalapaṇcakkhandhā, “ime gahitāpi maṃ tāretuṃ na sakkhissantī”ti tassa purisassa ajānitvā gahaṇaṃ viya ime khandhā “na mayhaṃ sahāyā”ti bālaputhujjanassa ajānitvā catūhi gāhehi gahaṇaṃ, gahitagahitānaṃ palujjanattā purisassa byasanappatti viya catūhi gāhehi gahitānaṃ khandhānaṃ vipariṇāme bālaputhujjanassa sokādibyanappatti veditabbā. Paṭhamam.

2. Pupphasuttavaṇṇanā

94. Dutīye **vivadati**ti “aniccaṃ dukkhaṃ anattā asubha”nti yathāsabhāvena vadantena saddhiṃ “niccaṃ sukhaṃ attā subha”nti vadanto vivadati. **Lokadhammoti** khandhapaṇcakaṃ. Tañhi lujjanasabhāvattā lokadhammoti vuccati. **Kinti karomī**ti kathaṃ karomi? Mayhañhi paṭipattikathanameva bhāro, paṭipattipūraṇaṃ pana kulaputtānaṃ bhāroti dasseti. Imasmiṃ sutte tayo lokā kathitā. “Nāhaṃ, bhikkhave, lokenā”ti ettha hi sattaloko kathito, “atthi, bhikkhave, loke lokadhammo”ti ettha saṅkhāraloko, “tathāgato loke jāto loke saṃvaḍḍho”ti ettha okāsaloko kathito. Dutiyam.

3. Pheṇapiṇḍūpamasuttavaṇṇanā

95. Tatiye **gaṅgāya nadiyā tīre**ti ayujjhapuravāsino aparimāṇabhikkhuparivāraṃ cārikaṃ caramānaṃ tathāgataṃ attano nagaraṃ sampattaṃ disvā ekasmiṃ gaṅgāya nivattanaṭṭhāne mahāvanasaṇḍamaṇḍitappadese satthu vihāraṃ katvā adamsu. Bhagavā tattha viharati. Taṃ sandhāya vuttaṃ “gaṅgāya nadiyā tīre”ti. **Tatra kho bhagavā bhikkhū āmantesī**ti tasmim vihāre vasanto bhagavā sāyanhasamayaṃ gandhakuṭito nikkhamitvā gaṅgātīre paññattavarabuddhāsane nisinno gaṅgāya nadiyā āgacchantaṃ mahantaṃ pheṇapiṇḍaṃ disvā, “mama sāsane paṇcakkhandhanissitaṃ ekaṃ dhammaṃ kathessāmī”ti cintetvā parivāretvā nisinne bhikkhū āmantesi.

Mahantaṃ pheṇapiṇḍanti utṭhānuṭṭhāne badarapakkappamāṇato paṭṭhāya anusotāgamanena anupubbena pavaḍḍhitvā pabbatakūṭamattaṃ jātaṃ, yattha udakasappādayo anekapāṇayo nivasanti, evarūpaṃ mahantaṃ pheṇapiṇḍaṃ. **Āvaheyyā**ti āhareyya. So panāyaṃ pheṇapiṇḍo utṭhitatṭhānepi bhijjati, thokaṃ gantvāpi, ekadviyojanādivasena dūraṃ gantvāpi, antarā pana abhijjantopi mahāsamuddaṃ patvā avassameva bhijjati. **Nijjhāyeyyā**ti olokeyya. **Yoniso upaparikkheyyā**ti kāraṇena upaparikkheyya. **Kiñhi siyā, bhikkhave, pheṇapiṇḍe sāro**ti, bhikkhave, pheṇapiṇḍamhi sāro nāma kiṃ bhaveyya? Vilīyitvā viddhamseyyeva.

Evameva khoti yathā pheṇapiṇḍo nissāro, evaṃ rūpampi niccasārarduvasāraattasāravirahena nissārameva. Yathā ca so “iminā pattaṃ vā thālakam vā karissāmī”ti gahetuṃ na sakkā, gahitopi tamattaṃ na sādheti, bhijjati eva, evaṃ rūpampi niccanti vā dhuvanti vā ahanti vā mamanti vā gahetuṃ na sakkā, gahitampi na tathā tiṭṭhati, aniccaṃ dukkhaṃ anattā asubhaññeva hotīti evaṃ

phenapiṇḍasadisameva hoti. Yathā vā pana phenapiṇḍo chiddāvachiddo anekasandhighaṭṭito bahūnaṃ udakasappādīnaṃ pāṇānaṃ āvāso, evaṃ rūpampi chiddāvachiddaṃ anekasandhighaṭṭitaṃ, kulavasenevettha asīti kimikulāni vasanti, tadeva tesam sūtiḡharampi vaccaḡuṭīpi gilānasālāpi susānampi, na te aññattha gantvā gabbhavuṭṭhānādīni karonti, evampi phenapiṇḍasadisam.

Yathā ca phenapiṇḍo ādito badarapakkamatto hutvā anupubbena pabbatakūṭamattopi hoti, evaṃ rūpampi ādito kalalamattaṃ hutvā anupubbena byāmamattampi gomahiṃsahatthiādīnaṃ vasena pabbatakūṭādīnaṃ hoti macchakacchapādīnaṃ vasena anekayojanasatapamānampi, evampi phenapiṇḍasadisam. Yathā ca phenapiṇḍo uṭṭhitamattopi bhijjati, thokaṃ gantvāpi, dūraṃ gantvāpi, samuddaṃ patvā pana avassameva bhijjati, evamevaṃ rūpampi kalalabhāvepi bhijjati abbudādibhāvepi, antarā pana abhijjamānampi vassasatāyukānaṃ vassasataṃ patvā avassameva bhijjati, maraṇamukhe cuṇṇavicuṇṇaṃ hoti, evampi phenapiṇḍasadisam.

Kiñhi siyā, bhikkhave, vedanāya sārōtiādīsu vedanādīnaṃ pubbuḷādīhi evaṃ sadisatā veditabbā. Yathā hi pubbuḷo asāro evaṃ vedanāpi. Yathā ca so abalo agayhūpago, na sakkā taṃ gahetvā phalakaṃ vā āsanaṃ vā kātuṃ, gahitopi bhijjateva, evaṃ vedanāpi abalā agayhūpagā, na sakkā niccāti vā dhuvāti vā gahetuṃ, gahitāpi na tathā tiṭṭhati, evaṃ agayhūpagatāyapi vedanā pubbuḷasadisā. Yathā pana tasmim tasmim udakabindumhi pubbuḷo uppajjati ceva bhijjati ca, na ciraṭṭhitiko hoti, evaṃ vedanāpi uppajjati ceva bhijjati ca, na ciraṭṭhitikā hoti. Ekaccharakkhaṇe koṭisatasahassasaṅkhā uppajjivā nirujjhati. Yathā ca pubbuḷo udakatalaṃ, udakabinduṃ, udakajallaṃ, saṅkaḍḍhitvā puṭaṃ katvā gahaṇavātañcāti cattāri kāraṇāni paṭicca uppajjati, evaṃ vedanāpi vatthum ārammaṇaṃ kilesajallaṃ phassasaṅghaṭṭanañcāti cattāri kāraṇāni paṭicca uppajjati. Evampi vedanā pubbuḷasadisā.

Saññāpi asārakaṭṭhena marīcisadisā. Tathā agayhūpagaṭṭhena. Na hi sakkā taṃ gahetvā pivituṃ vā nhāyituṃ vā bhājanaṃ vā pūretuṃ. Apica yathā marīci vipphandati, sañjātūmivegā viya khāyati, evaṃ nīlasaññādibhedā saññāpi nīlādiānubhavanatthāya phandati vipphandati. Yathā ca marīci mahājanaṃ vippalambheti “puṇṇavāpi viya puṇṇanadī viya dissati”ti vadāpeti, evaṃ saññāpi vippalambheti, “idaṃ nīlakaṃ subhaṃ sukhaṃ nicca”nti vadāpeti. Pītakādīsupi eseva nayo. Evam saññā vippalambhanenāpi marīcisadisā.

Akukkukajātanti anto asaṅjātaghanadaṇḍakaṃ. Saṅkhārāpi asārakaṭṭhena kadalikkhandhasadisā, tathā agayhūpagaṭṭhena. Yatheva hi kadalikkhandhato kiñci gahetvā na sakkā gopānasiādīnaṃ atthāya upanetuṃ, upanītampi na tathā hoti, evaṃ saṅkhārāpi na sakkā niccādivasena gahetuṃ, gahitāpi na tathā honti. Yathā ca kadalikkhandho bahupattavaṭṭisamodhāno hoti, evaṃ saṅkhārakkhandho bahudhammasamodhāno. Yathā ca kadalikkhandho nānālakkhaṇo. Aññoyeva hi bāhirāya pattavaṭṭiyā vaṇṇo, añño tato abbhantaraabbhantarānaṃ, evameva saṅkhārakkhandhepi aññadeva phassassa lakkhaṇaṃ, aññā cetanādīnaṃ, samodhānetvā pana saṅkhārakkhandhova vuccatīti evampi saṅkhārakkhandho kadalikkhandhasadiso.

Cakkhumā purisoti maṃsacakkhunā ceva paññācakkhunā cāti dvīhi cakkhūhi cakkhumā. Maṃsacakkhumpi hissa parisuddhaṃ vaṭṭati apagatapaṭalapiḷakaṃ, paññācakkhumpi asārabhāvadassanasamatthaṃ. Viññānampi asārakaṭṭhena māyāsadisam, tathā agayhūpagaṭṭhena. Yathā ca māyā ittarā lahupaccupaṭṭhānā, evaṃ viññānaṃ. Tañhi tatopi ittaratarañceva lahupaccupaṭṭhānatarāñca. Teneva hi cittena puriso āgato viya gato viya ṭhito viya nisinno viya hoti. Aññadeva ca āgamanakāle cittaṃ, aññaṃ gamanakālādīsu. Evampi viññānaṃ māyāsadisam. Māyā ca mahājanaṃ vañceti, yaṃkiñcideva “idaṃ suvaṇṇaṃ rajataṃ muttā”ti gāhāpeti, viññānampi mahājanaṃ vañceti. Teneva hi cittena āgacchantaṃ viya gacchantaṃ viya ṭhitaṃ viya nisinnaṃ viya katvā gāhāpeti. Aññadeva ca āgamane cittaṃ, aññaṃ gamanādīsu. Evampi viññānaṃ māyāsadisam.

Bhūripaññenāti saṅhapaññena ceva vipulavitthatapaññena ca. **Āyūti** jīvitindriyaṃ. **Usmāti** kammajatejodhātu. **Parabhattanti** nānāvīdhānaṃ kimigaṇādīnaṃ bhattaṃ hutvā. **Etādisāyaṃ santānoti**

etādisī ayam pavenī matakassa yāva susānā ghaṭṭiyatīti. **Māyāyaṃ bālālāpīnīti** yvāyaṃ viññāpakhandho nāma, ayam bālamahājanalapāpanikamāyā nāma. **Vadhakoti** dvīhi kāraṇehi ayam khandhasaṅkhāto vadhako aññamaññaghātanenapi, khandhesu sati vadho paññāyatītipi. Ekā hi pathavīdhātu bhijjamānā sesadhātuyo gahetvāva bhijjati, tathā āpodhātuādayo. Rūpakhandho ca bhijjamāno arūpakhandhe gahetvāva bhijjati, tathā arūpakhandhesu vedanādayo saññādiike. Cattāropi cete vatthurūpanti evaṃ aññamaññavadhanenettha vadhakatā veditabbā. Khandhesu pana sati vadhabandhanacchedādīni sambhavanti, evaṃ etesu sati vadhabhāvatopi vadhakatā veditabbā. **Sabbasaṃyoganti** sabbam dasavidhampi saṃyojanam. **Accutam padanti** nibbānam. Tatiyam.

4-6. Gomayapiṇḍasuttādivaṇṇanā

96-98. Catutthe **sassatisamanti** sinerumahāpathavīcandimasūriyādīhi sassatīhi samam. **Parittam gomayapiṇḍanti** appamattakam madhukapupphappamāṇam gomayakhaṇḍam. Kuto panānenetaṃ laddhanti. Paribhaṇḍakaraṇatthāya ābhatato gahitanti eke. Atthassa pana viññāpanattham iddhiyā abhisāṅkharitvā hatthārulham katanti veditabbanti. **Attabhāvapaṭilābhoti** paṭiladdhaattabhāvo. **Na yidaṃ brahmacariyavāso paññāyethāti** ayam maggabrahmacariyavāso nāma na paññāyeyya. Maggo hi tebhūmakasaṅkhāre vivaṭṭento uppajjati. Yadi ca ettako attabhāvo nicco bhavēyya, maggo uppajjitvāpi saṅkhāravatṭam vivaṭṭetum na sakkuṇeyyāti brahmacariyavāso na paññāyetha.

Idāni sace koci saṅkhāro nicco bhavēyya, mayā mahāsudassanarājakāle anubhūtā sampatti niccā bhavēyya, sāpi ca aniccāti tam dassetum **bhūtapubbāham bhikkhu rājā aho**sintiādīmāha. Tattha **kusāvātīrājadhānippamukhānīti** kusāvātīrājadhānī tesam nagarānam pamukhā, sabbasetṭhāti attho. **Sāramayānīti** rattacandanasāramayāni. Upadhānam pana sabbesam suttamayameva. **Goṇakatthātānīti** caturāṅgulādhikalomena kāḷakojavena atthātāni, yaṃ mahāpitṭhiyakojavoti vadanti. **Paṭakatthātānīti** ubhatolomena uṇṇāmayena setakambalena atthātāni. **Paṭalikatthātānīti** ghanapupphena uṇṇāmayaattharaṇena atthātāni. **Kadalimigapavarapaccattharaṇānīti** kadalimigacammamayena uttamapaccattharaṇena atthātāni. Tam kira paccattharaṇam setavatthassa upari kadalimigacammaṃ attharivā sibbetvā karonti. **Sauttaracchādānīti** saha uttaracchadena, upari baddhena rattavitānena saddhinti attho. **Ubhatolohitakūpadhānīti** sīsūpadhānañca pādūpadhānañcāti pallānkānam ubhatolohitakūpadhānāni. **Vejayantarathappamukhānīti** ettha vejayanto nāma tassa rañño ratho, yassa cakkānam indanīlamanimayā nābhi, sattaratanamayā arā, pavālamayā nemi, rajatamayo akkho, indanīlamanimayam upakkharam, rajatamayam kubbaram. So tesam rathānam pamukho aggo. **Dukūlasandānānīti** dukūlasantharāni. **Kaṃsūpadhāraṇānīti** rajatamayadohabhājanāni. **Vatthakoṭisahassānīti** yathārucitam paribhuñjissatīti nhatvā ṭhitakāle upanītavattāhāneva sandhāyetam vuttam. **Bhattābhīhāroti** abhiharitabbabhattam.

Yamahaṃ tena samayena ajjhāvasāmīti yattha vasāmi, tam ekaññeva nagaram hoti, avasesesu puttadhītādayo ceva dāsamanussā ca vaṣṣu. Pāsādakūṭāgārādīsipi eseva nayo. Pallānkādīsū ekamyeva sayam paribhuñjati, sesā puttādīnam paribhogā hontī. Itthīsū ekāva paccupaṭṭhāti, sesā parivāramattā hontī. **Velāmikāti** khattiyassa vā brāhmaṇiyā, brāhmaṇassa vā khattiyāniyā kucchimim jātā. **Paridahāmīti** ekamyeva dussayugam nivāsemi, sesāni parivāretvā vicarantānam asītisahassādhikānam soḷasannam purisasatasahassānam hontīti dasseti. **Bhuñjāmīti** paramappamāṇena nāḷikodanamattam bhuñjāmi, sesam parivāretvā vicarantānam cattālīsahasassādhikānam aṭṭhannam purisasatasahassānam hotīti dasseti. Ekathālipāko hi dasannam jānānam pahoti.

Iti imam mahāsudassanakāle sampattim dassetvā idāni tassā aniccataṃ dassento **iti kho bhikkhūti**ādīmāha. Tattha **vipariṇatāti** pakatijahanena nibbutapadīpo viya apaṇṇattikabhāvam gatā. **Evaṃ aniccā kho bhikkhu saṅkhārāti** evaṃ hutvāabhāvattṭhena aniccā. Ettāvataḥ bhagavā yathā nāma puriso satahatthubbedhe campakarukkhe nisseṇim bandhitvā abhiruhitvā campakapuppham ādāya nisseṇim muñcanto otareyya, evamevaṃ nisseṇim bandhanto viya anekavassakoṭisatasahassubbedham mahāsudassanasampattim āruya sampattimatthake ṭhitam aniccalakkhaṇam ādāya nisseṇim muñcanto

viya otiṇṇo. **Evam addhuvāti** evaṃ udakapubbuḷādayo viya dhuvabhāvarahitā. **Evam anassāsikāti** evaṃ supinake pītapānīyaṃ viya anulittacandanam viya ca assāsavirahitā. Iti imasmiṃ sutte aniccalakkhaṇaṃ kathitaṃ. Pañcame sabbaṃ vuttanayameva. Chaṭṭhaṃ tathā bujjanakassa ajjhāsayena vuttaṃ. Catutthādīni.

7. Gaddulabaddhasuttavaṇṇanā

99. Sattame yaṃ mahāsamuddoti yasmiṃ samaye pañcame sūriye uṭṭhite mahāsamuddo ussussati. **Dukkassa antakiriyanti** cattāri saccāni appaṭivijjhivā avijjāya nivutānaṃyeva sataṃ vaṭṭadukkassa antakiriyam paricchedaṃ na vadāmi. **Sā gaddulabaddhoti** gaddulena baddhasunakho. **Khīleti** pathaviyaṃ ākoṭite mahākhiḷe. **Thambheti** nikhaṇivā ṭhapite thambhe. **Evameva khoti** ettha sunakho viya vaṭṭanissito bālo, gaddulo viya diṭṭhi, thambho viya sakkāyo, gaddularajjuyā thambhe upanibaddhasunakassa thambhānuparivattanaṃ viya diṭṭhitaṇhāya sakkāye baddhassa puthujjanassa sakkāyānuparivattanaṃ veditabbaṃ. Sattamaṃ.

8. Dutiyagaddulabaddhasuttavaṇṇanā

100. Aṭṭhame tasmāti yasmā diṭṭhigaddulanissitāya taṇhārajjuyā sakkāyathambhe upanibaddho vaṭṭanissito bālaputhujjano sabbiriyāpathesu khandhapañcakaṃ nissāyeva pavattati, yasmā vā dīgharattamidaṃ cittaṃ saṃkiliṭṭhaṃ rāgena dosena mohena, tasmā. **Cittasaṃkilesāti** sunhātāpi hi sattā cittasaṃkileseneva saṃkilissanti, malaggahitasarīrāpi cittassa vodānattā visujjhanti. Tenāhu porāṇā –

“Rūpamhi saṃkiliṭṭhamhi, saṃkilissanti māṇavā;
Rūpe suddhe visujjhanti, anakkhātaṃ mahesinā.

“Cittamhi saṃkiliṭṭhamhi, saṃkilissanti māṇavā;
Citte suddhe visujjhanti, iti vuttaṃ mahesinā”ti.

Caraṇaṃ nāma cittanti vicaraṇacittaṃ. Saṅkhā nāma brāhmaṇapāsaṇḍikā honti, te paṭakoṭṭhakaṃ katvā tattha nānappakārā sugatiduggativasena sampattivipattiyo lekhāpetvā, “imaṃ kammaṃ katvā idaṃ paṭilabhati, idaṃ katvā ida”nti dassentā taṃ cittaṃ gahetvā vicaranti. **Citteneva cittitanti** cittakārena cintetvā katattā cittaena cintitaṃ nāma. **Cittaññeva cittataranti** tassa cittassa upāyapariyesanacittaṃ tatopi cittataraṃ. **Tiracchānagatā pāṇā citteneva cittitāti** kammacitteneva cittitā. Taṃ pana kammacittaṃ ime vaṭṭakatittirādayo “evaṃ cittā bhavissāmā”ti āyūhantā nāma natthi. Kammaṃ pana yoniṃ upaneti, yonimūlako tesam cittabhāvo. Yoniupagatā hi sattā taṃtaṃyonikehi sadisacittāva honti. Iti yonisiddho cittabhāvo, kammāsiddhā yonīti veditabbā.

Apica cittaṃ nāmetaṃ sahaṇṇaṃ sahaṇṇatadhammacittatāya bhūmicittatāya vatthucittatāya dvāracittatāya ārammaṇacittatāya kammanānattamūlakānaṃ liṅganānattasaññānānattavohāranānattādīnaṃ anekavidhānaṃ cittānaṃ nipphādanatāyapi tiracchānagatacittato cittatameva veditabbaṃ.

Rajakoti vatthesu raṅgena rūpasamuṭṭhāpanako. So pana acheke amanāpaṃ rūpaṃ karoti, cheke manāpaṃ dassanīyaṃ, evameva puthujjano akusalacittena vā ñāṇavippayuttakusalena vā cakkhusampadādivirahitaṃ virūpaṃ samuṭṭhāpeti, ñāṇasampayuttakusalena cakkhusampadādisampannaṃ abhirūpaṃ. Aṭṭhamaṃ.

9. Vāsijaṭasuttavaṇṇanā

101. Navame seyyathāpi, bhikkhave, kukkuṭiyā aṇḍānīti imā kaṇhapakkhasukkapakkhavasena dve upamā vuttā. Tāsu kaṇhapakkhaupamā atthassa asādhikā, itarā sādhiḱāti. Sukkapakkhaupamāya

evaṃ attho veditabbo – **seyyathā**ti opammatthe nipāto, **apī**ti sambhāvanatthe. Ubhayenāpi seyyathā nāma, bhikkhavi dasseti. **Kukkuṭiyā aṇḍāni aṭṭha vā dasa vā dasa vā dvādasa vā**ti ettha pana kiñcāpi kukkuṭiyā vuttappakārato ūnādhikānīpi aṇḍāni honti, vacanasiliṭṭhatāya pana evaṃ vuttaṃ. Evañhi loke siliṭṭhavacanāṃ hoti. **Tānassūti** tāni assu, tāni bhavēyyunti attho. **Kukkuṭiyā sammā adhisayitānī**ti tāya ca janettiyā kukkuṭiyā pakkhe pasāretvā tesāṃ upari sayantiyā sammā adhisayitāni. **Sammā pariseditānī**ti kālena kālaṃ utuṃ gaṇhāpentiyā suṭṭhu samantato seditāni usmīkatāni. **Sammā paribhāvitānī**ti kālena kālaṃ suṭṭhu samantato bhāvitāni, kukkuṭagandhaṃ gāhāpitānīti attho. **Kiñcāpi tassā kukkuṭiyā**ti tassā kukkuṭiyā iminā tividhakiriyākaraṇena appamādaṃ katvā kiñcāpi na evaṃ icchā upajjeyya. **Atha kho bhabbāva teti** atha kho te kukkuṭapotakā vuttanayena sotthinā abhinibbhijjituṃ bhabbāva. Te hi yasmā tāya kukkuṭiyā evaṃ tīhākārehi tāni aṇḍāni paripāliyamānāni na pūṭīni honti, yo nesāṃ allasineho, sopi pariyaḍānaṃ gacchati, kapālaṃ tanukaṃ hoti, pādanakhasikhā ca mukhatuṇḍakaṇca kharaṃ hoti, sayampi pariṇāmaṃ gacchanti, kapālassa tanuttā bahi āloko anto paññāyati, tasmā “ciraṃ vata mayaṃ saṅkuṭitahatthapādā sambādhe sayimhā, ayaṅca bahi āloko dissati, ettha dāni no sukhavihāro bhavissati”ti nikkhamitukāmā hutvā kapālaṃ pādena paharanti, gīvaṃ pasārenti, tato taṃ kapālaṃ dvedhā bhijjati. Atha te pakkhe vidhunantā taṃkhaṇānurūpaṃ viravantā nikkhamantiyeva, nikkhamitvā ca gāmakkhetaṃ upasobhayamānā vicaranti.

Evameva khoti idaṃ opammasampannāpādanāṃ. Taṃ evaṃ atthena saṃsanditvā veditabbaṃ – tassā kukkuṭiyā aṇḍesu tividhakiriyākaraṇāṃ viya hi imassa bhikkhuno bhāvanuyogaṃ anuyuttakālo, kukkuṭiyā tividhakiriyāsampādanena aṇḍānaṃ apūtibhāvo viya bhāvanānuyogamanuyuttassa bhikkhuno tividhānupassanāsampādanena vipassanāñāṇassa aparihāni, tassā tividhakiriyākaraṇena allasinehāpariyaḍānaṃ viya tassa bhikkhuno tividhānupassanāsampādanena bhavattayānugatanikantisinehāpariyaḍānaṃ, aṇḍakapālānaṃ tanubhāvo viya tassa bhikkhuno avijjaṇḍakosassa tanubhāvo, kukkuṭapotakānaṃ pādanakhasikhamukhatuṇḍakānaṃ thaddhakharabhāvo viya bhikkhuno vipassanāñāṇassa tikkhakharavippasanna sūrabhāvo, kukkuṭapotakānaṃ pariṇāmakālo viya bhikkhuno vipassanāñāṇassa pariṇāmakālo vaḍḍhitakālo gabbhaggahaṇakālo, kukkuṭapotakānaṃ pādanakhasikhāya vā mukhatuṇḍakena vā aṇḍakosāṃ padāletvā pakkhe papphoṭetvā sotthinā abhinibbhidākālo viya tassa bhikkhuno vipassanāñāṇagabbhaṃ gaṇhāpetvā vicarantassa tajjātikaṃ utusappāyaṃ vā bhojanasappāyaṃ vā puggalasappāyaṃ vā dhammassavanasappāyaṃ vā labhitvā ekāsane nisinnasseva vipassanaṃ vaḍḍhentassa anupubbādhigatena arahattamaggena avijjaṇḍakosāṃ padāletvā abhiññāpakkhe papphoṭetvā sotthinā arahattapattakālo veditabbo. Yathā pana kukkuṭapotakānaṃ pariṇātabhāvaṃ ñatvā mātāpi aṇḍakosāṃ bhindati, evaṃ tathārūpassa bhikkhuno ñāṇāparipākaṃ ñatvā satthāpi –

“Ucchinda sinehamattano, kumudaṃ sārādikaṃva pāṇinā;
Santimaggameva brūhaya, nibbānaṃ sugatena desita”nti. (dha. pa. 285) –

Ādinā nayena obhāsaṃ pharitvā gāthāya avijjaṇḍakosāṃ paharati. So gāthāpariyosāne avijjaṇḍakosāṃ bhinditvā arahattaṃ pāpuṇāti. Tato paṭṭhāya yathā te kukkuṭapotakā gāmakkhetaṃ upasobhayamānā tattha vicaranti, evaṃ ayampi mahākhīṇāsavo nibbānārammaṇaṃ phalasaṃpattim appētvā saṅghārāmaṃ upasobhayamāno vicarati.

Palagaṇḍassāti vaḍḍhakissa. So hi olambakasaṅkhātaṃ palaṃ dhāretvā dārūnaṃ gaṇḍaṃ haratīti palagaṇḍoti vuccati. **Vāsijaṭeti** vāsidaṇḍakassa gahaṇaṭṭhāne. **Ettakaṃ vata me ajja āsavānaṃ khīṇanti** pabbajitassa hi pabbajjāsāṅkhepena uddesena paripucchāya yoniso manasikārena vattapaṭipattiyā ca niccakālaṃ āsavā khīyanti. Evaṃ khīyamānānaṃ pana tesāṃ “ettakaṃ ajja khīṇaṃ, ettakaṃ hiyyo”ti evamassa ñāṇaṃ na hotīti attho. Imāya upamāya vipassanāyānisamso dīpito. **Hemantikenāti** hemantasamayena. **Paṭippassambhantī**ti thirabhāvena pariḥāyanti.

Evameva khoti ettha mahāsamuddo viya sāsanaṃ daṭṭhabbaṃ, nāvā viya yogāvacaro, nāvāya mahāsamudde pariyaḍānaṃ viya imassa bhikkhuno ūnapaṇcavassakāle ācariyupajjhāyānaṃ santi

vicaraṇaṃ, nāvāya mahāsamuddodakena khajjamānānaṃ bandhanānaṃ tanubhāvo viya bhikkhuno pabbajjāsaṅkhepena uddesaparipucchādīhi ceva saṃyojanānaṃ tanubhāvo, nāvāya thale ukkhittakālo viya bhikkhuno nissayamuccakassa kammaṭṭhānaṃ gahetvā araṅṅe vasanakālo, divā vātātapena saṃsussanaṃ viya vipassanāñāṇena taṅhāsnehasaṃsussanaṃ, rattiṃ himodakena temanaṃ viya kammaṭṭhānaṃ nissāya uppannena pītipāmojjena cittatemaṃ, rattindivaṃ vātātapena ceva himodakena ca parisukkhaparitintānaṃ bandhanānaṃ dubbalabhāvo viya ekadivasaṃ utusappāyādīni laddhā vipassanāñāṇapītipāmojjehi saṃyojanānaṃ bhiyyosomattāya dubbalabhāvo, pāvussakamegho viya arahattamaggañāṇaṃ, meghavuṭṭhiudakena nāvāya bandhe pūtibhāvo viya āradhavi-passakassa rūpasattakādivasena vipassanaṃ vaḍḍhentassa okkhāyamāne pakkhāyamāne kammaṭṭhāne ekadivasaṃ utusappāyādīni laddhā ekapallaṅkena nisinnassa arahattaphalādhigamo, pūtibandhanāvāya kañci kālaṃ ṭhānaṃ viya khīṇasaṃyojanaṃ arahato mahājanaṃ anuggaṇhantassa yāvātāyukaṃ ṭhānaṃ, pūtibandhanāvāya anupubbena bhijjivā apaṇṇattikabhāvūpagamo viya khīṇāsavassa upādiṇṇakkhandhabhedena anupādisesāya nibbānadhātuyā parinibbutassa apaṇṇattikabhāvūpagamoti imāya upamāya saṃyojanānaṃ dubbalatā dīpitā. Navamaṃ.

10. Aniccasaññāsuttavaṇṇanā

102. Dasame **aniccasaññā**ti aniccaṃ aniccanti bhāventassa uppannasaññā. **Pariyādiyatī** khepayati. **Sabbaṃ asmimānanti** navavidhaṃ asmimānaṃ. **Mūlasantānakānī**ti santānetvā ṭhitamūlāni. Mahānaṅgalaṃ viya hi aniccasaññā, khuddānukhuddakāni mūlasantānakāni viya kilesā, yathā kassako kasanto naṅgalena tāni padāleti, evaṃ yogī aniccasaññaṃ bhāvento aniccasaññāñāṇena kilese padāletīti idamettha opammasaṃsandanaṃ.

Odhunātīti heṭṭhā dhunāti. **Niddhunātī**ti papphoṭeti. **Nicchoṭeti**ti papphoṭetvā chaḍḍeti. Idhāpi pabbajāni viya kilesā, lāyanaṃ nicchoṭanaṃ viya aniccasaññāñāṇanti iminā atthena upamā saṃsandetabbā.

Vaṇṭacchinnāyāti tiṅhena khurappena vaṇṭacchinnāya. **Tadanvayāni bhavantī**ti taṃ ambapiṇḍiṃ anugacchanti, tassā patamānāya ambāni bhūmiyaṃ patanti. Idhāpi ambapiṇḍi viya kilesā, tiṅhakhurappo viya aniccasaññā, yathā khurappena chinnāya ambapiṇḍiyā sabbāni ambāni bhūmiyaṃ patanti, evaṃ aniccasaññāñāṇena kilesānaṃ mūlabhūtāya avijjāya chinnāya sabbakilesā samugghātāṃ gacchantīti, idaṃ opammasaṃsandanaṃ.

Kūṭaṅgamāti kūṭaṃ gacchanti. **Kūṭaninnā**ti kūṭaṃ pavisanabhāvena kūṭe ninnā. **Kūṭasamosaraṇā**ti kūṭe samosaritvā ṭhitā. Idhāpi kūṭaṃ viya aniccasaññā, gopānasiyo viya catubhūmakakusaladhammā, yathā sabbagopānasīnaṃ kūṭaṃ aggamaṃ, evaṃ kusadaladhammaṃ aniccasaññā aggā. Nanu ca aniccasaññā lokiyā, sā lokiyakusalānaṃ tāva aggamaṃ hotu, lokuttarānaṃ kathaṃ agganti? Tesampi paṭilābhakaraṇatthena agganti veditabbā. Iminā upāyena sabbāsu upamāsu opammasaṃsandanaṃ veditabbāṃ. Purimāhi panettha tīhi aniccasaññāya kiccaṃ, pacchimāhi balanti. Dasamaṃ.

Pupphavaggo dasamo.

Majjhimaṇṇāsako samatto.

11. Antavaggo

1. Antasuttavaṇṇanā

103. Antavaggaṃ paṭhame **antā**ti koṭṭhāsā. Idaṃ suttaṃ catusaccavasena pañcakkhandhe yojetvā **antoti** vacanena bujjanakānaṃ ajjhāsayasena vuttaṃ. Paṭhamaṃ.

2-3. Dukkhasuttādivaṇṇanā

104-105. Dutiyampi pañcakkhandhe catusaccavasena yojetvā **dukkhanti** bujghanakānaṃ ajjhāsayena kathitaṃ. Tatiyampi tatheva **sakkāyoti** bujghanakānaṃ ajjhāsayena kathitaṃ. Dutiyatatiyāni.

4. Pariññeyyasuttavaṇṇanā

106. Catutthe **pariññeyyeti** pariṇānitabbe samatikkamitabbe. **Pariññanti** samatikkamaṃ. **Pariññātāvinti** tāya pariññāya pariṇānitvā samatikkamitvā ṭhitaṃ. **Rāgakkhayoti**ādīhi nibbānaṃ dassitaṃ. Catutthaṃ.

5-10. Samaṇasuttādivaṇṇanā

107-112. Pañcamādīsū catūsū cattāri saccāni kathitāni. Navamadasamesu kilesappahānanti. Pañcamādīni.

Antavaggo ekādasamo.

12. Dhammakathikavaggo

1-2. Avijjāsuttādivaṇṇanā

113-114. Dhammakathikavaggassa paṭhame **ettāvatā ca avijjāgato hotīti** yāvatā imāya catūsū saccesu aññāṇabhūtāya avijjāya samannāgato, ettāvatā avijjāgato hotīti attho. Dutiyepi eseva nayo. Paṭhamadutiyāni.

3. Dhammakathikasuttavaṇṇanā

115. Tatiye paṭhamena dhammakathiko, dutiyena sekhabhūmi, tatiyena asekkhabhūmīti evaṃ dhammakathikaṃ pucchitena visesetvā dve bhūmiyo kathitā. Tatiyaṃ.

4. Dutiyadharmakathikasuttavaṇṇanā

116. Catutthe tissannampi pucchānaṃ tīṇi vissajjanāni kathitāni. Catutthaṃ.

5-9. Bandhanasuttādivaṇṇanā

117-121. Pañcame **atīradassīti** tīraṃ vuccati vaṭṭaṃ, taṃ na passatī. **Apāradassīti** pāraṃ vuccati nibbānaṃ, taṃ na passatī. **Baddhoti** kilesabandhanena baddho hutvā jīyati ca mīyati ca asmā lokā paraṃ lokaṃ gacchatīti. Imasmiṃ sutte vaṭṭadukkaṃ kathitanti. Chaṭṭhādīni uttānatthāneva. Pañcamādīni.

10. Silavantasuttavaṇṇanā

122. Dasame **aniccatoti**ādīsū hutvā abhāvākārena **aniccato**, paṭipīḷanākārena **dukkhato**, ābādhaṭṭhena **rogato**, antodosatṭhena **gaṇḍato**, tesam tesam gaṇḍānaṃ paccayabhāvena vā khaṇanaṭṭhena vā **sallato** dukkhaṭṭhena **aghatto**, visabhāgamahābhūtasamuṭṭhānaābādhapaccayaṭṭhena **ābādhato**, asakaṭṭhena **parato**, palujjanaṭṭhena **palokato**, sattasuññataṭṭhena **suññato**, attābhāvena **anattato**. Evamettha “aniccato palokato”ti dvīhi padehi aniccamanasikāro, “suññato anattato”ti dvīhi anattamanasikāro, sesehi dukkhamanasikāro vuttoti veditabbo. Sesamettha uttānameva. Dasamaṃ.

11. Sutavantasuttavaṇṇanā

123. Tathā ekādasame. Dasamasmiñhi “sīlavatā”ti catupārisuddhisīlaṃ vuttaṃ, idha **sutavatāti** kammaṭṭhānasuttaṃ idameva nānākaraṇaṃ. Ekādasamaṃ.

12-13. Kappasuttādivaṇṇanā

124-125. Dvādasamaterasamāni rāhulovādasadisānevāti. Dvādasamaterasamāni.

Dhammakathikavaggo dvādasamo.

13. Avijjāvaggo

1-10. Samudayaḍhammasuttādivaṇṇanā

126-135. Avijjāvaggo uttānatthova. Imasmiñhi vagge sabbasuttesu catusaccameva kathitaṃ.

Avijjāvaggo terasamo.

14. Kukkuḷavaggo

1-13. Kukkuḷasuttādivaṇṇanā

136-149. Kukkuḷavaggassa paṭhame **kukkuḷanti** santattaṃ ādittaṃ chārikarāsiṃ viya mahāpariḷāhaṃ. Imasmiṃ sutte dukkhalakkhaṇaṃ kathitaṃ, sesesu aniccalakkhaṇādīni. Sabbāni cetāni pāṭiyekkaṃ puggalajjhāsayena kathitānti.

Kukkuḷavaggo cuddasamo.

15. Diṭṭhivaggo

1-9. Ajjhattasuttādivaṇṇanā

150-158. Diṭṭhivaggassa paṭhame **kiṃ upādāyāti** kiṃ paṭicca. Dutiye **kiṃ abhinivissāti** kiṃ abhinivisitvā, paccayaṃ katvāti attho. Tatiyādīsu **diṭṭhīti**ādīni puggalajjhāsayena vuttāni. Paṭhamādīni.

10. Ānandasuttavaṇṇanā

159. Dasame **upasaṅkamīti** aññe bhikkhū pañcakkhandhakammaṭṭhānaṃ kathāpetvā yuñjivā ghaṭetvā arahattaṃ patvā satthu santike aññaṃ byākaronte disvā “ahampi pañcakkhandhakammaṭṭhānaṃ kathāpetvā yuñjanto ghaṭento, arahattaṃ patvā aññaṃ byākarissāmī”ti cintetvā upasaṅkami. Satthā pana attano dharamānakāle therassa uparimaggattayavajjhānaṃ kilesānaṃ pahānaṃ apassantopi “imassa cittaṃ gaṇhissāmī”ti kathesi. Tassāpi ekaṃ dve vāre manasi katvāva buddhupaṭṭhānavelā jātāti gantabbaṃ hoti. Itissa cittaṃ sampahaṃsamāno vimutti-paripācanīyadhammova so kammaṭṭhānānuyogo jātoti. Dasamaṃ.

Diṭṭhivaggo pannarasamo.

Uparipaṇṇāsako samatto.

Khandhasaṃyuttavaṇṇanā niṭṭhitā.

2. Rādhasaṃyuttam

1. Paṭhamavaggo

1. Mārasuttavaṇṇanā

160. Rādhasaṃyuttassa paṭhame **māro vā assāti** maraṇam vā bhaveyya. **Māretā vāti** māretabbo vā. **Yo vā pana miyatīti** yo vā pana marati. **Nibbidatthanti** nibbidāññattham. **Nibbānatthāti** phalavimutti nāmesā anupādānibbānatthāti attho. **Accayāsīti** atikkantosi. **Nibbānogadhanti** nibbāne patiṭṭhitam. Idaṃ maggabrahmacariyam nāma nibbānabbhantare vussati, na nibbānam atikkamitvāti attho. **Nibbānapariyosānanti** nibbānam assa pariyoṣānam, nipphatti niṭṭhāti attho. Paṭhamam.

2-10. Sattasuttādivaṇṇanā

161-169. Dutīye **satto sattoti** laggapucchā. **Tatra satto tatra visattoti** tatra laggo tatra vilaggo. **Paṃsvāgārakehīti** paṃsugharakehi. **Keḷāyantīti** kiḷanti. **Dhanāyantīti** dhanam viya maññanti. **Mamāyantīti** “mama idaṃ, mama ida”nti mamattam karonti, aññassa phusitumpi na denti. **Vikīḷaniyam karontīti** “niṭṭhitā kiḷā”ti te bhindamānā kiḷāvigamaṃ karonti. Tatiye **bhavanettīti** bhavarajju. Catuttham uttānameva. Pañcamādisu catūsu cattāri saccāni kathitāni, dvīsu kilesappahānanti. Dutiyādīni.

Paṭhamo vaggo.

2. Dutiyavaggo

1-12. Mārasuttādivaṇṇanā

170-181. Dutiyavaggassa paṭhame **māro, māroti** maraṇam pucchati. Yasmā pana rūpādivinimuttam maraṇam nāma natthi, tenassa bhagavā **rūpaṃ kho, rādha, māroti**ādīmāha. Dutīye **māradhammoti** maraṇadhammo. Etenupāyena sabbattha attho veditabboti.

Dutīyo vaggo.

3-4. Āyācanavaggādi

1-11. Mārādisuttaekādasakavaṇṇanā

182-205. Tato param uttānatthameva. Ayañhi rādhatthero paṭibhāniyatthero nāma. Tathāgatassa imaṃ theram disvā sukhumaṃ kāraṇam upaṭṭhāti. Tenassa bhagavā nānāyehi dhammaṃ deseti. Evaṃ imasmiṃ rādhasaṃyutte ādito dve vaggā pucchāvasena desitā, tatiyo āyācanena, catuttho upanisinnakathāvasena. Sakalampi panetaṃ rādhasaṃyuttam therassa vimuttiparipācanīyadhammaseneva gahitanti veditabbaṃ.

Rādhasaṃyuttavaṇṇanā niṭṭhitā.

3. Diṭṭhisamṃyuttam

1. Sotāpattivaggo

1. Vātasuttavaṇṇanā

206. Diṭṭhisamṃyutte **na vātā vāyantī**tiādīsu evaṃ kira tesam diṭṭhi – “yepi ete rukkkhasākhādīni bhañjantā vātā vāyanti, na ete vātā, vātaleso nāmeso, vāto pana esikatthambho viya pabbatakūṭaṃ viya ca ṭhito. Tathā yāpi etā tiṇakaṭṭhādīni vahantiyo nadiyo sandanti, na ettha udakaṃ sandaki, udakaleso nāmesa, udakaṃ pana esikatthambho viya pabbatakūṭaṃ viya ca ṭhitaṃ. Yāpimā gabbhiniyo vijāyantīti ca vuccanti, kiñcāpi tā milātudarā honti, gabbho pana na nikkhamati, gabbhaleso nāmeso, gabbho pana esikatthambho viya pabbatakūṭaṃ viya ca ṭhito. Yepi ete candimasūriyā uđenti vā apenti vā, neva te uđenti na apenti, candimasūriyaleso nāmesa, candimasūriyā pana esikatthambho viya pabbatakūṭaṃ viya ca ṭhitā”ti.

2-4. Etaṃmamasuttādivaṇṇanā

207-209. Diṭṭhantiādīsu **diṭṭhaṃ** rūpāyatanam. **Sutaṃ** saddāyatanam. **Mutaṃ** gandhāyatanam rasāyatanam phoṭṭhabbāyatanam. Tañhi patvā gahetabbato mutanti ca vuttaṃ. Avasesāni sattāyatanāni **viññātaṃ** nāma. **Pattanti** pariyesitvā vā apariyesitvā vā pattaṃ. **Pariyesitanti** pattaṃ vā apattaṃ vā pariyesitaṃ. **Anuvaritaṃ manasā**ti cittena anusañcaritaṃ. Lokasmiñhi pariyesitvā pattampi atthi, pariyesitvā nopattampi, apariyesitvā pattampi, apariyesitvā nopattampi. Tattha pariyesitvā pattaṃ pattaṃ nāma, pariyesitvā nopattaṃ pariyesitaṃ nāma. Apariyesitvā pattañca apariyesitvā nopattañca manasānuvaritaṃ nāma. Atha vā pariyesitvā pattampi apariyesitvā pattampi pattaṭṭhena pattaṃ nāma, pariyesitvā nopattameva pariyesitaṃ nāma, apariyesitvā nopattaṃ manasānuvaritaṃ nāma. Sabbam vā etaṃ manasā anuvaritameva.

5. Natthidinnasuttavaṇṇanā

210. Natthi dinnantiādīsu **natthi dinnanti** dinnassa phalābhāvaṃ sandhāya vadanti. **Yiṭṭhaṃ** vuccati mahāyāgo. **Hutanti** paheṇakasakkāro adhippeto. Tampi ubhayaṃ phalābhāvameva sandhāya paṭikkhipanti. **Sukatadukkaṭṭānanti** sukatadukkaṭṭānaṃ, kusalākusalānanti attho. **Phalaṃ vipākoti** yaṃ phalanti vā vipākoti vā vuccati, taṃ natthīti vadanti. **Natthi ayaṃ lokoti** paraloke ṭhitassa ayaṃ loko natthi. **Natthi paro lokoti** idha loka ṭhitassapi paro loko natthi, sabbe tattha tattheva uđhijjantīti dassenti. **Natthi mātā natthi pitā**ti tesu sammāpaṭipattimicchapaṭipattīnaṃ phalābhāvavasena vadanti. **Natthi sattā opapātikā**ti cavitvā uppajjanakasattā nāma natthīti vadanti. **Natthi loke samaṇabrāhmaṇā**ti loke sammāpaṭipannā samaṇabrāhmaṇā nāma natthīti vadanti.

Cātumahābhūtikoti cātumahābhūtamayo. **Pathavī pathavīkāyanti** ajjhakkā pathavīdhātu bāhiraṃ pathavīdhātuṃ. **Anupetīti** anuyāti. **Anupagacchatīti** tasseva vevacanaṃ, anugacchatītipi attho. Ubhayaṃ upeti upagacchatīti dassenti. **Āpādisupi** eseva nayo. **Indriyānīti** manacchaṭṭhāni indriyāni. **Saṅkamaṇṇīti** ākāsaṃ pakkhandanti. **Āsandipaṅcamā**ti nipannamañcena pañcamā, mañco ceva, cattāro mañcapāde gahetvā ṭhitā cattāro purisā cāti attho. **Yāva ālāhanā**ti yāva susānā. **Padānīti** “ayaṃ evaṃ sīlavā ahoṣi, evaṃ dussīlo”tiādīnaṃ nayena pavattāni guṇāguṇapadāni. Sarīrameva vā ettha padānīti adhippetam. **Kāpotakānīti** kapotakavaṇṇāni, pāravatapakkhavaṇṇānīti attho. **Bhassantā**ti bhasmantā. Ayameva vā pāli. **Āhutiyo**ti yaṃ paheṇakasakkārādibhedam dinnadānaṃ, sabbam taṃ chārikāvasānameva hoti, na tato param phaladāyakaṃ hutvā gacchatīti attho. **Dattupaññattanti** dattūhi bālamanussehi paññattaṃ. Idaṃ vuttaṃ hoti – bālehi abuddhīhi paññattamidaṃ dānaṃ, na paṇḍitehi. Bālā denti, paṇḍitā gaṇhantīti dassenti.

6. Karotosuttavaṇṇanā

211. Karototi sahatthā karontassa. **Kārayatoti** āṇattiyā kārentassa. **Chindatoti** paresam hatthādīni

chindantassa. **Chedāpayatoti** parehi chedāpentassa. **Pacatoti** daṇḍena piḷentassa. **Pacāpayatoti** parehi daṇḍādīnā piḷāpentassa. **Socato socāpayatoti** parassa bhaṇḍaharaṇādīhi sokam sayam karontassāpi parehi kārentassāpi. **Kilamato kilamāpayatoti** āhārupacchedabandhanāgārapavesanādīhi sayam kilamentassāpi parehi kilamāpentassāpi. **Phandato phandāpayatoti** param phandantam phandanakāle sayampi phandato parempi phandāpayato. **Pānamatipātayatoti** pānam hanantassāpi hanāpentassāpi. Evaṃ sabbattha karaṇakārāpanavaseneva attho veditabbo.

Sandhinti gharasandhiṃ. **Nillopanti** mahāvilopam. **Ekāgārikanti** ekameva gharam parivāretvā vilumpanam. **Paripantheti** tiṭṭhatoti āgatāgatānam acchindanattam magge tiṭṭhato. **Karoto na kariyati pāpanti** yaṃkiñci pāpam karomīti saññāya karotopi pāpam na kariyati, natthi pāpam. Sattā pana karomāti evaṃsaññīno hontīti dīpentī. **Khurapariyantenti** khuraneminā, khuradhārasadisapariyantena vā. **Ekamaṃsakhalanti** ekamaṃsarāsīṃ. **Puñjanti** tasseva vevacanam. **Tatonidānanti** ekamaṃsakhalakaraṇanidānam.

Dakkhiṇanti dakkhiṇatīre manussā kakkhaḷā dāruṇā, te sandhāya **hanantoti**ādi vuttam. **Uttaranti** uttaratīre saddhā hontī pasannā buddhamāmakā dhammāmakā saṅghamāmakā, te sandhāya **dadantoti**ādi vuttam. Tattha **yajantoti** mahāyāgam karonto. **Damenāti** indriyadarena uposathakammena. **Samyamenāti** silasamyamena. **Saccavajjenāti** saccavacanena. **Āgamoti** āgamanam, pavattīti attho. Sabbathāpi pāpapuññānam kiriyaeva paṭikkhipanti.

7. Hetusuttavaṇṇanā

212. Natthi hetu natthi paccayoti ettha **paccayoti** hetuvevacanameva. Ubhayenāpi vijjāmaṇameva kāyaduccarītādīnam saṃkilesapaccayam, kāyasucarītādīnaṃca visuddhipaccayam paṭikkhipanti. **Natthi balanti** yaṃhi attano bale paṭiṭṭhitā ime sattā devattampi mārattampi brahmattampi sāvakabodhipi paccakabodhipi sabbaññutampi pāpuṇanti, tam balaṃ paṭikkhipanti. **Natthi vīriyanti**ādīni sabbāni aññamaññavevacanāneva. “Idam no vīriyena, idam purisathāmena, idam purisaparakkamena patta”nti, evaṃ pavattavacanapaṭikkhepakaraṇavasena panetāni visum ādiyanti.

Sabbe sattāti oṭṭhagonagadrabhādayo anavasese pariggaṇhanti. **Sabbe pāṇāti** ekindriyo pāṇo, dvindriyo pāṇotiādivasena vadanti. **Sabbe bhūtāti** aṇḍakosavatthikosesu bhūte sandhāya vadanti. **Sabbe jīvāti** sāliyavagodhumādayo sandhāya vadanti. Tesu hi te viruhanabhāvena jīvasaññīno. **Avasā abalā avīriyāti** tesam attano vaso vā balaṃ vā vīriyam vā natthi. **Niyatisaṅgatibhāvapariṇatāti** ettha **niyatīti** niyatātā. **Saṅgatīti** channam abhijātīnam tattha tattha gamanam. **Bhāvoti** sabhāvoyeva. Evaṃ niyatīyā ca saṅgatīyā ca bhāvena ca pariṇatā nānappakarattam pattā. Yena hi yathā bhavitabbaṃ, so tatheva bhavati. Yena na bhavitabbaṃ, so na bhavatīti dassenti. **Chasvevābhijātīsūti** chasu eva abhijātīsūti ṭhatvā sukhaṃca dukkhaṃca paṭisaṃvedenti, aññā sukhadukkhabhūmi natthīti dassenti.

8-10. Mahādiṭṭhisuttādivaṇṇanā

213-215. Akatāti akatā. **Akaṭavidhāti** akatavidhānā, “evaṃ karohī”ti kenaci kāritāpi na hontīti attho. **Animmitāti** iddhiyāpi na nimmitā. **Animmātāti** animmāpitā. “Animmitabbā”tipi pāṭho, na nimmitabbāti attho. **Vañjhāti** vañjhapasuvañjhatālādayo viya aphaḷā kassaci ajanakā. Pabbatakūṭam viya ṭhitāti **kūṭaṭṭhā**. Esikaṭṭhāyino viya hutvā ṭhitāti **esikaṭṭhāyīṭṭhitā**, yathā sunikhāto esikatthambho niccalo tiṭṭhati, evaṃ ṭhitāti attho. **Na iñjantīti** esikatthambho viya ṭhitattā na calanti. **Na vipariṇamantīti** pakatiṃ na vijahanti. **Na aññamaññam byābādhentīti** aññamaññam na upahananti. **Nālanti** na samatthā. **Pathavīkāyoti**ādīsū pathavīyeva pathavīkāyo, pathavīsamūho vā. **Sattannaṃtveva kāyānanti** yathā muggarāsīādīsū pahaṭam sattham muggarāsīādīnam antareneva pavisati, evaṃ sattannaṃ kāyānam antarena chiddena vivarena sattham pavisati. Tattha “ahaṃ imam jīvīti voropemī”ti kevalam saññāmatameva hotīti dassenti.

Yonipamukhasatasahassānīti pamukhayonīnaṃ uttamayonīnaṃ cuddasasatasahassāni aññāni ca saṭṭhisatāni aññāni ca chasatāni **pañca ca kammuno satānīti** pañcakammāsātāni cāti kevalaṃ takkamattakena niratthakadiṭṭhiṃ dīpenti. **Pañca ca kammāni tīpi ca kammānīti**ādisupi eseva nayo. Keci panāhu “pañca kammānīti pañcindriyavasena gaṇhanti, tīṇīti kāyakammādivasenā”ti. **Kamme ca aḍḍhakamme cāti** ettha panassa kāyakammavacīkammāni kammanti laddhi, manokammaṃ upaḍḍhakammanti. **Dvaṭṭhipaṭipadāti** dvāsattṭhipaṭipadāti vadanti. **Dvaṭṭhantarakappāti** ekasmiṃ kappe catusaṭṭhi antarakappā nāma honti, ayaṃ pana aññe dve ajānanto evamāha.

Chaḷābhijātiyoti kaṇhābhijāti nīlābhijāti lohitaḅbhijāti haliddābhijāti sukkābhijāti paramasukkābhijātīti imā cha abhijātiyo vadanti. Tattha orabbhikā sūkarikā sākuṇikā māgavikā luddā macchaghātakā corā coraghātakā bandhanāgārikā, ye vā panaññepi keci kurūrakammantā, ayaṃ kaṇhābhijātīti vadanti. Bhikkhū nīlābhijātīti vadanti. Te kira catūsu paccayesu kaṇṭake pakkhipitvā khādanti, “bhikkhū ca kaṇṭakavuttikā”ti (a. ni. 6.57) ayaṃ hissa pāḷi eva. Atha vā kaṇṭakavuttikā eva nāma eke pabbajitāti vadanti. Lohitaḅbhijāti nāma nigaṇṭhā ekasātakāti vadanti. Ime kira purimehi dvīhi paṇḍaratarā. Gihī odāvasanā acelakasāvakaḅ haliddābhijātīti vadanti. Evaṃ attano paccayadāyake nigaṇṭthehipi jeṭṭhakatare karonti. Ājīvakaḅ ājīviniyo ayaṃ sukkābhijātīti vadanti. Te kira purimehi catūhi paṇḍaratarā. Nando vaccho, kiso saṃkicco, makkhali gosālo paramasukkābhijātīti vadanti. Te kira sabbehi paṇḍaratarā.

Aṭṭha purisabhūmiyoti mandabhūmi khiḍḍābhūmi vīmaṃsakabhūmi ujugatabhūmi sekhabhūmi samaṇabhūmi jānanabhūmi pannabhūmīti imā aṭṭha purisabhūmiyoti vadanti. Tattha jātadivasato paṭṭhāya satta divase sambādhaṭṭhānato nikkhantattā sattā mandā honti momūhā, ayaṃ mandabhūmīti vadanti. Ye pana duggatito āgatā honti, te abhiṇhaṃ rodanti ceva vīravanti ca, sugatito āgatā taṃ anussarivā anussarivā hasanti, ayaṃ khiḍḍābhūmi nāma. Mātāpitūnaṃ hatthaṃ vā pādaṃ vā mañcaṃ vā pīṭhaṃ vā gahetvā bhūmiyaṃ padanikkhipanaṃ vīmaṃsakabhūmi nāma. Padasā gantuṃ samatthakālo ujugatabhūmi nāma. Sippāni sikkhanakālo sekhabhūmi nāma. Gharā nikkhamma pabbajanakālo samaṇabhūmi nāma. Ācariyaṃ sevivā jānanakālo jānanabhūmi nāma. “Bhikkhu ca pannako jīno na kiñci āhā”ti evaṃ alābhīṃ samaṇaṃ pannabhūmīti vadanti.

Ekūnapaññāsa ājīvakasateti ekūnapaññāsa ājīvavuttisatāni. **Paribbājakasateti** paribbājakapabbajjāsātāni. **Nāgavāsasateti** nāgamaṇḍalasātāni. **Vīse indriyasateti** vīsa indriyasātāni. **Tiṃse nirayasateti** tiṃsa nirayasātāni. **Rajodhātuyoti** rajaokiraṇaṭṭhānāni. Hatthapiṭṭhipādapīṭṭhādīni sandhāya vadati. **Satta saññīgabbhāti** oṭṭhagoṇagadrabhaajapasumigamahimse sandhāya vadati. **Satta asaññīgabbhāti** sāliyavagodhumamuggakaṅguvarakakudrūsake sandhāya vadati. **Nigaṇṭhīgabbhāti** gaṇṭhimhi jātagabbhā, ucchuveḷunaḷādayo sandhāya vadati. **Satta devāti** bahū devā, so pana sattāti vadati. Manussāpi anantā, so sattāti vadati. **Satta pesācāti** pisācā mahantamahantā, sattāti vadati. **Sarāti** mahāsarā. Kaṇṇamuṇḍa-rathakāra-anotatta-sihappapāta-chaddanta-mucalinda-kuṇḷadahe gahetvā vadati.

Pavuṭāti gaṇṭhikā. **Papātāti** mahāpapātā. **Papātasatānīti** khuddakapapātasātāni. **Supināti** mahāsupinā. **Supinasatānīti** khuddakasupinasātāni. **Mahākappinoti** mahākappānaṃ. Ettha ekamhā mahāsarā vassasate vassasate kusaggena ekaṃ udakabinduṃ nīharitvā sattakkhattuṃ tamhi sare nirudake kate eko mahākappoti vadati. Evarūpānaṃ mahākappānaṃ caturāsītīsatasahassāni khepetvā bāle ca paṇḍite ca dukkhassantaṃ karontīti ayamassa laddhi. Paṇḍitopi kira antarāvisujjhitaṃ na sakkoti, bālopi tato uddhaṃ na gacchati.

Sīlena vāti acelakasīlena vā aññena vā yena kenaci. **Vatenāti** tādiseneva vatena. **Tapenāti** tapokammaena. **Aparipakkaṃ paripāceti** nāma yo “ahaṃ paṇḍito”ti antarā visujjhati. **Paripakkaṃ phussa phussa byantikaroti** nāma yo “ahaṃ bālo”ti vuttaparimāṇakālaṃ atikkamitvā yāti. **Hevaṃ natthīti** evaṃ natthi. Tañhi ubhayampi na sakkā kātunti dīpeti. **Doṇamiteti** doṇena mitaṃ viya. **Sukhadukkheti** sukhadukkhāṃ. **Pariyantakateti** vuttaparimāṇena kālena katapariyanto. **Natthi**

hāyanavaḍḍhaneti natthi hāyanavaḍḍhanāni, na saṃsāro paṇḍitassa hāyati, na bālassa vaḍḍhatīti attho. **Ukkaṃsāvakaṃseti** ukkaṃsāvakaṃsā. Hāyanavaḍḍhanānamevetam vevacanam. Idāni tamattham upamāya sādento **seyyathāpi nāmāti**ādīmāha. Tattha **suttaguḷeti** veḥetvā katasuttaguḷe. **Nibbeḥhiyamānameva paletīti** pabbate vā rukkhagge vā ṭhatvā khittam suttappamāṇena nibbeḥhiyamānameva gacchati, sutte khīṇe tattheva tiṭṭhati, na gacchati evameva bālā ca paṇḍitā ca kālavasena nibbeḥhiyamānā sukhadukkham palenti, yathāvuttena kālena atikkamantīti dasseti.

11-18. Antavāsuttādivaṇṇanā

216-223. Antavā lokoti ekato vaḍḍhitanimittam lokoti gāhena vā takkena vā uppannadiṭṭhi. **Anantavāti** sabbato vaḍḍhitam appamāṇanimittam lokoti gāhena vā takkena vā uppannadiṭṭhi. **Tam jivam tam sarīranti** jīvañca sarīrañca ekamevāti uppannadiṭṭhi. Sesam sabbattha uttānamevāti. Imāni tāva sotāpattimaggavasena aṭṭhārassa veyyākaraṇāni ekam gamanam.

2. Dutiyagamanādivaggaṇṇanā

224-301. Dutiyam gamanam dukkhavasena vuttam. Tatrāpi aṭṭhārassa veyyākaraṇāni, tato parāni “rūpī attā hoti”tiādīni aṭṭha veyyākaraṇāni, tehi saddhim tam dutiyapeyyāloti vutto.

Tattha **rūpīti** ārammaṇameva “attā”ti gahitadiṭṭhi. **Arūpīti** jhānam “attā”ti gahitadiṭṭhi. **Rūpī ca arūpī cāti** ārammaṇaṇca jhānañca “attā”ti gahitadiṭṭhi. **Neva rūpī nārūpīti** takkamattena gahitadiṭṭhi. **Ekantasukhīti** lābhītakkiṅjātissarānam uppannadiṭṭhi. Jhānalābhinopi hi atīte ekantasukham attabhāvam manasikaroto evam diṭṭhi uppajjati. Takkinopi “yathā etarahi aham ekantasukhī, evam samparāyepi bhavissāmī”ti uppajjati. Jātissarassapi sattaṭṭhabhave sukhitabhāvam passantassa evam uppajjati, **ekantadukkhīti**ādīsipi eseva nayo.

Tatipeyyālo aniccadukkhavasena tehiyeva chabbīsatiyā suttehi vutto, catutthapeyyālo tiparivaṭṭavāsenaṭi.

Diṭṭhisamṃyuttavaṇṇanā niṭṭhitā.

4. Okkantasaṃyuttam

1-10. Cakkhusuttādivaṇṇanā

302-311. Okkantasaṃyutte **adhimuccatīti** saddhādhimokkham paṭilabhati. **Okkanto sammattaniyāmati** pavitṭho ariyamaggaṃ. **Abhabbo ca tāva kālam kātunti** iminā uppanne magge phalassa anantarāyatam dīpeti. Uppannasmiñhi magge phalassa antarāyakaraṇam nāma natthi. Tenevāha – “ayañca puggalo sotāpattiphalaśchikiriya paṭipanno assa, kappassa ca uḍḍayhanavelā assa, neva tāva kappo uḍḍayheyya, yāvāyam puggalo na sotāpattiphalam śchikaroti, ayam vuccati puggalo ṭhitakappī”ti (pu. pa. 17). **Mattaso nijjhānam khamantīti** pamāṇato olokanam khamanti. Sesam sabbattha uttānamevāti.

Okkantasaṃyuttavaṇṇanā niṭṭhitā.

5. Uppādasamṃyuttavaṇṇanā

312-321. Uppādasamṃyutte sabbam pākaṭameva.

Uppādasamyuttavaṇṇanā niṭṭhitā.

6. Kilesasamyuttavaṇṇanā

322-331. Kilesasamyutte **cittasesso upakkilesoti** kataracittassa? Catubhūmakacittassa. Tebhūmakacittassa tāva hotu, lokuttarassa kathaṃ upakkilesa hotīti? Uppattinivāraṇato. So hi tassa uppajjituṃ appadānena upakkilesoti veditabbo. **Nekkhammaninnanti** navalokuttaradhammaninnaṃ. **Cittanti** samathavipassanācittaṃ. **Abhiññā sacchikaraṇīyesu dhammesūti** paccavekkhaṇañāṇena abhijānitvā sacchikātabbesu chaḷabhiññādharmesu, ekaṃ dhammaṃ vā gaṇhantena nekkhammanti gahetabbaṃ. Sesam sabbattha uttānamevāti.

Kilesasamyuttavaṇṇanā niṭṭhitā.

7. Sāriputtasamyuttam

1-9. Vivekajasuttādivaṇṇanā

332-340. Sāriputtasamyuttassa paṭhame **na evaṃ hotīti** ahankāramamaṅkāraṇaṃ pahīnattā evaṃ na hoti. Dutiyādīsupi eseva nayo. Paṭhamādīni.

10. Sucimukhīsuttavaṇṇanā

341. Dasame **sucimukhīti** evaṃnāmikā. **Upasaṅkamīti** theram abhirūpaṃ dassanīyaṃ suvaṇṇavaṇṇaṃ samantapāsādikaṃ disvā “iminā saddhiṃ parihāsaṃ karissāmī”ti upasaṅkami. Atha therena tasmim vacane paṭikkhite “idānissa vādaṃ āropessāmī”ti maññamānā **tena hi, samaṇa, ubbhamukho bhuñjasīti** āha. **Disāmukhoti** catuddisāmukho, catasso disā oloketoti attho. **Vidisāmukhoti** catasso vidisā oloketto.

Vatthuvijjātiracchānavijjāyāti vatthuvijjāsāṅkhātāya tiracchānavijjāya. Vatthuvijjā nāma lābuvatthu-kumbhaṇḍavatthu-mūlakavatthu-ādīnaṃ vatthūnaṃ phalasampattikāraṇakālaḷājananupāyo. **Micchājīvena jīvikaṃ kappentīti** teneva vatthuvijjātiracchānavijjāsāṅkhātēna micchājīvena jīvikaṃ kappenti, tesam vatthūnaṃ sampādanena pasannehi manussehi dinne paccaye paribhuñjantā jīvantīti attho. **Adhomukhāti** vatthuṃ oloketvā bhuñjamānavasena adhomukhā bhuñjanti nāma. Evaṃ sabbattha yojanā kātabbā. Api cettha **nakkhattavijjāti** “ajja imaṃ nakkhattaṃ iminā nakkhattena gantabbaṃ, iminā idaṅcīdaṅca kātabbā”nti evaṃ jānanavijjā. **Dūteyyanti** dūtakammaṃ, tesam tesam sāsaṇaṃ gahetvā tattha tattha gamanaṃ. **Pahiṇagamananti** ekaḡāmasmiṃyeva ekakulassa sāsaṇena aññakulaṃ upasaṅkamaṇaṃ. **Aṅgavijjāti** itthilakkhaṇapurisalakkhaṇavasena aṅgasampattiṃ ñatvā “tāya aṅgasampattiyā idaṃ nāma labbhatī”ti evaṃ jānanavijjā. **Vidisāmukhāti** aṅgavijjā hi taṃ taṃ sarīrakoṭṭhāsaṃ ārabba pavattattā vidisāya pavattā nāma, tasmā tāya vijjāya jīvikaṃ kappetvā bhuñjantā vidisāmukhā bhuñjanti nāma. **Evamārocesūti** “dhammikaṃ samaṇā”tiādīni vadamānā sāsaṇassa niyyānikaṃ guṇaṃ kathesi. Taṅca paribbājikāya kathaṃ sutvā pañcamattāni kulasaṭāni sāsaṇe otariṃsūti.

Sāriputtasamyuttavaṇṇanā niṭṭhitā.

8. Nāgasamyuttam

1. Siddhikasuttavaṇṇanā

342. Nāgasamyutte **aṇḍajāti** aṇḍe jātā. **Jalābujāti** vatthikose jātā. **Samsedajāti** samsede jātā. **Opapātikāti** upapativā viya jātā. Idañca pana suttaṃ aṭṭhuppattiyā vuttaṃ. Bhikkhūnañhi “kati nu kho nāgayoniyo”ti kathā udapādi. Atha bhagavā puggalānaṃ nāgayonihi uddharaṇatthaṃ nāgayoniyo āvikaronto imaṃ suttaṃāha.

2-50. Paṇītatarasuttādivaṇṇanā

343-391. Dutiyādīsu **vossaṭṭhakāyāti** ahituṇḍikaparibuddhaṃ agaṇetvā vissaṭṭhakāyā. **Dvayakārinoti** duvidhakāriṇo, kusalākusalakāriṇoti attho. **Sacajja mayanti** sace ajja mayāṃ. **Sahabyataṃ upapajjati** sahabhāvaṃ āpajjati. Tatrassa akusalaṃ upapattiyā paccayo hoti, kusalaṃ upapannānaṃ sampattiyā. **Annanti** khādanīyabhojanīyaṃ. **Pānanti** yaṃkiñci pānakaṃ. **Vatthanti** nivāsanapārūpanaṃ. **Yānanti** chattupāhanaṃ ādiṃ katvā yaṃkiñci gamanapaccayaṃ. **Mālanti** yaṃkiñci sumanamālādipupphaṃ. **Gandhanti** yaṃkiñci candanādīgandhaṃ. **Vilepananti** yaṃkiñci chavirāgakaraṇaṃ. **Seyyāvasathapadīpeyyanti** mañcapīṭhādiseyyaṃ ekabhūmikādiāvasathaṃ vaṭṭitelādīpadīpūpakaraṇaṃca detīti attho. Tesañhi dīghāyukatāya ca vaṇṇavantatāya ca sukhabahulatāya ca patthanaṃ katvā imaṃ dasavidhaṃ dānavatthūṃ datvā taṃ sampattiṃ anubhavitūṃ tattha nibbattanti. Sesāṃ sabbattha uttānamevāti.

Nāgasamyuttavaṇṇanā niṭṭhitā.

9. Supaṇṇasamyuttavaṇṇanā

392-437. Supaṇṇasamyutte pattānaṃ vaṇṇavantatāya garuḷā **supaṇṇāti** vuttā. Idhāpi paṭhamasuttaṃ purimanayeneva aṭṭhuppattiyāṃ vuttaṃ. **Harantīti** uddharanti. Uddharamānā ca pana te attanā hīne vā same vā uddharitūṃ sakkonti, na attanā paṇītatare. Sattavidhā hi anuddharaṇīyanāgā nāma paṇītatarā kambalassatarā dhataratṭhā sattasīdantaravāsino pathaviṭṭhakā pabbataṭṭhakā vimānatṭhakāti. Tatra aṇḍajādīnaṃ jalābujādayo paṇītatarā, te tehi anuddharaṇīyā. Kambalassatarā pana nāgasenāpatino, te yattha katthaci disvā yo koci supaṇṇo uddharitūṃ na sakkoti. Dhataratṭhā pana nāgarājāno, tepi koci uddharitūṃ na sakkoti. Ye pana sattasīdantare mahāsamudde vasanti, te yasmā katthaci vikampanaṃ kātuṃ na sakkā, tasmā koci uddharitūṃ na sakkoti. Pathaviṭṭhakādīnaṃ nilīyanokāso atthi, tasmā tepi uddharitūṃ na sakkoti. Ye pana mahāsamudde ūmipiṭṭhe vasanti, te yo koci samo vā paṇītataro vā supaṇṇo uddharitūṃ sakkoti. Sesāṃ nāgasamyutte vuttanayamevāti.

Supaṇṇasamyuttavaṇṇanā niṭṭhitā.

10. Gandhabbakāyasamyuttavaṇṇanā

438-549. Gandhabbakāyasamyutte **mūlagandhe adhivatthāti** yassa rukkhassa mūle gandho atthi, taṃ nissāya nibbattā. So hi sakalopi rukkho tesāṃ upakappati. Sesapadesupi eseva nayo. **Gandhagandheti** mūladīgandhānaṃ gandhe. Yassa hi rukkhassa sabbesampi mūladīnaṃ gandho atthi, so idha gandho nāma. Tassa gandhassa gandhe, tasmīṃ adhivatthā. Idha mūladīni sabbāni tesāmyeva upakappanti. **So dātā hoti mūlagandhānanti** so kālānusārīkādīnaṃ mūlagandhānaṃ dātā hoti. Evaṃ sabbapadesu attho veditabbo. Evañhi sarikkhadānampi datvā patthanaṃ ṭhapenti, asarikkhadānampi. Taṃ dassetuṃ **so annaṃ detīti**ādi dasavidhaṃ dānavatthu vuttaṃ. Sesāṃ sabbattha uttānamevāti.

Gandhabbakāyasamyuttavaṇṇanā niṭṭhitā.

11. Valāhakasamyuttavaṇṇanā

550-606. Valāhakasaṃyutte **valāhakakāyikā**ti valāhakanāmake devakāye uppannā ākāsaṅgikadevā. **Sīta**valāhakāti sītakaṇṇavalāhakā. Sesapadesupi eseva nayo. **Cetopaṇidhimanvāyā**ti cittaṭṭhapanam āgama. **Sītam hotī**ti yaṃ vassāne vā hemante vā sītam hoti, taṃ utusamuṭṭhānameva. Yaṃ pana sītepi atisītam, gimhe ca uppannam sītam, taṃ devatānubhāvena nibbattam sītam nāma. **Uṇham hotī**ti yaṃ gimhāne uṇham, taṃ utusamuṭṭhānikam pākatikameva. Yaṃ pana uṇhepi atiuṇham, sītakāle ca uppannam uṇham, taṃ devatānubhāvena nibbattam uṇham nāma. **Abbham hotī**ti abbhamaṇḍapo hoti. Idhāpi yaṃ vassāne ca sisire ca abbhām uppajjati, taṃ utusamuṭṭhānikam pākatikameva. Yaṃ pana abbheveva atiabbham, sattaṣaṭṭhānampi candaṣūriye chādetvā ekandhakāram karoti, yañca cittavesākhamāsesu abbhām, taṃ devatānubhāvena uppannam abbhām nāma. **Vāto hotī**ti yo tasmim tasmim utumhi uttaradakkhiṇādīpakativāto hoti, ayaṃ utusamuṭṭhānova. Yopi pana rukkhakkhandhādīpadālano ativāto nāma atthi, ayañceva, yo ca aññopi akālavāto, ayaṃ devatānubhāvanibbatta nāma. **Devo vassatī**ti yaṃ vassike cattāro māse vassam, taṃ utusamuṭṭhānameva. Yaṃ pana vasseveva ativassam, yañca cittavesākhamāsesu vassam, taṃ devatānubhāvanibbattam nāma.

Tatridam vatthu – eko kira vassavalāhakadevaputto talakūṭakavāsi khīṇāsavatttherassa santikam gantvā vanditvā aṭṭhāsi. Thero “kosi tva”nti pucchi. “Aham, bhante, vassavalāhakadevaputto”ti. “Tumhākam kira cittena devo vassatī”ti? “Āma, bhante”ti. “Passitukāmā maya”nti. “Temissatha, bhante”ti. “Meghasīsam vā gajjitam vā na paññāyati, katham temissāmā”ti? “Bhante, amhākamcittena devo vassati, tumhe paṇṇasālam pavisathā”ti. “Sādhu devaputtā”ti so pāde dhovivā paṇṇasālam pāvīsi. Devaputto tasmim pavisanteyeva ekam gītam gāyivā hattham ukkhipi. Samantā tiyojanaṭṭhānam ekamegham ahoṣi. Thero addhatinto paṇṇasālam pavīṭṭhoti. Apica devo nāmesa aṭṭhahi kāraṇehi vassati nāgānubhāvena supaññānubhāvena devatānubhāvena saccakiriyāya utusamuṭṭhānena mārāvattānena iddhibalena vināsameghenāti.

Valāhakasaṃyuttavaṇṇanā niṭṭhitā.

12. Vacchagottasaṃyuttavaṇṇanā

607-661. Vacchagottasaṃyutte **aññāṇā**ti aññāṇena. Evaṃ sabbapadesu kaṇṇavaseneva attho vedītabbo. Sabbāni cetāni aññāmaññavevacanānevāti. Imasmiñca pana saṃyutte ekādasa suttāni pañcapaññāsa veyyakaraṇānti vedītabbāni.

Vacchagottasaṃyuttavaṇṇanā niṭṭhitā.

13. Jhānasamuttam

1. Samādhimūlakasaṃpattisuttavaṇṇanā

662. Jhānasamuttassa paṭhame **samādhikusalo**ti paṭhamam jhānam pañcaṅgikam dutiyam tivāṅgikanti evam aṅgavavattānakusalo. **Na samādhimim samāpattikusalo**ti cittaṃ hāsetvā kallaṃ katvā jhānam samāpajjitum na sakkoti. Iminā nayena sesapadānīpi vedītabbāni.

2-55. Samādhimūlakaṭṭhitisuttādivaṇṇanā

663-716. Dutiyādīsū **na samādhimim ṭṭhitikusalo**ti jhānam ṭṭhāpetum akusalo, sattaṭṭhaaccharāmatam jhānam ṭṭhāpetum na sakkoti. **Na samādhimim vuṭṭhānakusalo**ti jhānato vuṭṭhātum akusalo, yathāparicchedena vuṭṭhātum na sakkoti. **Na samādhimim kallitakusalo**ti cittaṃ hāsetvā kallaṃ kātum akusalo. **Na samādhimim ārammaṇakusalo**ti kasiṇārammaṇesu akusalo. **Na samādhimim gocarakusalo**ti kammaṭṭhānagocare ceva bhikkhācāragocare ca akusalo. **Na**

samādhismiṃ abhinīhārakusaloti kammaṭṭhānaṃ abhinīharituṃ akusalo. **Na samādhismiṃ sakkaccakārī**ti jhānaṃ appetuṃ sakkaccakārī na hoti. **Na samādhismiṃ sātaccakārī**ti jhānappanāya satatakārī na hoti, kadācīdeva karoti. **Na samādhismiṃ sappāyakārī**ti samādhissa sappāye upakāradhamme pūretuṃ na sakkoti. Tato paraṃ samāpattiādīhi padehi yojetvā catukkā vuttā. Tesam attho vuttanayeneva veditabbo. Sakalaṃ panettha jhānasamṃyuttaṃ lokiyajjhānavaseneva kathitanti.

Jhānasamṃyuttavaṇṇanā niṭṭhitā.

Iti sārathhappakāsiniyā samṃyuttanikāya-aṭṭhakathāya

Khandhavaggavaṇṇanā niṭṭhitā.

Samṃyuttanikāya-aṭṭhakathāya dutiyo bhāgo.